

Afositolo Yadi Gugai

Kivemala

Yeisu gilaka gabameya muline, malamala teti teli (33) giavaina anafaiweya ada doketa seyana anayegana Luke taide buki-nai givetokilumina. Nuwanuwana moyaida kana alamanena gavana giyegemona Yeisu yana laka gabameya muline, anafaiweya gavaiyamu Aluwaluwa Tabuna gifaifaisewa kaliva wagaidiya e ada Yaubada yana ekalesiya givevuvu, ada afositoloyavo ifufudi. Ifufu-dina tufodi buki-nai wagaine ani afositoloyavo iifuifufuyedi Luke wagaine aku tufodi Luke tauna gialamanedi, faina bana Paulo gikwayabuna yana laumamala balawalilivuga wagaidiya. Taidei faina tamo tova Luke givetokilumina “akidewadewa ana madunau Masedonia,” o kai “moyaima avetalakafoiyedi.” Anafaiweya 16:10-17, 20:5-15, 21:1-18, 27:1-29 ada 28:1-16.

Aku Luke yana vetokiluma ananuwanuwa ani taidei anafaiweya. Badi taudiyavo iawaegedi Yeisu Keliso wagaine ani Yaubada gifaifaisewa wagaidiya Aluwaluwa Tabuna wagaine. Abutunai Penitikosi wagaine tova-nai Aluwaluwa Tabuna tovetumagana moyaidi givemagadi, Pita afositolo adileveni nodi imididi ke valeya iwakana gilumamalena ada kaliva adiyoo teli tausani (3,000) anafaiweya inuwavilana yadi gugai koyodi wagaidiya ke Yeisu ivetumaganena. Ada aimo Filipi melala-nai Sameliya wagaine valeya iwakana gilumamalena ada kadu kaliva

moyaidi taudiyavo iawaegedi Yeisu wagaine. Ada muliya Paulo atuwadeya ginaunau ke kaliva fafali tulina tulina wagaidiya givevewaledi valeya iwakana ananuwanuwa. Afositoloyavo ke tovetumagana moyaidi ani Aluwaluwa Tabuna toyogina giveledi e ada kaliva ivevewaledi ke Yeisu anayeganeya gugai ebameyasidobodobo igugugaiyedi e ada kaliva fafali moyaina wagaidiya Yeisu ivetumaganena.

Kadu nuwanuwa seyana ani nagona meIsileli tufodi ivetumagana aku muliya badi keke meIsileli tufodi Yeisu ivetumaganena. Tova tuwai-moena-deya badi meIsileli ada badi keke meIsileli ani keke nodi ida luluveya, aku Yaubada yana kivetuvetunu wagaine yoo iluwei-dina ivebutu ivevetubuiyana.

¹ Tubuiyaku Tiyo filo, tuwaina yaku buki nagona wagaine gaitoma moyaina Yeisu gigugaiyedi kaduwe givewalayena ani gavetokilumina.**

² Yana gugai anaebavevuvu wagaine gavebutu gavetokilumina, ada yana laka gabameya Banae ifuifufuna ganunauwena. Aku aimo keke gidalaka gabameya aku Aluwaluwa Tabuna yana kivetuvetunuga wagaine, badiyavo afositolo givenuwadadanedi ani adiveimeya giveledi.†

³ Banae yana uloulolo muline, alikeya giyawa-vagila ke badi afositolo-dina wagaidiya Tauna giseseyegemone-moena e ada keke adifaiweya

**

1:1 Luke givetokilumina buki iluwei. Buki nagona ivewagana Valeya Iwakana Luke Givetokilumina, ada anavelu Afositolo Yadi Gugai. (Luk 1:1-4) † **1:2** Luk 24:49-51

yana yawa-vagila faina ina venuwana. Ada yadayada foti (40) wagaidiya giyegeyegemona badi wagaidiya ke givevewaledi Yaubada yana ebaveimeya faina.†

⁴ Ada tova seyana badi Yeisu nodi ikanikani aku veimeya givedi, givonaga, “Keke Yelusalema wana madumadusege aku wana bodana Aluwaluwa Tabuna, Banae Tamada givonadabadabayena.† Bademowa gaifufuyena ke wanogalina.†

⁵ Faina Iyoni gufa wagaine gikikivebabitaiso,† aku yadayada tufodi kana segedi, imiyavo Aluwaluwa Tabuna wagaine wana babitaiso.” Taidei anafaiweya Yeisu givonedi.†

Yaubada Yeisu gabameya gisilakaina.

⁶ Kaduwe seyana tova afositoloyavo Yeisu nodi imiyavagauta ada itolidadanena, ivona, “Kauveya, gavaiyamu, tova taidei una vekini Isileli wagaine e ada moyaida meIsileli kana mididi ke taudeyavo yada ebaveimeya wagaine kana miyamiya?”

⁷ Yeisu givonedi, givona, “Kamaku anakaibemowa tova ada tutuya giveimeyena, aku imi keke amifaiweya tova-dina wana alamane.

⁸ Aku gaitoma seyana amifaiweya wana alamanena, imi aimo Aluwaluwa Tabuna gina toyogivelemi tova-nai tauna gina vemagami.† Ada wana vetoawatalatalaina faikuya† Yelusalema

† 1:3 Mad 28:17, Mak 16:14, Luk 24:34-51, Iyo 20:19-29, 21:1-25, Gug 10:40-41, 13:31, 1Kol 15:5-7 † 1:4 Iyo 14:16-17 † 1:4 Luk 24:49 † 1:5 Mad 3:11, Mak 1:8, Luk 3:16, Iyo 1:26-27 † 1:5 Iyo 1:33, Gug 11:16 † 1:8 Efes 3:16 † 1:8 Gug 2:32

wagaina, kaduwe Yudiya ke Sameliya adifafali matatabuna wagaidiya ke kaduwe babi matatabuna wagaine.” †

⁹ Ada Yeisu vona taidei giluyabuna muline, matadiya Yaubada gisilakaina gabameya. Ada gilakalaka aku tonogalayavo iitavedadaga ada iitavenanauna ke buibui gibabalina, ada keke adifaiweya inaita.†

¹⁰ Yeisu gilakalaka aku badi aimo iitavedadaga-vagata mwatuguya aku kaliva adiselu adin-uva kwayakwayafolidi ani maduga-mowa lili-vadiya imididi.

¹¹ Ada ivonedi, “Imi meGalili, gavana faina idedeku wamidimididi aku waitaitavedadaga wagabameya? Banae taidei Yeisu Yaubada gabameya gisilakaina ke ginuyabuyabumi ani aimo tova muline gina obuelai-vagila. Banae gabameya waitana gilaka anafaiweya, kaduwe gabameya gina obuelai.”†

Mataiyasi ivenuwadanena Yudasa fatana.

¹² Ada Oya Olive wagaine-deya afositoloyavo iyewa inau Yelusalema, keke atuwada, vaita kilomita seyana anafaiweya.

¹³ Tova-nai iyegemona Yelusalema ada inau manuwana-nai imiyamiyanina wagaine ke ilaka manawa getane yadi tutulagolota wagaine. Badiyavo imiyamiya ani Pita, Iyoni, Iyemesa, Andulu, Filipi, Tomasi, Batolomiu ke Madiu ada

† 1:8 Mad 28:19, Mak 16:15, Luk 24:47-48 † 1:9 Mak 16:19, Luk 24:50-51 † 1:11 Mad 16:27, Luk 21:27, 2Tes 1:10, Ive 1:7

Iyemesa banae Alifiyo natuna, Saimoni Seloti,**
ada Yudasa banae Iyemesa natuna.†

14 Badiyavo tova moyaina ivagavagauta ke
iveoveola aigaigabu, ada vevine nodi, kaduwe
Meli Yeisu inana ke tainavo nodi.

15 Ada yadayada tufona giavaidi, tovetuma-
gana imiyavagauta, adiyoo wani analedi tuwen-
iti (120). Ada Pita adimwatuguya gimididi ke
givonedi,

16 “Tubuiyakuweyavo, gavana tova tuwai-
moena Buki Tabu wagaine ivetokilumina ani
bademowa giyegemona velemoena. Ani tuwaina
Aluwaluwa Tabuna Deivida awane Yudasa faine
givonaye-vagina, banae kaliva ginagoyedi ielai
ke Yeisu ikiveyabina.†

17 Bana Yudasa ani nagona ime afositolo yama
yoo seyana, faina Yeisu bana ime nodi ida
faisewa-nai faina givenuwadadanema.” Taidei
anafaiweya Pita givebutu giifuifufu.

18 Aku Yudasa yana gugai koyona wagaine fa-
tana givaina, ada mani-nai wagaine babi seyana
gikimonena. Ani yana babi-nai wagaine waku-
luwane gibeu ke ifugana givelubwakeiyena ada
kamokamona gisesela, ke gialika.

19 Ada meYelusalema moyaidi valeyana ino-
galina, e ada babi-nai taudiyavo bonadiya ivewa-
gana ‘Akelidama’. Yegana taidei anakivila ani
‘Dayaga anaBabi’.†

** 1:13 Tayuwe tova-dina wagaidiya badi meIsileli gavega
nuwanuwadi lakaina aditoveimeya-dina meLoma ina wavidi
inanau ani ivewagadi ‘Seloti’. † 1:13 Mad 10:2-4, Mak 3:16-19,
Luk 6:14-16 † 1:16 Sam 41:9 † 1:19 Mad 27:1-10

²⁰ Kaduwe Pita givona, “Faina tuwaina Yaubada yana vona Same wagaine Deivida givetokilumina Yudasa faine, givona,

‘Kaliva moyaidi yana manuwa
ina nuyabuyabuna,
ada keke tamo gaito wadedeku gina miyami.’†

Kaduwe Yaubada yana vona seyana givona,

‘Kadu seyana gaito yana nagoya gina vaina.’†

²¹⁻²² Yaubada yana vona taidei anafaiweya givona faina, kaliva seyana banae fatana faina gilubodada kada venuwadadanena, e ada Yeisu Keliso yana yawa-vagila faina bana ime afositolo nodi kaliva wagaidiya ana awatalatalaina. Ada bana kaliva-nai yada yoo wagaideya kana vaina. E, tamo gaito ide tuwaina kavevuvu Kauveya Yeisu nodi kamiyamiya kanunudadana, tuwaina Iyoni kaliva gikivebabitaisodi anatoveya† ada kanauwena-deya Yaubada Yeisu gabameya gisilakaina ke gimadusegeda.† Au tainei Yudasa fatana kanasena.”

²³ Aku Pita taidei anafaiweya givona faina, kaliva adiselu ikilakailuvaluvadi. Seyana Iyosefa banae ivewagana Basabasi, ada kadu anayegana anaveto Yasito. Kaduwe kaliva anavelu anayegana Mataiyasi.

²⁴ Adiyegana ivenuwadadanedi muliya iveove-ola, ivona, “Kauveya-yo, Oye kaliva seyana

† **1:20** Sam 69:25 † **1:20** Sam 109:8 † **1:21-22** Luk 3:21

† **1:21-22** Mak 16:19, Luk 24:51

seyana yama nuwanuwa aseasemeya ualamanena. E ada Oye una vewalema kaliva taidei adiselu wagaidiya-deya gaito seyana uvenuwadadana-nena,

²⁵ ada banae Yudasa fatana ke afositolo yadi gugai gina vaina, gugai-nai Yudasa gimadusegena ke ginanau tauna yana fafali.”

²⁶ Ada veoveola muline, kabala anaselakalakata** anavenuwadadana wagaine inuwagana vaita Mataiyasi ani Yudasa fatana. E ada Mataiyasi banae giluku afositoloyavo adileveni nodi.

2

Aluwaluwa Tabuna tovetumagana givemagadi.

¹ Aku Abutu Penitikosi† anayadayada giyege-mona wagaine, tovetumagana moyaidi bade-mowa imiyavagauta fafali seyana wagaine.

² Ada au maduga-mowa wagabameya butuna inogalina vaita mala toyogina giveyuveyuve anafaiweya, ada manuwa-nai wagaine ivetove-toga ani butuna givemagana.

³ Ada iitana gaitoma seyana anaita vaita aiyabeyabela meyana giludakadakana ke kaliva seyana seyana kuluwana getane givetoga.

** **1:26** Kabala anaselakalakata anavenuwadadana ani taidei anafaiweya taide maita-nai wagaine. Kaliva-dina adiselu adiye-gana kabala kabisodi wagaidiya ivetokilumidi ke tuwava wagaine idododi. Ada tova-nai kabala-dina ibiwadi ani Mataiyasi anayegana gimadubeu. E ada taidei wagaine ialamanena Yaubada Mataiyasi givenuwadadanena. † **2:1** Vei 23:15

⁴ Ada matatabudi Aluwaluwa Tabuna givemagadi† ke ivebutu meya tulina tulina wagaidiya iifuifufu Aluwaluwa Tabuna gialaveleveledi mmauwe.

⁵ Aku wadedeku Yelusalema wagaine meIsileli tufona moyaidi imiyamiya, badi Yaubada wagaine ioduodu. Fafali tulina tulina moyaidi wagaidiya itauya ke ina Yelusalema imiyamiya.

⁶ Ada badi kaliva-dina kaliva yadi ifufu meya tulina tulina ani bonadi inogalina e ada moyaidi ivagauta. Ada nuwadi givoganina, faina kaliva seyana seyana ginogalina tauna meyane tovetumagana iifuifufu.

⁷ Ada moyaidi meyadi gisidobodobona ke taudiyavo wa yadi nuwavogana ivona, “Ida kaliva-dina iifuifufu ani badi moyaidi meGalili.

⁸ E ada gavaiyamu-yo moyaida kanogalidi taudeyavo meyada tulina tulina wagaidiya iifuifufu?

⁹ Ide yada fafali wagaidiya kaelai ani Patiya, Midiya, Elama, Mesopotemiya, Yudiya, Kafadosiya, Ponitasi, Eisiya.

¹⁰ Kadu Filidiya, Pamifiliya, Itipita ke Libiya anafafali Sailini lilivane. Ada kaduwe tufoda meLoma aku Yelusalema wagaine kawakawaka,

¹¹ tufoda meIsileli velemonoena aku tufoda keke meIsileli aku meIsileli yadi tafalolo wagaine kaawaegeda ke kadamana. E, kaduwe tufoda meKiliti ke Alebiya. Au yada fafali moyaina aku moyaida kanogalina taudeyavo meyada tulina tulina wagaidiya iifuifufu ada Yaubada yana gugai toyogina iawaawatalatalainedi!”

† 2:4 Mad 3:11, Iyo 14:17, Gug 4:31, 10:44-46

¹² Ada moyaidi meyadi gisidobodobona ke nuwadi givoganina, ada taudiyavo gaga ivetoli-toli, ivona, “Ida gavana?”

¹³ Aku tufodi ani tovetumagana iawaveleigedi, ivona, “Wada badi waini digadigagina iyuga ivek-wavakwava.”

Pita gilumamala yoo lakaina wagaidiya.

¹⁴ Ada bana Pita badi afositolo adileveni nodi gimididi ke bonana lakaina wagaine givona yoo wagaidiya, givona, “Imi meIsileli ke imi Yelusalema wagaine wamiyamiya, wana nogalina gavana ganavona ada nuwami gina malina.

¹⁵ Taidei kaliva-dina keke gufa toyogina idayui ke ida vekwavakwava wanuwanuwa anafaiweya. Ida malabutuya kauwana naeni kiloki. Keke yuga anatova.

¹⁶ Aku ida falofita Iyoweli tuwaina gimadu awamogatalena ani giyegemona velemono anafaiweya. Givona,

¹⁷ ‘Yaubada givona, Aimo tova anaebal-auyabu anayadayada-dina wagaidiya ani Aluwaluwaku gana biwana tomiyababi moyaidi wagaidiya. E ada natumiyavo kaliva ke vevine ina falofisai, yami tubulakata vewala ina itadi, kaduwe kaliva lakaidiyavo ina avaita.

¹⁸ E, tova-nai wagaine Aluwaluwaku kaduwe gana biwana yaku togugaiyavo kaliva ke vevine wagaidiya, ada ina falofisai.

¹⁹⁻²⁰ Ada gugai ebameyasidobodobo aimo gana vewala gabameya, kauwana gina yuyuvana ke vaikoi gina yabelina anafaiweya

dayaga. Kaduwe iyaiyaya lakaidi babiya gana seyegemonena, dayaga ke ai alalata kaduwe siyo badobadona. Aku muliya KAUYEYA yana yadayada lakaina gina yegemona, ani vevonayavuga anatova matamatausina.

²¹ Aku badi moyaidi gavega KAUYEYA ina veolena adikibababala faina ani gina kibababaledi.' " †

Ida Yaubada yana vona bana Iyoweli givetokilumina ani bana Pita giifufuyena.

²² Kaduwe Pita givona, "Imi meIsileli, yaku vona taidei wana nogalina. Yeisu kwana Nasaledi ani Yaubada Banae toyogina givelena ke gugai toyogina ada iyaiyaya lakaina gigugaiyedi amimwatuguya.† Taidei gaitoma-dina imi tau-miyavo waitadi ke waalamanedi, ada taidei wagaine Yaubada givewale-dewedewemi vaita Yeisu giimilina.

²³ Taine Yeisu-nai Banae ani tuwai-moena Yaubada Tauna giveimeya ke imi nimamiya gina awaegena, e ada gialamane-vagaina. Taidei kaliva-nai waluvealikana, faina badi tokoyona waveledi ke nimadiya itutuvefosena kelose wagaine.†

²⁴ Imi Yeisu waluvealikana, aku Yaubada alika anauloulolo giluyavuledi ke alikeya gisiveyawana, faina keke meyameyaganina alika yana toyogina Yeisu gina kiveyabi-vagai.†

²⁵ Anafaiweya tuwai-moena Deivida Yeisu

† **2:21** Iyol 2:28-32 † **2:22** Iyo 3:2 † **2:23** Mad 27:35, Mak 15:24, Luk 23:33, Iyo 19:18 † **2:24** Mad 28:5-6, Mak 16:6, Luk 24:5

faine givonaye-vagaina, givona,

'Iya gaalamanena tova moyaina KAUYEYA
wagaikuya gimiyamiya.

Banae lilivakuya gimiyamiya faina,
aseaseku keke gina akolukolu.

²⁶ Taidei faina nuwaku giveiwaka,
kaduwe wa yaku vemwamwala gaifuifufu.
Aimo vovoku didikuleya gina daudau
aku wa yaku nuwavetumagana
 gana miyamiya,

²⁷ faina bademowa gaalamanena Iya keke
toalika yadi fafaliya unasege-vagai.

Kaduwe Iya ya Kaliva Tabutabuku ani keke
vovoku una awaege ayo gina abudali.

²⁸ Yawai-vagata anawai bademowa uve-
waleku, ada
Oye Iya nodi kana miyami faina,
gana vemwamwala lakaina.' "†

²⁹ Ada kaduwe Pita givona, "Tubuiyakuweyavo,
gana vonemi velemono, tamada nagona Kini
Devida tuwaina gialika ada vovona isena
didikula luwa wagaine,† ada anadidikula-nai
ani malinai wagaideya aimo gimiyamiya.

³⁰ Aku bana Devida ani falofita, ada gialama-
nena Yaubada bademowa bana wagaine givon-
adabadaba toyogina vaita aimo Devida tauna
yana tubudelideli seyana, ani Yaubada ginasena
gina vekini ke gina vetoga Devida yana veimeya
anaebavetoga kaikaiwabuna wagaine.†

† 2:28 Sam 16:8-11 † 2:29 1Kin 2:10, Gug 13:36 † 2:30 Sam
132:11

31 Deivida gimadu alamanena Keliso yana yawa-vagila alikeya, taidei faina gimaduvonayena, givona, 'Yaubada keke Banae toalika yadi fafali wagaine ginasege-vagai, ada vovona keke gina abudali.'†

32 Taine Yeisu-nai Yaubada bademowa alikeya gisiveyawana, ada ime moyaima taumeyavo matameya aitana ke aawatalatalainena.

33 Yaubada gisiveyawana ke aiyatagine giveiotona.† Ada Tamana Aluwaluwa Tabuna givelena tuwaina givonadabadabayena anafaiweya. E ada malinai Yeisu Aluwaluwa Tabuna gibiwana† e ada ida gaitoma-dina waitaitana ke wanoganogalina.

34 Deivida yana vona ani keke tauna faine gidavona, faina banae keke gidalaka gabameya Yeisu anafaiweya. Aku givona,

'Banae KAUYEYA Yaubada givona yaku Kauveya wagaine,

"Aiyatagikuya** una vetoga analaba

35 nibaimomo gana seobuyedi

ada yadi toyogina gina avaina velemonoena."†

36 Taidei faina imi meIsileli moyaimi ani wana alamane-dewedewena, Banae Yeisu-nai wakivebolagalagana ani Yaubada gisena Kauveya, ada kaduwe Banae Keliso." Taidei anafaiweya Pita gilumamala.

† 2:31 Sam 16:10

Gug 1:4,8, 7:55-56

wa anavemoimoina.

† 2:33 Gug 7:55-56, 1Pi 3:22

**

2:34 Kini aiyatagine ani ebavetoga

† 2:35 Sam 110:1

³⁷ Ada tova-nai kaliva vona taidei inogalina, aseasedi gionana, e ada itolidadana Pita ke afositolo velugadiyavo wagaidiya ivona, “Tubuiyameyavo, gavana anagai?”

³⁸ Ada Pita givonedi, “Imi seyana seyana yami gugai koyodi wana segedi ke wana nuwawilana, ada Yeisu Keliso anayeganeya wana babitaiso ke Yaubada yami koyona gina venuwaegedi.† Ada Aluwaluwa Tabuna wana nuwagana, Bana adanuwakabubu.

³⁹ Faina Yaubada givonadabadaba Aluwaluwa Tabuna gina awaegena imi faimiya ke natumiyavo faidiya, ada kaduwe badi gavega atuwadeya imiyamiya faidiya. Ada gavega moyaidi Yaubada gina douwedi ke Bana wagaine inaelai, tainei badi wagaidiya gina awaegena.”†

⁴⁰ Ada Pita vona moyaina wagaine giawatalalainedi ke kaduwe giveoledi toyogina, givonaga, “Imiyavo ani tova malinai anayoo koyodiyavo adimwatuguya wamiyamiya, e ada wana itaveyabimi. Yaubada wana veoveolena ke gina kibababalemi badi wagaidiya-deya.”

⁴¹ E ada badi gavega Pita yana vona ivetumaganena ani ibabitaiso ke tovetumagana adiyoo wagaine iluku. Ada taine yadayada-nai wagaine biyavo-dina ibabitaiso ani adiyoo teli tausani (3,000) anafaiweya.

Tovetumagana yadi miyami kaduwe yadi dewa faina.

⁴² Ada tova moyaina tovetumagana iawaawaegedi afositoloyavo yadi vewala

† 2:38 Gug 16:30-33 † 2:39 Efes 2:12-13,17

wagaina ada ivetubuiyana velemonoena, kaduwe ivagavagauta ke nodi ikanikani, ada iveoveola aigaigabu Yaubada wagaina.

⁴³ Ada afositoloyavo gugai ebameyasidobodobo ke iyaiyaya lakaidi igugugaiyedi, e ada moyaidi Yaubada yana toyogina iitana wagaina wa yadi matauta ivemoimoinena.

⁴⁴ Kaduwe tovetumagana moyaidi imiyamiyav-agauta ke yadi nuwanuwa seya-moena wagaina yadi giba ivutuvutuga taudiyavo wagaidiya.

⁴⁵ Anafaiweya tova ke tova yadi babi ke yadi giba ina vekimoneyedi aku mani ina vaina ada ina vutugedi badi gavega ivemaufu wagaidiya.[†]

⁴⁶ Ada yadayada seyana seyana nodi imiyamiyavagauta manuwa tabu wagaina. Kaduwe taudiyavo yadi manuweya aa ikiineinena Yeisu anaebanuwaududu faina ke wa yadi vemwamwala ikanikani aigaigabu.

⁴⁷ Ada tova moyaina Yaubada iawadavada-vana, kaduwe kaliva moyaidi tovetumagana iawaveiwakanedi. Ada yadayada seyana seyana adiyoo giveiveinala, faina gavega Kauveya gik-ibababaledi ani giseselukuwedi adiyoo wagaina.

3

Pita tovefela gikiveiwakanena.

¹ Tova seyana wagaina Pita ke Iyoni inaunau manuwa tabu wagaina aku bademowa au gien-ovilana kauwana teli kiloki anafaiweya, tainei veoveola anatova.

² Ada badi iyegeyegemona aku kaliva seyana inana kamodiya gitubuga felafelana, ani

[†] 2:45 Gug 4:32-35

manuwa tabu anaebaluku wagaine iwaiwaina. E, ebaluku-nai ivewagana Ebaluku Anaita Iwakana. Ada yadayada seyana seyana tofefela-nai iwaiwaina, ada wadedeku isesena ke badi manuwa tabu anatoluku wagaidiya mani faina giveoveola.

³ Ada Pita ke Iyoni idaluku manuwa tabu wagaine ani giitadi, ada wagaidiya mani faina giveola.

⁴ Ada Pita ke Iyoni tofefela-nai iitavutuvutuna aku Pita givonena, “Una itama.”

⁵ Ada tofefela giitaitadi aku ginuwavetu-magana vaita gavana tamo gina nuwagana wagaidiya-deya.

⁶ Aku Pita givona, “Keke tamo mani wagaikuya, aku gavana wagaikuya ani gana veleni. Yeisu Keliso kwana Nasaledi anayeganeya, una mididi una nudadana.”

⁷ Ada nimana aiyatagine giabi gisivemididina, ke maduga-mowa agena matatabuna itoyogina.

⁸ Ada gimadumididi-mowa ke givebutu gin-unudadana. Ada nodi iluku manuwa tabu wagaine aku bana gimadutowatowavila aku Yaubada giawadavadavana.

⁹ Ada kaliva moyaidi iitana ginunudadana ke Yaubada giawadavadavana,

¹⁰ ada iitainanana banae tofefela-nai tova moyaina manuwa tabu anaEbaluku Anaita Iwakana wagaine givetovetoga aku giawaveoveola. Ada au moyaidi itataweyana ke meyadi gisidobodobona yana veiwaka faina.

Pita yoo manuwa tabu wagaine gilumamaledi.

¹¹ Ada imiyamiya manuwu tabu anafafali ivewagana Solomoni Yana Ebamiyami wagaine aku aimo kaliva-nai Pita ke Iyoni nimadi gi-abiabina. Ada kaliva moyaidi meyadi gisido-bodobona ke imadu ielai wagaidiya.

¹² Ada tova-nai Pita yoo giitadi, givoned, “Imi meIsileli, gavana vuvuna taidei giveyaulovogimi? Gavana faina waitavutuvu-tuma vaita taumeyavo yama toyogineya o kai yama yegayeganeya Yaubada matane kaliva taidei ada kiveiwakane ke gida nunudadana? Keke taidei anafaiweya wana nuwanuwa.

¹³ Aku tamadeyavo nagona yadi Yaubada, badi Ebelaamo, Aisake, ke Iyakobo yadi Yaubada,[†] Banae-nai taidei gaitoma-nai gigugaiyena e ada yana togugai Yeisu anayegana gina kilakaina. Taine Yeisu-nai waawaididiyena ke Pailato nimane wasena gina luvealikana. Pailato nuwanuwana gina etoyavuna aku imi wadibusoyogena.

¹⁴ Banae Tabutabuna kadu Toyegayegana ani imi wadibusoyogena, aku Pailato waveolena ke banae toluvealika gina etoyavuna wagaimiya.[†]

¹⁵ Ada taidei anafaiweya Banae yawai vuvuna ani waluvealikana, aku Yaubada alikeya gisiveyawana. Ada yana yawa-vagila ime ana-toitavedama.

¹⁶ Ada au Yeisu anayegana faina, Banae anayeganeya avetumagana faina, taidei kaliva waitana kaduwe waalamanena ani gitoyogina. Yana veiwaka moyaimi matamiya vuvuna ani

[†] **3:13** Iyeg 3:15 [†] **3:14** Mad 27:15-23, Mak 15:6-14, Luk 23:13-23, Iyo 19:12-15

vetumagana Yeisu anayeganeya. Taidei wagaine tovefela-nai giveiwaka velemono.

¹⁷ “E aku tubuiyakuweyavo, Iya gaalamanena gavaiyamu Yeisu wagaine imiyavo ke yami tonagonayavo wadewa ani keke nuwami gidamali-dewedewe.†

¹⁸ Aku tuwai-moena Yaubada yana falofita moyaidi awadiya gimadu vonayena vaita Keliso gina uloulolo.† E ada imi yami dewa-nai wagaine Yaubada Tauna yana vona-nai giluveyegemonina velemono.

¹⁹ Taidei faina yami dewa koyodi wana segedi aku Yaubada wagaine wana miyavilami e ada yami koyona gina venuwaegedi.

²⁰ Kai taidei anafaiweya wana gugai, aga kaliva faleda wagaine meyana gina kivebikana anafaiweya, Yaubada Banae aseasemi gina kikivebikana ke toyogina wana nuwagana. Ada kaduwe gina imilina Mesaiya, Banae bademowa givenuwadadanena imi faimiya, ani Banae Yeisu.

²¹ Yeisu bademowa gilaka gabameya ada wadedeku-deya gina miyamiya analaba gavatoveya Yaubada gaitoma moyaina babiya gina kiveevaguna, anafaiweya tuwaina yana falofita tabutabudiyavo imadu awamogatalena.

²² Anafaiweya nagona Mosese givona,

‘Yaubada yami KAUYEYA aimo imi faimiya

† **3:17** Luk 23:34 † **3:18** 2Sam 7:12-16, Sam 22:1,7-8,16-18, 69:21; Ais 7:14, 9:6, 50:6, 52:13-15, 53:1-12, 61:1, Iyel 23:5-6, Dan 7:13-14, 9:24-27, Mai 5:2, Sek 6:12, 9:9, 12:10, 13:7, Luk 24:27, Gug 13:27

falofita seyana gina vemididina Iya anafaiweya.

Banae taumiyavo yami yoo wagaidiya-deya.
Ada gaitoma moyaina wagaidiya
gina veimeyemi ani wana idibumwaigena.

²³ Aku badi gavega falofita-nai yana vona
keke ina nogali,
badiyavo Yaubada gina luyavuledi yana yoo
wagaidiya.'

Taidei anafaiweya Mosese givona.**

²⁴ "Tuwai-moena Samuwela wagaine-deya ada
gielai falofita matatabudi wagaidiya, gavaiyei
ifalofisai ani badi kaduwe iawatalatalaina mali-
nai anatova faina.

²⁵ Ada Yaubada yana falofita awadiya ide
faideya givonadabadaba, ada Yaubada ani
tuwaina tamadeyavo nagona wagaidiya yana
veyavo anawai gisena ani keke taudiyavo gaga
faidiya aku kaduwe ide faideya. Ebelaamo
wagaine givona, 'Kaliva seyana ya tubudelideli
wagaine gina yegemona, ada kaliva moyaidi babi
matatabuna wagaine gana awanuwakabubuyedi
Banae wagaine.' †Taidei anafaiweya Yaubada
givona.

²⁶ E ada Yaubada yana togugai Yeisu alikeya
gisiveyawana ada nagona ide meIsileli moyaida
wagaideya giimilina. Faina nuwanuwana yana
nuwadogeya gina lemelemeda e ada ide moyaida
kana nuwawilana yada gugai koyodi wagaidiya."

** **3:23** Nagona Mosese givona anafaiweya ada bademowa
Yaubada falofita-nai giimilina, Banae Yeisu. (2Vei 18:15,18-19)

† **3:25** Eba 22:18, Gal 3:8

4

Pita ke Iyoni meIsileli yadi Kaniselayavo wagaidiya ivevonayavugidi.

¹ Ada Pita ke Iyoni aimo kaliva wagaidiya iifufu aku yoo tufona ielai wagaidiya, badiyavo Yaubada yana veyavo anatovegugaiyavo, ke manuwu tabu anatoyavagayavo aditonagona ada kaduwe Sadusiyavo.**

² Badiyavo inuwakoyo faina badi adiselu kaliva ivewavewaledi vaita Yaubada Yeisu alikeya gisiveyawana anafaiweya, kaduwe toalika Yaubada gina siveyawadi alikeya.

³ E ada ikiveyabidi aku mala bademowa givelavilavi faina, deli wagaine isedi aku mala ginalavu-yo ina vevonayavugidi.†

⁴ Aku kaliva moyaidi Pita ke Iyoni yadi laumamala inogalina ke ivetumaganena, ada tovetumagana adiyoo gitubuga faifi tausani (5,000) anafaiweya.**

⁵ Mala gilavuna meIsileli aditoveimeyayavo ke kaliva lakaidiyavo kaduwe Mosese yana veimeya anatovewalayavo Yelusalema wagaine ivagauta.

⁶ Ada veyavo anatovegugai aditonagona Anasi ke kaduwe Kaiyafasi, Iyoni ke Alekisanida nodi

** **4:1** Sadusiyavo yadi vewala taidei anafaiweya. Keke ida vetumagana vaita aneloseyavo kai aluwaluwa imiyami, kadu keke ida vetumagana vaita yawa-vagila aimo gina yegemona.

† **4:3** Luk 21:12 ** **4:4** Naba-nai faifi tausani (5,000) ani kaliva gaga iveyawadi. Aku kaduwe kaliva-dina ani wa vavinediyavo ke wa natudiyavo nodi imiyamiya yoo-nai wagaine, e ada badi Yeisu ivetumaganena ani keke faifi tausani (5,000) gagana aku moyai-moedi.

wadedeku-deya, ada kaduwe veyavo anatovegugai aditonagona yana gabu kaliva-dina nodi ivagauta.

⁷ Ada Pita ke Iyoni matadiya ivemidididi aku itolidadanedi, ivona, “Gaito yana toyogineya o kai gaito anayeganeya gugai taidei anafaiweya wagugaiye?”

⁸ Aku Pita Aluwaluwa Tabuna wagaine magamagana,[†] ada givonedi, givona, “Imi toveimeyayavo ada kaliva lakaimiyavo,

⁹ malinai wavagaulema vonayavuga taidei wagaine ada watolidadanema gugai iwakana agugaiyena tovefela wagaine faina. Ada kaduwe watolidadanema gavaiyamu giveiwaka.

¹⁰ E ada imiyavo kaduwe meIsileli moyaimi, gana kivemalimi ke wana alamanena. Banae Yeisu Keliso kwana Nasaledi anayeganeya ada yana toyogineya ani tovefela taidei giveiwaka, e ada matamiya gimidimididi. Yeisu Banae imi wakivebolagalagana aku Yaubada alikeya gisiveyawa-vagilena.

¹¹ Banae-nai faine vona matalivulivuna seyana Buki Tabu wagaine givona,

‘Ogola-nai imi manuwa anatoiyogona
wadibusoyogena,
ani Banae gimidinagona ogola moyaidi.’ [†]

¹² Yeisu Banae anakaibe wagaine kibababala kana nuwagana. Faina keke tamo gaito babiya gida miyami ani Yaubada gida venuwadadane ke

[†] 4:8 Mad 10:19-20 [†] 4:11 Sam 118:22, 1Pi 2:7

banae anayeganeya ide kaliva kibababala adafaiweya kana nuwaga.” † Taidei anafaiweya Pita givoned.

¹³ Aku meIsileli yadi Kaniselayavo** ani Pita ke Iyoni yadi asevatu iitana wagaine, meyadi gibovu. Faina ialamanena taidei kaliva-dina keke ida sikulu, badi kaliva-kavovodi. Aku nuwadi giamutuna tuwaina badi Yeisu nodi.

¹⁴ Aku iitana tovefela-nai bademowa giveiwaka ani adiselu lilivadiya gimidimididi, e ada keke adifaiweya kaduwe gavana tamo inavone.

¹⁵ Au iveimeyedi ke ebavevonayavuga anafafali wagaine ina midiyegemona. Badi kaliva imidiyegemona ada Kaniselayavo ivebutu ke taudiyavo iveifuifufu, ivona,

¹⁶ “Gavana kanagai kaliva taidei wagaidiya? Faina kaliva moyaidi Yelusalema wagaine bademowa ialamanena gugai ebameyasidobodobo igugaiyena, ada ide keke adafaiweya kana veweye.

¹⁷ Aku kada vonediga, ‘Keke tamo kaduwe gaito seyana wagaine wana ifuifufu Yeisu anayeganeya.’ Taidei anafaiweya kada awatadi e ada valeyana-nai keke gina mutula kaliva moyai-moedi wagaidiya.”

¹⁸ Ada iveifuifufu giavaina, Pita ke Iyoni idouwe-vagiledi iluku ke iveimeyedi, ivona, “Keke-mowa maita kaduwe Yeisu anayeganeya wana ifuifufu o wana vewala.”

† 4:12 Iyo 14:6 ** 4:13 Kanisela-dina ani meIsileli yadi Kaniselayavo lakaidi, ke anayoo seveniti (70) anafaiweya.

¹⁹ Taidei anafaiweya iveimeyedi aku badi Pita ke Iyoni ilufata, ivona, “Gavana iwakana Yaubada matane, kai imi ana matawalewaleyemi o kai Yaubada ana matawalewaleyena? Imi taumiyavo wana venuwadadanena,

²⁰ faina ime keke amafaiweya ana ilova. Au gavana Yeisu yana gugai aitana ke yana vona anogalina ani ana ifuifufuyena.”

²¹ Idamamauwe adiselu ivona e ada Kaniselayavo kaduwe iawavematausidi aku au iawaegedi inau. Gavaiyamu ina vematavulogidi ani faine inuwanuwa-wayoga. Yoo imatausedi e ada keke adifaiweya, faina gaitoma-nai giyegemona ani kaliva iitana e ada moyai-moedi Yaubada iawadavadavana.

²² Faina tovefela-nai gugai ebameyasido-bodobo wagaine giveiwaka ani banae keke tubulakaina, anamalamala foti (40) wa tufona.

Tovetumagana iveoveola asevatu faina.

²³ Tova-nai Pita ke Iyoni Kaniselayavo isegedi aku yadi yoo wagaidiya iyewadi, ada veyavo anatovegugai lakaidiyavo ke kaliva lakaidiyavo gavaiyamu ivonedi ani mamauwe iifufuyedi.

²⁴ Ada badi tovetumagana inogalina ke moyaidi Yaubada wagaine iveoveola aigaigabu, ivona, “Oye Toveimeya. Gabama, babi, ke leyaga, ada kaduwe gaitoma moyaidi wagaidiya imiyamiya ani O ububudi.

²⁵ Tuwai-moena Aluwaluwa Tabuna ya vona giseyegemonina ya togugai tamama Deivida awane, givona,

‘Gavana faina badi keke meIsileli
inuwakoyo-mowa?

Gavana faina yadi veimeya koyona ibubu-
wayogedi?

²⁶ Babi anakiniyavo ikidewadewa ada
toveimeyayavo
nodi ivagauta ke Yaubada ada Banae yana
Mesaiya^{**} ina lugaviyadi.’[†]

²⁷ Ada toveimeya yadi nuwakoyo malinai
giyegemona velemoena anafaiweya givonayena.
Faina Kini Elodi ke Ponitiyo Pailato ani meIsileli
ada badi keke meIsileli nodi ivagauta Yelusalema
wagaine ada iveimeya aigaigabu ke Yeisu
ina luvealikana, Banae ya togugai tabutabuna
uvenuwadadanena ke utoyogivelena ya faisewa
faine.[†]

²⁸ Ada igugaiyena anafaiweya tuwai-moena
uvenuwadadanena,[†] Oye ya toyogina ke ya
veimeya wagaine ada giyegemona anafaiweya.

²⁹ E ada Kauveya, badi Kaniselayavo iawave-
matauta wagaimeya ani O unogalina. E ada
ime ya togugaiyavo una kivetoyogima ke wa yama
asevatu ya vona ana lumamalena.

^{**} **4:26** Vewaga-nai Mesaiya ani vona Ibeliu, ada anakivila ani
Venuvenuwadadanina. Tuwai-moena tova-nai Yaubada meIsileli
yadi kini ginasena, nagona yana falofita seyana anaveimeya
gina velen, e ada banae gina mididi ginanau banae-nai Yaubada
givenuwadadanena ada bunama gina iwavekelolona kuluwane.
Taidei wagaine banae gina alamanena Yaubada givenuwadada-
nena ada kaduwe, Yaubada Aluwaluwana yana toyogina wagaine
gina lemelemena. (1Sam 9:15 ke ginau 10:1) [†] **4:26** Sam 2:1-2
[†] **4:27** Mad 27:1-2, Mak 15:1, Luk 23:1-11, Iyo 18:28-30 [†] **4:28**
Gug 2:23

³⁰ Ime ana lulumamala aku Oye nima una tunena toveoga wagaidiya ke ina veiwaka, ada iyaiyaya lakaidi ke gugai ebameyasidobodobo una gugaiyedi ya togugai tabutabuna Yeisu anayeganeya.”

³¹ Ada iveoveola giavaina, manuwa-nai wagaine ivagauta ani gialiuuuna. Kaduwe Aluwaluwa Tabuna moyaidi givemagadi† ada Yaubada yana vona wa yadi asevalu ilumamalenauwena.

Tovetumagana yadi lokoloko taudiyavo wagaidiya ivutuvutugena.

³² Aku tovetumagana moyaidi yadi nuwanuwa seya-moena. Keke tamo gaito seyana gidavona, “Yaku lokoloko akukaibe faikuya.” Au yadi lokoloko ivutuvutugedi taudiyavo wagaidiya.†

³³ Badi afositolo wa yadi toyogina Kauveya Yeisu yana yawa-vagila alikaya faina iawatalalaina, ada Yaubada yana nuwadoga lakaina moyaidi wagaidiya.

³⁴ Ada tovetumagana moyaidi wagaidiya ani keke tamo gaito fanifanina gida miyami, faina tova ke tova badi gavega wa yadi babi o wa yadi manuwa ani ivekivekimoneyedi, ada manidi ivaivaina ani

³⁵ ialialiyedi afositoloyavo iveleveledi. Ada afositolo ivutuvutugena badiyavo gavega adiga o kai yadi lokoloko keke wagaidiya.†

³⁶ Ada Iyosefa, banae Livai unumina anakaliva, taidei anafaiweya gidewa. Bana yana melala ani

† 4:31 Gug 2:4 † 4:32 Gug 2:44-45 † 4:35 Gug 2:45

imula anayegana Saifilasi wagaine. Badi afositol kaliva-nai ivewagana Banabasi,[†] anayegana anakivila 'tokiveasevatu'.

³⁷ Ani Banabasi-nai yana babi seyana givekimoneyena, ada babi manina givaina ani giali-yena afositoloyavo giveledi.

5

Ananaiyasi vavinena Safaila nodi ifuifufudi.

¹ Aku kaliva seyana gimiyamiya anayegana Ananaiyasi, ada vavinena adiyegana Safaila. Banae yadi babi seyana givekimoneyena.

² Ada babi-nai fatana tufona giseyewena tauna faine aku tufona giali-yena afositoloyavo wagaidiya, aku givonedi vaita mani matatabuna gida aliye-yabu. Aku fatana tufona giseyewena ani badi vavinena ialamanena.

³ Ada Pita givonena, givona, "Ananaiyasi, gavana faina Seitani uawaage ayo nuwaniya giluku, e ada Aluwaluwa Tabuna wagaine ufwaya vaita babi fatana matatabuna uda aliye-yabu, aku keke. Tufona tauni fainiya useyewena.

⁴ Aimo babi-nai keke uda vekimoneye wagaine, ina tauni ya babi. Ada kaduwe bade uvekimoneyena wagaine, babi fatana uvaina ani aimo ya veimeya wagaine. E aku gavana faina nuwainageniya fwaya ufaisewa ayo uvona vaita mani matatabuna udavele-yabuma? Keke kaliva gaga wagaimoya uda fwaya aku kaduwe Yaubada wagaine ufwaya."

[†] 4:36 Gug 11:22-26, 13:2-3

⁵ Ada Pita yana vona Ananaiyasi ginogalina wagaine, gibeu ada gialika. Ada badiyavo gavega valeyana inogalina ani imatauta lakaina.

⁶ E ayo tubulakata imididi vovona ikiwafina ke iwai inauwe itavuna.

⁷ Kauwana ginau anabai toiye muliya, vavina ielai ada iluku manuwana-nai wagaine. Aku gavana giyegemona moganedi wagaine ani keke ida alamane.

⁸ Ada Pita givonedi, “Wana voneku, taidei anafaiweya mani anatubuga-nai yami babi fatana moganemi nodi wavaina?”

Ada badi ivonaga, “Ika, babi fatana tainei anafaiweya.”

⁹ Ada Pita givonedi, “Gavana faina imi moganemi nodi wanuwanuwa vaita amifaiweya Kauveya Aluwaluwana wagaine wana fwaya ke wana itana kai fwaya fatana wana nuwagana o kai keke? Wana itana, badi kaliva-dina moganemi itavuna ani edawaneya iyegemo, ada imi kaduwe ina waimi ina nauwemi.”

¹⁰ Ada maduga-mowa Safaila Pita agene ibeu ke ialika. Ada tubulakata iluku ke iitadi vavine bademowa ialika, e ada iwaidi inauwedi moganedi lilivane itavudi.

¹¹ Ada tovetumagana adiyoo matatabuna ke kaduwe badi gavega valeyadi inogalina ani imatauta lakaina.

Afositoloyavo gugai ebameyasidobodobo igugaiyedi.

¹² Aku afositoloyavo nimadiya Yaubada gugai lakaidi ke gugai ebameyasidobodobo moyaidi gigugugaiyedi kaliva adimwatuguya.† Ada badi tovetumagana moyaidi ani ivagavagauta manuwa tabu anafafali-nai wagaine ivewagana Solomoni Yana Ebamiyami.

¹³ Kaliva moyaidi ani tovetumagana iawavei-wakanedi, aku keke nodi ida vagavagauta faina imatauta.

¹⁴ Aku tova tova kaliva ke vevine ivetumagana Kauveya wagaine ani tovetumagana adiyoo wagaine ilukuluku.

¹⁵ Ada kaduwe, kaliva yadi toveoga wa vayadi o wa sitadi iwaidi inaunauwedi wai wagaidiya iseseobuyedi. Faina inuwavetumagana vaita Pita gina nugulidi wagaine, kai anununa toveoga tufodi gina aiwautagodi ke ina veiwaka.

¹⁶ Kaduwe kaliva moyaidi melala Yelusalema anafafali lilivane wagaidiya-deya ielai Yelusalema, yadi toveoga kadu badi aluwaluwa bwanebwanebani ikivekoyodi ani ialiyedi. Ada moyaidi iveiwaka-yabu.†

MeIsileli aditonagonayavo afositolo ikiveuloulolonidi.

¹⁷ Aku bana veyavo anatovegugai aditonagona kaduwe tubuiyanavo moyaidi nodi badi yoo-dina ivewagadi Sadusi, ani iveumagigi-mowa afositoloyavo wagaidiya,

¹⁸ e ada inau afositolo ikiveyabidi ada deli wagaine isedi.†

† 5:12 Gug 14:3 † 5:16 Mak 6:56, Gug 19:11-12 † 5:18 Gug 4:1-3

¹⁹ Aku boginafa KAUYEYA yana anelose gielai ke deli anawana giyavuna aku afositolo giveyege-monidi.[†]

²⁰ Ada givonedi, givona, “Wananau manuwa tabu wagaine wana mididi ada kaliva wagaidiya wana ifufuye-yabuna yawai evaguna taidei faina.”

²¹ Ada anelose giveimeyedi anafaiweya inau, ada mala gilavuna manuwa tabu anafafali seyana wagaine iluku ke ivebutu ivewala.

Aku bana veyavo anatovegugai aditonagona ada tubuiyanavo nodi ielai ke meIsileli yadi Kanisela idouwevagauwidi, e ada badiyavo ke meIsileli aditonagonayavo moyaidi ivagauta. Tova-nai ivagauta-yabu, manuwa tabu anafilisimani iimilidi inau deli wagaine ke afositolo ina aliyedi.

²² Aku filisimaniyavo inau deli wagaine ani afositolo badi keke. E ada Kanisela wagaidiya iyewadi ada imatawedi, ivona,

²³ “Deli wagaine anau, wana falifalidi ke toyogidi aitadi, kaduwe wana anatoitaveyabina imidimididi edawaneya. Aku wana ayavuna wagaine, keke tamo gaito tutulagolota-nai negenine gida miyami!”

²⁴ Ada manuwa tabu anafilisimani aditonagona ke veyavo anatovegugai lakaidiyavo ani filisimaniyavo yadi vona inogalina wagaine, nuwadi givoganina ke inuwanuwa, “Taidei gavana aimo gina yegemona?”

²⁵ Inuwanuwa ani, kaliva seyana giela givonedi, givonaga, “Wana nogalina! Badi kaliva-

[†] 5:19 Gug 12:7-10

dina deli wagaine wasedi ani manuwa tabu wagaine imidimididi aku kaliva ivewavewaledi!"

²⁶ Ada filisimani aditonagona yana kalivayavo nodi inau ada afositolo ivagauledi aku keke ida munudi, faina imatauta kai yoo kabaleya ina tutuvealikadi.

²⁷ Ada tova-nai iyegemona ke afositolo ilukuwedi, Kanisela matadiya ivemidididi ke veyavo anatovegugai aditonagona gina toliluveluvedi.

²⁸ Ada bana givonedi, givona, "Ime awata toyogina wagaimiya asena, ani taidei kaliva-nai keke-mowa maita anayeganeya wana veviewala. Aku yami vewala wanauwena-deya ke ginau Yelusalema matatabuna giluyabuna. Ada kaduwe, nuwanuwami taidei kaliva-nai yana alika anavita ime wagaimeya wanasena!"†

²⁹ Aku Pita ada afositolo velugadiyavo ani Kaniselayavo ivonedi, ivona, "Ime keke kaliva ana matawalewaleyedi aku nagona Yaubada ana matawalewaleyena.†

³⁰ Banae Yaubada, tamadeyavo nagona yadi Yaubada ani Yeisu alikeya gisiveyawana, Banae imi ai wagaine watutuvefosena ada waluvealikana.

³¹ E, Yaubada gisiveyawana ke aiyatagine gisena,† ada bana adaToveimeya Lakaina ke kaduwe adaTokibababala. Tokibababala gisena ke Banae ide meIsileli gina lemeda ke kana nuwavilana ada yada koyona gina venuwaegedi.

† 5:28 Mad 27:25 † 5:29 Gug 4:17-20 † 5:31 Efes 1:20, Ibel 12:2

³² Ada ime yana alika ke yana yawa-vagila ana-toitavedama,[†] ime kaduwe Aluwaluwa Tabuna nodi,[†] Banae ani Yaubada givelena badi gavega bonana ivenogalena ani wagaidiya.” Taidei anafaiweya afositolo ivona.

Gamaliyeli afositolo giyavadi.

³³ Aku badi Kanisela vona taidei inogalina ayo inuwakoyo-mowa, ada nuwanuwadi afositolo ina luvealikadi.

³⁴ Aku kaliva seyana Kanisela wagaidiya-deya anayegana Gamaliyeli, banae kaliva-nai Falisi anayoo** ke veimeya anatovewala, ada kaduwe kaliva moyaidi ivemoimoinena. E ani banae adimwatuguya gimididi giveimeya ke afositolo ina veyegemonidi wamelaleya tova maufona wagaine.

³⁵ Afositolo iyegemona aku bana Gamaliyeli givebutu Kanisela wagaidiya giifufu, givona, “Imi meIsileli, wana nuwanuwa-dewadewa gavana wanagai taidei kaliva-dina wagaidiya.

³⁶ Faina malamala gavaiyei giavaidi wagaine kaliva seyana giyegemona anayegana Teudasi. Banae givona vaita bana tonagona lakaina, ada kaliva adiyoo fowa analedi (400) anafaiweya imuliyena. Aku muliya iluvealikana, ada anato-muliyayavo iawala ke yana veimeya matatabuna giavaina.

[†] 5:32 Luk 24:48 [†] 5:32 Iyo 15:26,27, Gug 15:28, Ibel 2:4, 1Iyo 5:7 ** 5:34 Falisiyavo yadi vewala taidei anafaiweya. Yaubada yana veimeya imuliyede-dewedewena, ada kaduwe aneloseyavo, aluwaluwa, ada yawa-vagila ivetumaganedi.

³⁷ Kaduwe muliya kabemali yadi tova yegana yaudi anatoveya, kaliva seyana giyegemona anayegana Yudasa kwana Galili, ada kaduwe kaliva tufodi ginagoyedi. Aku kadu anafaiweya, banae iluvealikana ada anatomuliyayavo nuwadi giabidi ani iawala inau.

³⁸ E ada malinai taidei kaliva-dina faidiya gana vonemi. Auwe wana kisedgedi inanau. Faina kai yadi nuwanuwa ke yadi gugai vuvuna kaliva wagaidiya-deya, aga gina avaina.

³⁹ Aku kai vuvuna Yaubada wagaine, aga keke amifaiweya taidei kaliva-dina wana awatadi, faina wana itanuwigana Yaubada wagaine walulugaviya.” Taidei anafaiweya Gamaliyeli givona ada badi Kaniselayavo yana vona wagaine nuwadi giabidi.

⁴⁰ Ada afositolo idouwe-vagiledi iluku, ada filisimani iveimeyedi ke ilavulavudi. Ada ilavudi giavaina, kaduwe iawatadi ivona, “Auwe wananau, aku keke maita kaduwe Yeisu anayeganeya wana ifuifufu kaliva wagaidiya.” E ada ietoyavudi inau.†

⁴¹ E au afositolo Kanisela isegedi ke wa yadi vemwamwala inau. E, ivemwamwala faina inuwanuwa vaita badi iwakadiyavo Yaubada matane† ke giawaegedi vovomumu ina nuwagana Yeisu anayegana faina.†

⁴² Ada yadayada seyana seyana ivevewala ke ilulumamala ani Yeisu au Yaubada yana Mesaiya. Taidei anafaiweya inunauwena manuwa tabu

† 5:40 Gug 4:18 † 5:41 Mad 5:10-12, 1Pi 4:13-14,16 † 5:41 Iyo 15:21, Gug 9:16, 21:13

wagaina ke kaduwe kaliva yadi manuwa wagaidiya, keke ida ilova.

6

Kaliva adiseveni ivenuwadadanedi ke afositolo ina lemedi.

¹ Ada tayuwe yadayada-dina wagaidiya Yeisu yana tonogala adiyoo giveiveinala. Ada imiyamiya e aku tova seyana badi meya Giliki anatoifufu ani badi meya Ibeliu anatoifufu igavoluvoluyedi. Ivonavona vaita yadayada seyana seyana aa anavutuga wagaine taudiyavo yadi sikwasikwa adivutuga kabisona, aku badi meya Ibeliu anatoifufu ani yadi sikwasikwa adivutuga lakaina.

² E ada afositolo adituwelo tonogala moyaidi idouwevagauwidi ada ivonedi, ivona, “Kai ime aa anavutuga ana itaveyabina aku Yaubada yana vona analaumamala ana ilovena, aga wada keke gida luboda.

³ E ada tubuiyameyavo, kaliva adiseveni wa adivetumagana wana venuwadadanedi amimwatuguya, badi imaga Aluwaluwa Tabuna wagaine ada kaduwe tonuwanuwa velemoedi. E ada aa anavutuvutuga ana veledi ina gugaiyena,

⁴ aku ime taumeyavo ani ana awaegema veove-ola ke Yaubada yana vona analaumamala wagaidiya.”

⁵ Ada tovetumagana matatabudi afositolo yadi ifufu inogalina ada nuwadi givemwamwala. E ada kaliva seyana ivenuwadadanena ani anayegana Sitiveni, banae yana vetumagana

lakaina kaduwe Aluwaluwa Tabuna wagaine gimaga-mowa. Ada kaduwe kaliva tufodi ivenuwadadanedi anafaiweya, adiyegana Filipi, Polokalasi, Naikena, Timoni ke Pamenasi, ada kaduwe Nikolasi kwana Anitiyoki banae keke kwana Isileli aku meIsileli yadi tafalolo wagaine gidamana.

⁶ Ada taidei kaliva-dina afositolo matadiya ivemidididi, ada nimadi isedi seyana seyana waga-diya aku iveoveola faidiya.[†]

⁷ Ada Yaubada yana vona gimutula ginau, ada kaliva moyaidi inogalina ke ivetumaganena. Ada tonogala yadi yoo Yelusalema wagaine giveinala-mowa, kaduwe veyavo anatovegugaiyavo tufona moyaidi valeya iwakana ivetumaganena ada imatawalewaleyena.

MeIsileli aditonagona Sitiveni ikiveyabina.

⁸ Aku banae Sitiveni ani aseasena gimaga Yaubada yana nuwadoga wagaine, kaduwe tova moyaina Yaubada yana toyogina wagaine gimiyamiya faina, gugai ebameyasidobodobo ke iyaiyaya lakaidi gigugugaiyedi kaliva adimwatuguya.

⁹ Aku kaliva tufodi ivenibainena, meIsileli adiyoo seyana. Badi kaliva-dina manuwa ebavewala wagaine ivagavagauta, ada manuwa-nai ivewagana Togugai Etoetoyavugidiyavo Yadi Manuwa Ebavewala. Ada badi meIsileli-dina

[†] 6:6 Gug 13:3

yadi melala adiyegana Sailini kaduwe Alekisani-dia, kaduwe badi meIsileli Silisiya ke Eisiya adifafali wagaidiya ani kaliva-dina ivebutu Sitiveni nodi ivevonavona toyogina.

¹⁰ Aku Aluwaluwa Tabuna nuwauya lakai-vagaina Sitiveni givelena faina,[†] yana vona wagaidiya iveyamata. Keke adifaiweya ina vonalufata.

¹¹ Aku badi meIsileli kaliva tufodi ivonekavuyedi ke ina vonaga, “Bana kaliva-nai anogalina givona awadamana Mosese wagaine, ada kaduwe Yaubada wagaine.”

¹² E ada badi yadi ifufu-nai wagaine,[†] meIsileli yoo ada kaduwe kaliva lakaidiyavo ke veimeya anatovewalayavo ikivenuwakoyodi. E ada Sitiveni ivenibainena ke ina ikiveyabi inauwena meIsileli yadi Kanisela wagaidiya.

¹³ Ada Sitiveni ilukuwena Kaniselayavo wagaidiya, aku kaduwe toveloi nodi ilukuwedi ke bana faine ifwaya ivona, “Bana kaliva-nai tova moyaina yada manuwa tabutabuna ada kaduwe Mosese yana veimeya giawaawavekoyoyedi.

¹⁴ Ime anogalina givona vaita Yeisu Banae kwana Nasaledi manuwa tabu gida yawelina, ada veimeya Mosese yada yoo nagona givedi ke ivesesevedamana wagaideya, ani gida sevedavedamadi aku veimeya evagudi gidasedi.” Taidei anafaiweya Sitiveni iveloina.

¹⁵ Ada kaliva moyaidi ebavevonayavuga anafafali wagaine-deya ani Sitiveni iitavutuvutuna, ada magigina iitana vaita anelose magigina anafaiweya.

[†] 6:10 Luk 21:15 [†] 6:12 Mad 26:59-61

7

Sitiveni giifufu meIsileli yadi Kaniselayavo wa-gaidiya.

¹ Ada veyavo anatovegugai aditonagona Sitiveni gitolidadanena, givona, “Taidei anafaiweya velemonoena uvona o kai keke?”

² Ada Sitiveni gilufata taidei anafaiweya, givona, “Tubuiyakuweyavo ke kaduwe kamakuweyavo, yaku vona wana nogalina. Tova tuwaina wagaine Yaubada wa yana iwakana mamalina giyegemona tamada nagona Ebelaamo wagaine, tova-nai gimiyamiya Mesopotemiya anafafali aku aimo keke gidana melala Elani wagaine gida miyami.

³ Ee, Yaubada giyegemona wagaine ada givonena, givona, ‘Una mididi ada ya fafali, ya kali-vayavo ke ya gabuyavo una madusegedi aku fafali seyana gana vewaleni wagaine unanau.’

⁴ Taidei anafaiweya Yaubada givonena ada Ebelaamo gitauya yana fafali Kalidiya gisegena aku ginau melala-nai anayegana Elani wagaine gimiyamiya.

“Gimiyamiya aku tamana gialika, ada muline taidei fafali-nai wagaine kamiyamiya idedeku ani Yaubada giimili gielai.†

⁵ Taidei fafali-nai wagaine gielai aku keke maita babi gidavele, aku givonadabadabayena vaita taidei babi-nai gina vena, kaduwe aimo anaunumayavo ina tubulalaga wagaidiya gina veledi.† Taidei anafaiweya Yaubada

† 7:4 Eba 12:1-5 † 7:5 Eba 17:8

givonadabadaba aku tova-nai wagaine Ebelaamo natuna keke.

⁶ Kaduwe Yaubada Ebelaamo givonena, 'Aimo ya tubudelideliyavo inanau ina veawawala mali fafali ke atuwadeya, ada wadedeku ina vetogugai yogoyogodi. Ada malamala fowa analedi (400) wagaidiya fafali-nai anatomya ina veimeyedi ke ina luimiilidi gugai vitadi wagaidiya ada yadi miya ina kivevitana.

⁷ Aku fafali-nai anatomya adiyoo wagaidiya ya tubudelideli ina vetogugai yogoyogodi ani aimo gana vematavulogidi. Ada muline ya tubudelideliyavo tayuwe fafali-nai wagaine ina yegemo aku taidei fafali-nai wagaine inaelai ke ina oduodu wagaikuya.' † Taidei anafaiweya Yaubada Ebelaamo wagaine givona.

⁸ Ada muliya Yaubada yana veyavo anawai gisena Ebelaamo wagaine ke giveimeyena anaunumayavo wagaidiya vovodi bubuna ina tomogoloidi yana veyavo anaiyaiyaya faina.** E ada tova-nai Ebelaamo natuna Aisake givetubuna, ada anayadayada eita wagaine iyaiyaya-nai faina vovona bubuna gitomogoloina.† Ada anafaiweya Aisake natuna Iyakobo givetubuna ada vovona bubuna gitomogoloina, ada kaduwe anafaiweya Iyakobo

† 7:7 Eba 15:13-14, Iyeg 3:12 ** 7:8 Giduwa-nai taidei anafaiweya. Kaliva yana gaitoma bubuna bwatana itomogoloina. Iyaiyaya taidei Yaubada Ebelaamo givelena ada kaduwe Mosese, ani seyana ebaita Yaubada yana veyavo yana kalivayavo wagaidiya. Ada Yaubada meIsileli kaliva giveimeyedi matatabudi ina gugaiyena. (Eba 17:9-14, Iyeg 12:48, Luk 1:59 ke anaailabama adiebakivemala) † 7:8 Eba 21:2-7

natunavo kaliva adituwelo vovodi bubudi gitomogoloidi, badi adituwelo tamadeyavo nagona.

⁹ “Aku tamadeyavo-dina ani taidi Iyosefa iveu-magigiyena, e ada mali kaliva wagaidiya iveki-moneyena. Ada badi kaliva-dina Iyosefa in-auwena Itipita wagaine ada givetogugai yogoyogona. Aku Yaubada nodi,

¹⁰ ada anavita moyaina wagaidiya gikibabalena. Ee, nuwauya ada kaduwe yana ve-moimoina Felo meItipita yadi kini matane givelena. Taidei faina Felo fafali Itipita matatabuna anatoveimeya Iyosefa gisena, kaduwe yana manuwa negenine ebaveimeya moyaidi wagaine givelena.

¹¹ “Ebaveimeya givaina muline, loka lakaina giyegemona fafali Itipita ada Kenani** matatabuna wagaidiya, ada moyaidi vita lakaina inuwagana. Badi tamadeyavo adiga keke.

¹² Imiyamiya aku Iyakobo gikaiyanogala vaita aa Itipita wagaine gimiyamiya, e ada natunavo, badi tamadeyavo nagona, ani giimilidi inau Itipita. Yadina nagona wagaine taidi ibavuyena.

¹³ Ada muliya yadina anavelu wagaine Iyosefa tauna giawamogatalena tubuiyanavo wagaidiya vaita banae taidi, ada Felo gikaiyanogala Iyosefa yana gabuyavo faidiya.

¹⁴ E ayo Iyosefa matawa giimilina tamana Iyakobo wagaine ke banae ada yana gabu

** **7:11** Kenani ani fafali-nai wagaine Ebelaamo wa yana gabu nodi imiyamiya. Kenani aku ginau Itipita anafafali wagaine ani anaatuwada kilomita eita analedi foti seveni (847). Malinai Kenani ani meIsileli yadi babi ivewagana ‘Isileli’.

matatabudi ina elai Itipita wagaine ina miyamiya. Adiyoo seveniti faifi (75).

¹⁵ Ada au Iyakobo ginau Itipita wagaine, gina gimiyaamiya anaunumayavo nodi, ada wadedeku-deya banae ke natunavo, badi tamadeyavo nagona, ialika.

¹⁶ Ada aimo vovodi iyewedi melala anayegana Sekemu ke didikula luwa wagaine isedi tuwaina Ebelaamo mani wagaine gikimonena unuma adiyegana Amo ani wagaidiya.

¹⁷ “Malamala bademowa gavaiyei giavaidi aku Yaubada yana vonadabadaba-nai anatova givelilivana gina yegemona velemonoani ani gina vaiyewedi Kenani anafafali wagaine, anafaiweya Ebelaamo wagaine tuwaina givonadabadabayena. Aku tova-nai wagaine yada yoo Itipita wagaine giveinala-mowa.

¹⁸ Ada yoo bademowa giveinala-mowa aku kadu kini seyana evaguna Itipita wagaine yana veimeya givevuvu, aku Iyosefa bademowa tuwaina gialika ani kini-nai keke banae gida alamane.[†]

¹⁹ Banae yada yoo gifwayadi lakaina, ada tamadeyavo gilumiimilidi ke giveimeyedi be-beta evagudiyavo melaleya inasese-kavovodi e ada inami ina alika.[†]

²⁰ “Taidei veimeya-nai anatoveya Mosese gitubuga, kwamana iwakana Yaubada matane. Ada vaikoi toiye wagaidiya inana ke tamana manuweya imiyanena ke iitaveyabina.

[†] 7:18 Iyeg 1:7-8 [†] 7:19 Iyeg 1:9-22

²¹ Vaikoi toiye giavaidi, Mosese inauwe isena melaleya aku Felo natuna vavine ginuwagana ke gisilakaina, ada giawavenatunena vaita tauna natuna anafaiweya.

²² Ada meItipita yadi nuwauya moyaina Mosese ivewale-yabuna, ada yana vona ke yana gugai wagaidiya gitoyogina velemono.

²³ “Aku Mosese anamalamala foti (40) wagaine, ginuwanuwa yana yoo meIsileli gina madubodadi.

²⁴ Ada giobu badi wagaidiya ani giitana kwana Itipita gimunumununa kwana Isileli seyana, e ada gina gikibababalena. Ada kwana Itipita nimana gifatana, ada giluvealikana.

²⁵ Mosese ginuwanuwa vaita yana yoo nuwadi gida malina vaita Yaubada Mosese tauna nimana wagaine gina kibababaledi. Aku badi keke nuwadi gidamali.

²⁶ Yadayada anavelu wagaine Mosese giyegemonidi meIsileli adiselu ivemunumunuga, ada nuwanuwana ina ilovau aku gina veseyana-vagiledi e ada wa yadi nuwaniwalova nodi ina miyamiya. Taidei faina givonedi, givonaga, ‘Imi kaliva wana nogalina. Ina tubuiya nonogana. Gavana faina taumiyavo wavekivekivekoyo?’

²⁷ “Aku bana kaliva-nai nagona gimaduilaavuga ke tubuiyana gilumalimaliwavuna ani banae Mosese giluegena aku givonena, ‘O gaito giseni-yo oyeni uvetoveimeya ke uvetovevonayavuga wagaimeya?’

²⁸ Kai unuwanuwa evona Iya kaduwe una luvealikaku boi kwana Itipita uluvealikana anafaiweya?’

29 Ada Mosese kwana Isileli yana vona ginogalina wagaine, au Itipita gisegena ke giota ginau fafali Midiyani wagaine givekwana awawala. Ada wadedeku-deya ginagi ke kaliva adiselu givetubudi.[†]

30 “Malamala foti giavaina, tova seyana Mosese gimiyamiya Oya Sainai anafafali kavovona wagaine aku anelose giyegemona bana wagaine. Ai kabisona seyana gialalata aku meyana wagaine anelose-nai giyegemona.

31 Ada Mosese giitana wagaine, meyana gisidobodobona faina ai-nai keke gida alalai-yabu. E ada maita ginau lilivane ke ginaita-dewedewena ani KAUVEYA bonana ginogalina, givonaga,

32 ‘Iya tamamomo yadi Yaubada, badi Ebe-laamo, Aisake, ke Iyakobo yadi Yaubada.’ Ada Mosese ginogalina wagaine, givebutu givetave-tatava ke gimatauta lakaina ada keke-bamowa nuwanuwana ginaita wagaine.

33 “Ada KAUVEYA givonena, givona, ‘Aageyafayafa una kakina, faina babi-nai wagaine umidimididi ani tabutabuna.

34 MeItipita yaku yooyavo iluimiimilidi ada yadi mulolova gaitana. Yadi tagiya ganogalina, e ada gaobuelai ke gana kibababaledi faina. E ada una mididi, Itipita wagaine gana imilini ke unanau.’” Taidei anafaiweya KAUVEYA givona ani Sitiveni givonayena.

35 Kaduwe Sitiveni yana laumamala wagaine givona, “Aku taidei Mosese-nai badiyavo meIsileli idibusoyogena. Faina ivonenaga, ‘O gaito

[†] 7:29 Iyeg 2:11-15,21-22

giseni-yo oyeni uvetoveimeya ke uvetovevon-ayavuga wagaimewa?’ E ani banae kalivana-
 nai Yaubada Tauna giimilina ke gina veimeyedi
 ada gina kibababaledi. E, anelose awane giim-
 ilina, tova-nai ai gialalata negenine giyegemona
 Mosese wagaine.†

36 Ada banae-nai meIsileli givagauleli giyege-
 monedi Itipita wagaine-deya, ada ebameyasi-
 dobodobo ke gugai lakaidi Itipita wagaine ada
 Leyaga Yabeyabelina wagaine gigugaiyedi. Ada
 fafali kavovona wagaine kaduwe gigugaiyedi
 anafaiweya malamala foti wagaidiya.†

37 “Kaduwe taidei Mosese-nai banae meIsileli
 givonedi, givona, ‘Yaubada aimo Falofita seyana
 gina vemididina imi faimiya Iya anafaiweya, Ba-
 nae taumiyavo amiyoo wagaine-deya.’†

38 Kadu bana Mosese ani meIsileli nodi iva-
 gauta fafali kavovona wagaine.† Ada kaduwe
 banae tamadeyavo nagona nodi imiyamiya, ada
 gilaka Oya Sainai wagaine anelose nodi iifufu,
 ada Yaubada yana vona wayawaina ginogalina
 ke ide wagaideya gina vesesevedamana faina.†

39 “Aku banae yana veimeya ani tamadeyavo-
 dina iawaegegena ada nuwainagediya
 inuwanuwa vaita ina yewadi Itipita wagaine.†

40 Taidei anafaiweya inuwanuwa faina, Mosese
 tawagana Eloni wagaine ivona, ‘Kilumina
 una bubudi yada yaubada ke ina nagoyeda. Aku
 bana Mosese-nai Itipita wagaine givagauleda

† 7:35 Iyeg 3:1-10 † 7:36 Iyeg 7:3-6, 14:21-31 † 7:37 2Vei 18:15

† 7:38 Iyeg 19:3,17-18 † 7:38 2Vei 9:10-11, 32:46-47 † 7:39
 Naba 14:3-4

ani gavana giyegemona wagaine? Keke
ada alamane!"

⁴¹ E ada tayuwe tova-nai wagaine kilumina
anaita vaita bulumakau natudi anafaiweya
ibubuna. Ada kevakeva ialiyedi ivebolavoiyedi
kilumina-nai wagaine, ada abutu ibubuna ke
ivemwamwala lakaina gaitoma-nai taudiyavo
nimadiya ibubuna faina.[†]

⁴² E aku Yaubada givedomobubusedi ada
gikisegedi ke ina oduodu kauwana, vaikoi, ada
ailabama wagaidiya.[†] Taidei gavana anafaiweya
bademowa ivetokilumina gimiyamiya falofita
yadi buki wagaine, givona,

'Imi meIsileli, keke Iya faikuya kevakeva
wada munumunudi ada
wada vevebolavoiyedi malamala foti fafali
kavovona wagaine. Keke.

⁴³ Aku yaubada fwayafwaya-nai Molaki ani
bana yana manawa sinininila waavaladada-
nena,
ke kaduwe yaubada fwayafwaya seyana
anaita anafaiweya ailabama anayegana
Lefani waavaladadanena. Adiselu wabubudi
ke wana oduodu wagaidiya. Taidei faina
gana wavimi ke
wana yegemona atuwadeya melala Babiloni
fafaline
ke wana veawawala.' " [†]

Taidei anafaiweya Yaubada yana falofita awane

[†] **7:41** Iyeg 32:1-6 [†] **7:42** 2Vei 4:19, 2Kin 17:16, 21:3, 23:5, Iyel
19:13 [†] **7:43** Emos 5:25-27

meIsileli wagaidiya givona ani Sitiveni givon-ayena.

⁴⁴ Kaduwe Sitiveni givona, “Manuwa sinininila tabutabuna giiveivemogatalina Yaubada badi nodi imiyamiya ani tamadeyavo nagona nodi fafali kavovona wagaine imiya. Yaubada Tauna Mosesese giveimeyena ada giawavetunugina mamauwe ibubuna.[†]

⁴⁵ Ada manuwa sinininila-nai ani tamadeyavo isedamanena natudiyavo wagaidiya. Ada fafali taidei anatomya adiyoo tulina tulina Yaubada givenegadi aku Iyosuwa tamadeyavo givagauledi ada manuwa sinininila tabutabuna[†] nodi iluku fafali taidei wagaine. Ada gimiya analaba Deivida yana tova kini wagaine.

⁴⁶ Bana Deivida aseasena iwakana Yaubada matane faina, Yaubada giawaveiwakanena, ada Deivida giveola, givona, ‘Oyeni tamama Iyakobo yana Yaubada. Iya nuwanuwaku uda awaegeku ke ya ebamiya gada yogona.’[†]

⁴⁷ Taidei anafaiweya Deivida givona aku bana keke gidayogo, aku natuna Solomoni Yaubada yana manuwa giyogona.[†]

⁴⁸ “E aku Yaubada Togetanemwane ani keke gida miyami manuwa wagaidiya kaliva iyogodi, keke. Anafaiweya tuwai-moena falofita seyana givona,

⁴⁹ ‘Iya KAUYEYA. Gabama ani yaku veimeya anaebavetoga kaikaiwabuna, ada babi ageku anaebaibo.

[†] 7:44 Iyeg 25:9,40 [†] 7:45 2Vei 32:49, Iyos 4:11, 18:1, Gug 13:19

[†] 7:46 2Sam 7:1-2 [†] 7:47 1Kin 6:1,14

E ada gavaiyamu manuwa wana yogona Iya faikuya?

Gava ebamiya wana bubu ayo gana veyawai?

⁵⁰ Au keke amifaiweya, faina gabama ke babi ke

adigaitoma moyaina ani Iya Tauku nimakuya gabubudi.' " †

Taidei anafaiweya tuwai-moena falofita givona, ada bana Sitiveni giifufuyena.

⁵¹ Kaduwe Sitiveni giifufu meIsileli yadi Kanisela wagaidiya, givona, "Imi tagami kuluna. Badi mali kaliva keke Yaubada ida vetumagane ani tayuwe anafaiweya imiyavo. Keke nuwanuwami Yaubada yana vona wana nogali, kaduwe keke nuwanuwami Banae nuwami gina kivemali. Tova moyaina Aluwaluwa Tabuna waveveluegena. Tamamiyavo nagona idewa anafaiweya, imi tova taidei wadewadewa.†

⁵² Tamamiyavo-dina ani falofita matatabudi ikiveuloulolonidi, keke tamo gaito wagaidiya idadewe iwakana.† Au badi falofita-dina Yaubada yana Toyegayegana yana obuela faina ivonaye-vagaina ani iluvealikadi. Ada tova malinai bademowa giobelai aku imi waatuegena nibainavo nimadiya ke waluvealikana.

⁵³ Imiyavo ani Yaubada yana veimeya wavaina, veimeya-nai anelose† iveledi tamamiyavo nagona. Aku taumada, keke wada itaveyabi."

† 7:50 Ais 66:1-2 † 7:51 Iyeg 32:9 † 7:52 1Kin 19:10, 2Awa 36:16, Iyel 2:30 † 7:53 Gal 3:19, Ibel 2:2

Taidei anafaiweya Sitiveni yana laumamala giluyabuna.

Sitiveni itutuvealikana.

⁵⁴ Aku badi Kaniselayavo Sitiveni taidei yana vona inogalina, ada magigidi gitafayaina ke agodi givetalakikita.

⁵⁵ Aku Sitiveni ani Aluwaluwa Tabuna wagaine gimaga, ada giitalaka ada gabama giitafolena ke giitana Yaubada yana iwakana mamalina, ada kaduwe Yeisu Yaubada aiyatagine gimidimididi giitana.

⁵⁶ Ada givona, “Wana itana! Gaitana gabama giawaina† aku Banae Kaliva Natuna gimidimididi Yaubada aiyatagine!” †

⁵⁷ Taidei anafaiweya givona ada badi Kaniselayavo ikovatalaga ke nimadiya tagadi ikibodadi, aku moyaidi aigaigabu Sitiveni wagaine imadu inau

⁵⁸ isitaitai iyegemonena melala lakaina ke ivebutu kabala wagaine itutuvealikana.† Ada badi toifiyaga adinuya anakiwafi iveyalilidi ke tubulakata seyana anayegana Saulo† wagaine isedi ke gina itaveyabidi.

⁵⁹ Ada badi ifiyafiyana kabala wagaine aku Sitiveni giveola Kauveya wagaine, givona, “Kauveya Yeisu, aluwaluwaku una vaina.”

⁶⁰ Ada tugana givetodonena ke bonana lakaina wagaine givona, “Kauveya, yadi koyona taidei faina keke wagaidiya una lufata.” † Vona taidei giinanana muline, yawaina giavaina.

† 7:56 Iyo 1:51 † 7:56 Kol 3:1 † 7:58 Vei 24:14-16, Naba 15:35, 1Kin 21:13 † 7:58 Gug 22:20 † 7:60 Mad 5:44

8

Saulo tovetumagana gikiveuloulolonidi.

¹ E aku Saulo nodi wadedeku, ada badi Sitiveni itutuvealikana ani giawaveiwakanena.

Aku yadayada-nai wagaine kaliva ivebutu tovetumagana adiyoo Yelusalema wagaine ikiveuloulolonidi lakaina. Taidei faina tovetumagana moyaidi iawala inau Yudiya ke Sameliya adifafali wagaidiya,[†] aku afositolo gaga imiya Yelusalema wagaine.

² Aku kaliva tufodi badi Yaubada anatooduo-duyavo ani Sitiveni itavuna, ada bana faine itagiya lakaina.

³ Aku bana Saulo givebutu tovetumagana adiyoo giluveyawaliyedi. Au manawa seyana seyana wagaidiya ginaunau ke tovetumagana kaliva ke vevine gisitaitaidi ginaunauwedi deli wagaine gisesedi.[†]

Valeya iwakana Filipi gilumamalena Sameliya wagaine.

⁴ Aku badi tovetumagana iawala ani inau fafali moyaina wagaidiya, ada yadi nau-nai wagaine valeya iwakana ilumamalenauwena.

⁵ Bana Filipi ginau melala anayegana Sameliya wagaine ada meSameliya wagaidiya gilumamala Keliso faine.

⁶ Ada yoo lakaina yana laumamala inogalina kaduwe iyaiyaya ebameyasidobodobo gigugaiyedi iitana, e ada moyaidi inogala-dewadewa.

[†] **8:1** Gug 11:19 [†] **8:3** Gug 9:1-2, 22:4,19, 26:9-11

⁷ Faina tauna aluwaluwa bwanebwanebwanenedi givemeyedi ina yegemona kaliva wagaidiya,[†] ani ikova moiyalidi aku iyegemona. Kaduwe moyaidi tovefela o kai badi vovodi memeluyadi ani iveiwaka.

⁸ Ada moyaidi iveiwaka faina, meSameliya ivemwamwala lakaina.

Tokwelikweli lakaina givetumagana.

⁹ Aku tayuwe melala-nai wagaine kaliva seyana gimiyamiya anayegana Saimoni. Banae tokwelikweli yadi gugai tuwaina givaina ada yana gugai-nai wagaine meSameliya moyaidi meyadi givesidobodobona. Tauna givewagana vaita banae anayegana lakaina,

¹⁰ ada kaliva moyaidi, lakaidiyavo kaduwe kabisodiyavo, yana vona inogali-dewedewena. E ada ivonavona, “Bana taidei kaliva-nai vaita Yaubada ivewagana Toyogina Lakai-moena.”

¹¹ Ada iyaiyaya ebameyasidobodobo yana vekwelikweli-dina gigugaiyedi wagaidiya ani meyadi givesidobodobona. Ada taidei anafaiweya bademowa ginunauwena tova manamanawena faina, moyaidi nuwadi giabidi.

¹² Aku tova-nai Filipi gilumamala Yaubada yana ebaveimeya anavaleya iwakana kadu Yeisu Keliso anayegana faina, inogalina ke ivetumaganena ada ibabitaiso, kaliva ke vevine.

¹³ Kaduwe bana Saimoni tauna Yeisu wagaine givetumagana ada gibabitaiso. Gibabitaiso muline, tova moyaina Filipi gimuliyedadana, ada

[†] 8:7 Mad 10:1, Mak 16:17

giitana iyaiyaya lakaidi ke gugai ebameyasido-bodobo wagaine ada au meyana gibovu.

¹⁴ Aku afositolo Yelusalema wagaine meSameliya valeyadi inogalina vaita bademowa Yaubada yana vona ivetumaganena, ada Pita ke Iyoni iimilidi inau wagaidiya.

¹⁵ Ada tova-nai iyegemona Sameliya, iveove-ola tovetumagana faidiya ke Aluwaluwa Tabuna ina nuwagana.

¹⁶ Faina Aluwaluwa Tabuna aimo keke tamo gaito badi wagaidiya gida vemaga. Au Kauveya Yeisu anayeganeya bademowa ibabitaizo.

¹⁷ E ayo Pita ke Iyoni nimadi isedi wagaidiya ke Aluwaluwa Tabuna inuwagana.[†]

¹⁸ Aku Saimoni-nai giitaita badi afositolo nimadi tovetumagana wagaidiya isedi ada Yaubada Aluwaluwa Tabuna giveledi. E ada mani gitunena Pita ke Iyoni wagaidiya

¹⁹ ada givonedi, givona, “Taidei toyogina Iya kaduwe wana veleku e ada badi gavega wagaidiya nimaku ganasedi, anafaiweya kaduwe Aluwaluwa Tabuna ina nuwagana.”

²⁰ Aku Pita givonena, givona, “Taumada! O ya nuwanuwa vaita Yaubada yana nuwakabubu mani wagaine afaiweya una kimonena faina, oyeni ke ya mani-nai nodi wana kwayabu!

²¹ Ya nuwanuwa keke tunutunugina Yaubada matane faina, keke afaiweya taidei Yaubada yana gugai ime nodi kana gugai.

²²⁻²³ Ya nuwakoyo bade unauwena-deya giveg-olagola ani gaitanuwigana. Kadu ya nuwanuwa

[†] **8:17** Gug 6:6, 9:17, 19:6, 2Tim 1:6, Ibel 6:2

koyona gikiveyabini e ada giyogoni umiyamiya. Taidei faina una nuwawilana ke ya nuwanuwa koyo-moena una dibusoyogena, ada Kauveya wagaine una veoveola e ada meyameyaganina ya nuwanuwa koyona gina venuwaegena.”† Taidei anafaiweya Pita givona.

²⁴ Ada Saimoni givona Pita ke Iyoni wagaidiya, “Amiselu wada veoveola Kauveya wagaine Iya faikuya ke taidei gaitoma-nai wavonayena ani keke maita gina yegemona wagaikuya.”

²⁵ Ada Pita ke Iyoni Kauveya Yeisu faine iawatalatalainena kaduwe Kauveya yana vona ilumamalena kaliva wagaidiya, muliya-yo iye-wadi Yelusalema. Ada yadi nau-nai wagaine meSameliya yadi melala moyaina wagaidiya valeyaleya iwakana ilumamalenauwena.

Filipi kwana Itiofia Yeisu faine gikivemalina.

²⁶ Badi inau aku Kauveya yana anelose seyana gielai Filipi† wagaine ada givonena, givona, “Una mididi ada unanau wabolimaneya waina, e taine wai-nai Yelusalema-deya ginaunau Gasa. Tayuwe ani fafali kavovona wagaine.”

²⁷ Ada Filipi gimididi ke gitauya ginaunau aku kaliva seyana wai wagaine ginuwagana. Banae kwana Itiofia, kaliva lakaina, Kanidesi badiyavo meItiofia yadi kwini yadi mani ke kaikaiwabu matatabuna anatoitaveyabina.† Ada kaliva-nai bademowa Yelusalema wagaine gina gioduodu Yaubada wagaine,

† 8:22-23 2Tim 2:25 † 8:26 Gug 21:8 † 8:27 Ais 56:3-7

28 ada giyewayewana yana melala wagaine. Ada givetoga yana salioti wagaine aku falofita Aiseya yana buki wagaine giveyaveyawa.

29 Bana ginaunau aku Aluwaluwa Tabuna Filipi wagaine givona, “Unanau tayuwe salioti lilivane una naunau.”

30 Ada gimadu ginau salioti-nai wagaine ke kaliva bonana ginogalina falofita Aiseya yana buki wagaine giveyaveyawa. E ada gitolidadana, givona, “Gavaiyamu, taine uveyaveyawana ani ananuwanuwa nuwa gimalina?”

31 Ada gilufata, “Gavaiyamu gana alamane, faina akutokivetuvetunuga keke.” Ada givonena ke ginayage gina vetoga bana nodi salioti wagaine inanau, ada au giyage.

32 Ada Buki Tabu wagaine giveyaveyawa ani yana maita taidei anafaiweya givona,

“Sifi inauwena ke ina luvealikana anafaiweya,
Bana inauwena.

Ada sifi kabisona vutuvutuna anatoitotoga
matane keke gina kwage anafaiweya,
Bana gikulu-moena. Keke tamo gavana gida-
davone.

33 Keke tamo koyona gida gugaiye
aku ikivevovomumu-kavovona, ada yana
vonayavuga keke tunutunugina.

Ada keke tamo gaito anaunumayavo faidiya
gina ifuifufu,
faina yawaina idabana babi wagaine-deya.”

†

Taidei anafaiweya Aiseya givona ani kwana Itiofia giveyaveyawana.

³⁴ Ada kwana Itiofia Filipi givonena, “Uda kivemaliku. Gaito faine falofita taidei anafaiweya givonavona? Givonavona tauna faine o kai seyana gaito faine?”

³⁵ E ada Filipi maita-dina Aiseya yana buki wagaine givevuvu, ada valeya iwakana Yeisu faine giifufuyena.

³⁶ Ada wai wagaine inaunau aku iyegemona seyana gufa wagaine, ada bana kwana Itiofia givona, “Uitana, gufa taidei gimiyamiya. Aku Iya faikuya ani gavaiyamu, kai tamo vuvu giawataku e ada keke akufaiweya gana babitaiso?”

[
³⁷ Filipi givonena, givona, “Kai Yeisu Keliso wagaine velemoena uvetumagana aga afaiweyama-mowa una babitaiso.”

Ada bana kwana Itiofia givona, “Gavetumagana velemoena Yeisu Keliso Banae Yaubada Natuna.”]

³⁸ Ada yana salioti anatovemadu giveimeyena ke giilovau. Ada Filipi ke kwana Itiofia adiselu iobu gufa wagaine ada Filipi gikivebabitaisona.

³⁹⁻⁴⁰ Tova-nai gufa wagaine-deya ivilakata, ada Kauveya Aluwaluwana Filipi gisiveyavegina ada maduga-mowa giyegemona melala anayegana Asotasi. Ada kwana Itiofia keke gidaita-vagile aku wa yana vemwamwala ginau. Ada Filipi gilumamalanau melala moyaina wagaidiya analaba giyegemona Sisalia.

9

Saulo givevuvu Yeisu wagaine givetumagana.

¹ Aku tova tayuwe wagaine Saulo aimo Yeisu yana tonogalayavo giawaawavematausidi vaita gina luvealikadi. Au ginau veyavo anatovegugai aditonagona wagaine

² giveola ke leta gina vetokilumidi ada manuwa ebavewala moyaidi melala lakaina Damasiko wagaine gina nauwedi. Ada badi manuwa ebavewala aditonagonayavo leta-nai ina itana ada Saulo anaveimeya ina alamanena, e ada badi gavega Kauveya Yana Wai[†] anatomuliya, kai kaliva o kai vavine, biyavo-dina gina kiveyabidi ke Yelusalema wagaine gina aliyedi.[†]

³ E, ada gitauya ginaunau Damasiko wagaine aku bademowa ginunuyegemona melala lili-vane ani maduga-mowa gabameya-deya malina lakaina ginununa ada Saulo gimalivuyona.

⁴ Ada gibeu babiya aku bonabona seyana ginogalina givonena, givona, "Saulo, Saulo! Gavana faina ukiveulouloloniku?"

⁵ Ada Saulo givona, "Kauveya, o gaito?"

Ada kaduwe bonana ginogali-vagilena, givona, "Iya Yeisu, Iya ukiveulouloloniku.

⁶ Aku una mididi unana melala lakaina wagaine unaluku, ada wadedeku seyana gaito gina mataweni gavana unagai."

⁷ Aku badi kaliva-dina Saulo ikwayabuna ani meyadi gibovu, au imididi-vagata. Faina bonabona gaga inogalina aku keke tamo gaito idaita.

[†] 9:2 Gug 19:9,23, 24:14,22 [†] 9:2 Gug 8:3

⁸ Ada malina-nai giavaina, Saulo gimididi ada matana gialeleleyena aku keke tamo gavana anafaiweya gidaita. Bademowa matana gikoyomowa. Ada nimane iabi isivenavenau inauwena Damasiko wagaine.

⁹ Ada yadayada toiye wagaidiya givematakoyo, ada keke tamo gavana gidakani o gidayui.

¹⁰ Aku Damasiko wagaine tonogala seyana gimiyamiya, anayegana Ananaiyasi. Ada vewala** seyana giyegemona bana wagaine, ada anavewala-nai wagaine Kauveya gidouwena, givona, "Ananaiyasi!"

Ada givona, "Kauveya, Iyayeku."

¹¹ Ada Kauveya givonena, givona, "Una mididi ke wai anayegana Wai Tunutunugina wagaine unanau Yudasa yana manuweya, ada una tolidadana Saulo banae kwana Tasasi faine. Banae tova malinae giveoveola,

¹² ada anavewala wagaine giitana kaliva seyana anayegana Ananaiyasi, o unaelai ada nima unasedi bana wagaine ke ginaita-vagila."

¹³ Aku Ananaiyasi givona, "Kauveya, kaliva moyaidi ivoneku taidei kaliva-nai faine, ani ya kaliva tabutabudiyavo Yelusalema wagaine gikiveuloulolonidi lakaina!

¹⁴ Ada banae idedeku Damasiko wagaine gielai faina veyavo anatovegugai lakaidiyavo anaveimeya ivelena, ke ime gavega ayegana

** **9:10** Taide maita-nai wagaine, vona-nai 'vewala' ani ananuwanuwa anafaiweya 'enoita', aku kaliva-nai o vavine-nai gina nuwagana ani giitaita aku vewala giyegeyegemona wagaine.

wagaina aoduodu ani gina kiveyabima ke gina nauwema.”

¹⁵ Aku Kauveya givonena, givona, “Unanau, faina taidei kaliva-nai ani Iya gavenuwadadanena ke akuyegana gina kilakaina badiyavo gavega keke meIsileli, ada yadi kini wagaidiya, kaduwe meIsileli wagaidiya.

¹⁶ Aimo Iya gana vewalena, uloulolo lakaina gina nuwagana akuyegana faina.”

¹⁷ Ada Kauveya taidei anafaiweya givona, e ada Ananaiyasi gitauya ginau ada giluku manuwana wagaine Saulo gimiyamiya. Ada nimana gisedi Saulo wagaine aku givona, “Tubuiyaku Saulo, Kauveya Yeisu wai wagaine giyegemona wagainiya tova-nai uelaelai idedeku, ani giimiliku ke unaita-vagila ada Aluwaluwa Tabuna gina vemagani.”

¹⁸ Ada maduga-mowa gaitoma vaita igana kwanavina anafaiweya ani Saulo matane ibeu, ada giita dewadewa. E au gimididi ada gibabitaio.

¹⁹ Ada aa gikani muline, kaduwe yana toyogina ginuwaga-vagilena.

Saulo Damasiko wagaine gilumamala.

Ada Saulo Damasiko wagaine gimiyamiya yadayada tufona Yeisu yana tonogalayavo nodi.

²⁰ Ada manawa ebavewala wagaidiya maduga-mowa gilukunau ke Yeisu faine gilumamala, givona, “Yeisu Banae Yaubada Natuna.”

²¹ Ada badi moyaidi gavega yana laumamala inogalina ani meyadi gisidobodobona ke ivebutu taudiyavo ivetolitoli, ivona, “Taumada!

Kaliva-nai badi gavega Yeisu anayegana ive-tumaganena Yelusalema wagaine ani gikiveu-loulolonidi lakaina. Kaduwe taidei yana vuvuna-nai faina gielai idedeku, ada Yeisu anato-muliyayavo ide wagaideya-deya gina kiveyabidi gina nauwedi veyavo anatovegugai lakaidiyavo wagaidiya.”

²² Taidei anafaiweya badi iifuifufu aku Saulo yana laumamala wagaine gitoyogina ada gitoyogi-moena. Ada meIsileli Damasiko wagaine imiyamiya ani giawavetunutunugidi vaita Yeisu velemoena Yaubada givenuwadadanena ani velemoena Venuvenuwadadanina.[†] Ada yana awavetuvetunuga-nai wagaine gitoyogisegedi e ada keke adifaiweya bonana inafata.

²³ Aku yadayada gavaiyei giavaidi, meIsileli tufodi ivagauta ke iveimeya aigaigabu vaita Saulo ina luvealikana.

²⁴ Ada yadayada ke bogi melala lakaina anaebaluku wagaine ibodabodana nuwanuwadi ina luvealikana faina, aku bademowa gaito seyana yadi nuwanuwa Saulo wagaine giawatalatalainena.

²⁵ Aku bogi seyana wagaine Saulo anato-muliyayavo ikavuya ivagaule inauwena, ada fuwama lakaina wagaine idodona ada melala anakali tutufolegeya iseobuyena babiya ke giota ginau.[†]

Saulo giyewana Yelusalema wagaine.

²⁶ Aku Saulo Yelusalema wagaine giyewana ada giyegemona wagaine, ginau tonogalayavo adiyoo

[†] 9:22 Gug 17:3, 18:28 [†] 9:25 2Kol 11:32-33

wagaine gidaluku aku badi moyaidi imatausena, faina keke ida vetumagane vaita velemonoena Yeisu wagaine gida vetonogala.

²⁷ Aku Banabasi gilemena, ada afositolo wagaidiya ginawena ke bana faine gikivemalidi, Kauveya waiya giitana kaduwe bonana ginogalina ani giifufuyedi. Kaduwe givonedi, givona, “Banae Saulo wa yana asevatu Yeisu anayeganeya gilumamala Damasiko wagaine.”

²⁸ Taidei anafaiweya Banabasi givona e ada Saulo badi afositolo wagaidiya giluku nodi imiya Yelusalema wagaine. Ada Saulo wa yana asevatu gilulumamala Yeisu anayeganeya.

²⁹ Kaduwe melsileli badi tovana Giliki ani Saulo nodi ivevonavona, aku iveimeya aigaigabu ina luvealikana.

³⁰ Aku tova-nai tovetumaganayavo ikaiyanogala yadi veimeya faina, Saulo inawena Sisalia wagaine ada wadedeku-deya waka wagaine iveyagena ke ginau yana melala Tasasi wagaine.

³¹ E ayo tovetumagana adiyoo imiyamiya Yudiya, Galili, ada kaduwe Sameliya adifafali wagaidiya ani wa yadi nuwaniwalova nodi imiyamiya, ada yadi vetumagana gitubutubuga. Kaduwe Aluwaluwa Tabuna gikikiveasevatudi ada moyaidi wa yadi matauta Kauveya ivemoimoinena, e ada adiyoo giveiveinala.

Pita kaliva vovona memeluyana gikiveiwakana.

³² Imiyamiya aku Pita melala tulina tulina wagaidiya ginaunau, ada tova seyana Yaubada

yana kaliva tabutabudiyavo melala Lida wagaine imiyamiya ani wagaidiya gina gimadubodadi.

³³ Wadedeku-deya kaliva seyana ginuwagana, anayegana Iniya. Bana malamala eita gimiyamiya iviya, faina vovona memeluyana.

³⁴ Ada Pita givonena, givona, “Iniya, Yeisu Keliso gikikiveiwakaneni. Una mididi aivi una uwana.” Ada maduga-mowa Iniya gimididi.†

³⁵ Ada meLida moyaidi kadu kaliva moyaidi imiyamiya laubeu anayegana Seloni† wagaine, ani kaliva-nai iitana ada Kauveya Yeisu ivetumaganena.

Pita Tabita alikaya gisiveyawana.

³⁶ Aku vavine seyana melala-nai Yofa† wagaine gimiyamiya, anayegana Tabita, ada banae tonogala. Vona Giliki wagaine anayegana Dokasa.** Ada vavine-nai tova moyaina gugai iwakana gigugugaiyena† ada fanifanidiyavo gilemelemedi.

³⁷ Ada tova tayuwe wagaine Pita gielai melala Lida wagaine, aku Tabita veoga gikimunumunu-moena ke gialika. Ada vovona ikolana ada manawa getana anatutulagolota wagaine isena.

³⁸ Aku melala Yofa ani Lida lilivane, ada tonogalayavo Yofa wagaine ikaiyanogala vaita Pita gimiyamiya Lida wagaine e ada kaliva adiselu

† 9:34 Iyo 5:8-9 † 9:35 1Awa 5:16, 27:29, Syk 2:1 † 9:36 Iyos 19:46 ** 9:36 Yegana-dina ‘Tabita’ ada ‘Dokasa’ adinuwanuwa ani ‘gaseli’, bana seyana kevakeva anafaiweya diya aku yadi ebafwaiki tunutunugidi. Badi tomadu velemono kevakeva wagaidiya. † 9:36 1Tim 2:10

iimilidi inau Pita ina vagaulena. Inau ada ivona, “Uda maduelai ime wagaimeya.”

³⁹ Yadi vona Pita ginogalina ada gimididi nodi inau. Tova-nai giyegemona, iabi ilakavena manuwa getane anatutulagolota wagaine Tabita vovona isena. Ada sikwasikwa moyaidi Pita imid-ififina aku itagitagiya, ke kaduwe ivewavewalena nuya tulina tulina Tabita gionadi tova-nai aimo wayawaina wagaine.[†]

⁴⁰ Au Pita moyaidi givonedi iyegemona mela-leya aku tugana givetodonena ke giveoveola Yaubada wagaine. E ada gimiyavilana toalika vovona wagaine ada givona, “Tabita, una mididi!” Au matana giabwana ada Pita giitana ani gimididi givetogana.

⁴¹ Ada Pita nimane giabi gisivemididina. E ayo tovetumagana ke sikwasikwa nodi gidouwedi iluku tutulagolota-nai wagaine, ada givewaledi Tabita wayawaina.

⁴² Ada vavine-nai valeyana gimutula ke meYofa moyaidi inogalina, ada tufona moyaidi Kauveya ivetumaganena.

⁴³ Ada yadayada moyaina Pita gimiyamiya Yofa. Kaliva seyana anayegana Saimoni nodi, banae kevakeva bubudi anatokidewadewa.

10

Koneliyasi Pita givagaulena.

¹ Aku kaliva seyana melala Sisalia wagaine gimiyamiya, anayegana Koneliyasi. Banae

[†] 9:39 Mak 5:38-41

meLoma tolugaviya wani analedi (100) aditonagona, badiyavo imiyamiya tolugaviya adiyoo-nai lakaina wagaine iyegemona Itali anafafaliya.

² Banae keke kwana Isileli aku yana manuwa anatomiyayavo nodi wa yadi matauta Yaubada ivemoimoinena ada ioduodu wagaine. Kaduwe tauna tonuwadoga ke tova moyaina badi fanifanidiyavo gilemelemedi, ada tova moyaina Yaubada wagaine giveoveola.

³ Yadayada seyana teli kiloki lavilaviya ani vewala seyana giyegemona Koneliyasi wagaine. Ada anavewala-nai wagaine giita-dewedewena Yaubada yana anelose gielai wagaine ada anayegana giinanana, givona, "Koneliyasi."

⁴ Ada Koneliyasi wa yana matauta lakaina anelose giitavutuvutuna aku givona, "Kauveya, gavana ya nuwanuwa?"

Ada anelose givonena, "Bademowa Yaubada ya veoveola ginogalina[†] ada ya nuwakabubu tofanifani wagaidiya giitana, e ada ginuwanuwa fainiya.

⁵ Ada kaliva tufodi una imilidi inana Yofa wagaine ke kaliva seyana ina vagaulena, banae anayegana Saimoni-Pita.

⁶ Tova taidei gimiyamiya wagakoyona Saimoni[†] nodi, bana kevakeva bubudi anatokidewadewa. Yana manuwa taliya lilivane."

⁷ Taidei anafaiweya anelose givona ada ginau, aku Koneliyasi yana togugaiyavo adiselu ke yana tolugaviya seyana gidouwedi ielai. Bana

[†] **10:4** Sam 141:2, Dan 10:12 [†] **10:6** Gug 9:43

tolugaviya-nai Koneliyasi anatoleme, ada bana kaduwe Yaubada wagaine gioduodu.

⁸ Ada ielai wagaine ke giifufuyedi matatabuna gavana giyegemona wagaine, ada giimilidi inau Yofa.

Pita anavewala.

⁹ Yadayada anavelu wagaine kauwana givugivudiya, aimo ielaelai aku bademowa inuyegeyegemona Yofa wagaine aku Pita gilaka manuwa getane gina veoveola faina.**

¹⁰ Aku mafa gilavuna ada nuwanuwana aa ginakani, aku aimo anaga ikidewadewa ani au vewala seyana giyegemona bana wagaine.

¹¹ Ada anavewala-nai wagaine giitana vaita gabama giawaina aku gaitoma seyana vaita nuya lalafana anafaiweya, ada bwatana lafuli waga-diya iabi aku iseseobuyena babiya.

¹² Aku nuya-nai negenine kevakeva tulidi tulidi imiyamiya, madumadugidiyavo, yagayagani-diyavo ke yaveyavegadiyavo.

¹³ Ada bonabona seyana ginogalina, givona, “Pita, una mididi. Tamo kevakeva unamunu una kanina.”

¹⁴ Aku Pita givona, “Kauveya, keke-bamowa! Keke tamo tova tamo gavana awaawatana o kai keke yegayegana Yaubada matane† gadakani†.”

¹⁵ Aku kaduwe bonabona-nai ginogali-vagilena, givona, “Gavana moyaina Yaubada bademowa gikiveyegayeganena, ani o keke

** **10:9** MeIsileli yadi manuwa getadi ani beyabeyadi, e ada wada yadi ebamiya ke yadi ebada faidiya. † **10:14** Vei 11:2-47, 2Vei 14:4-20 † **10:14** Isik 4:14, Dan 1:8

una vewaga vaita keke yegayegana Banae matane.”

¹⁶ Ada taidei anafaiweya giyegemona tova toiye wagaine, au nuya-nai isilakaina gabameya.

¹⁷ Ada Pita aimo ginuwanuwa gavana taidei anavewala-nai ananuwanuwa, ani kaliva-dina Koneliyasi giimilidi bademowa inuwagana gadedeku Saimoni yana manuwa ada anaedawaneya imididina.

¹⁸ Ada itoliluvaluva ivona, “Kai ineneku Saimoni-Pita gimiyamiya?”

¹⁹ Aku Pita ani anavewala-nai aimo faine ginuwanuwa aku Aluwaluwa Tabuna givonena,[†] givona, “Una nogalina, kaliva aditoto o ileleleni.

²⁰ Una mididi unaobu, ada keke una venuwana aku au nodi wanana. Faina Iya gaimilidi ielai.”

²¹ Ada Pita giobu kaliva-dina wagaidiya ke givonedi, givona, “Kaliva-nai walelлена ani Iyayeku. Gavana vuvuna waela?”

²² Aku kaliva ivona, “Koneliyasi, banae tolu-gaviya aditonagona seyana giimilima aelai. Banae kaliva iwakana. Tova moyaina Yaubada wagaine gioduodu ada meIsileli moyaidi ive-moimoinena lakaina. Ada Yaubada yana anelose tabutabuna seyana gielai wagaine ke givonena vaita o gina veoleni ke unaelai yana manuweya, e ada gina nogalina gavana unavona.”

²³ Tova-nai Pita yadi vona ginogalina ada givagauledi aku givonedi, “Wanaela idedeku-deya kanadau, ada malabutuya kanana.”

Pita ginau Koneliyasi wagaine.

[†] **10:19** Gug 11:12

Mala gilavuna Pita gikidewadewa ke kalivadina nodi itauya, ada kaduwe tovetumagana tufodi Yofa wagaine-deya ikwayabudi nodi inau.

²⁴ Yadayada anavelu Sisalia wagaine iyege-mona, ada Koneliyasi tubuiyanavo kaduwe yana gabuyavo nodi gidouwevagauwidi ada ibodabodana.

²⁵ Tova-nai Pita gilukuluku aku Koneliyasi giela tugana givetodonena ada gioduodu wagaine.

²⁶ Aku Pita gisivemididina ke givonena, givonaga, “Una mididi! Iya kaduwe kaliva-mowa.” †

²⁷ Ada Pita Koneliyasi wagaine giifuifufu aku manuweya ilukuluku ani Pita ginuwagana yoo lakaina bademowa ivagauta.

²⁸ Ada givonedi, givona, “Ime meIsileli amaawata seyana waalamane-dewedewena, vaita kwana Isileli keke meyameyaganina badi keke meIsileli gina awakawakadi o kai nodi ina luveya. Aku Yaubada givewaleku vaita keke tamo kaliva gada vewaga vaita banae keke yegayegana Yaubada matane. Keke tamo.

²⁹ Taidei faina akutovagaula uimilidi ielai ani keke gada dibusoyoga aku gaelai. Aku nuwanuwaku gana alamanena gavaiyamu-yo uvagauleku.”

³⁰ Ada Koneliyasi givonena, givona, “Yadayada laufuli giavaidi wagaine yaku manuweya gaveoveola, ada kauwana anafaiweya tova taidei au gienovilana, tainei teli kiloki lavilaviya. Gaveoveola aku maduga-mowa kaliva seyana wamagigikuya gimididi. Ananuya lunamanamalina.

† 10:26 Mad 4:10, Ive 19:10

³¹ Ada givona, ‘Koneliyasi, bademowa Yaubada ya veoveola ginogalina ada ya nuwakabubu tofanifani wagaidiya giitana, e ada ginuwanuwa fainiya.

³² E ada kaliva tufodi una imilidi inanau Yofa wagaine ke kaliva seyana ina vagaulena, banae anayegana Saimoni-Pita. Tova taidei wagakoyona Saimoni yana manuweya gimiya, bana kevakeva bubudi anatokidewadewa. Yana manuwa taliya lilivane.’

³³ E ada maduga-mowa fainiya gaimilidi iela ivagauleni. Ada gavesiule lakaina faina udeweku iwakana e ada uelai. Ada tova taidei moyaima Yaubada matane avagauta ke gavana Kauveya giveimeya ani una ifufuyena ada ana nogalina.”

Pita gilumamala Koneliyasi yana yooyavo nodi wagaidiya.

³⁴ E ada Pita givonedi, “Velemoena, malina gaalamanena vaita Yaubada keke kaliva gidaita venuvenuwadadanedi adiitaita wagaidiya, kai yadi yoo o kai gabu ayo gida luluvisi, aku matatabudi giita aigaigabuyedi.†

³⁵ Au babi anakaliva adiyoo seyana seyana wagaidiya, ani gavega wa yadi matauta ive-moimoinena kaduwe igugugai tunutunugina ani iwakadi Yaubada matane.

³⁶ Ada matawa ime meIsileli wagaimeya giimilina ani bademowa waalamanena.† Matawanai valeya iwakana giawamogatalena ani taidei anafaiweya. Yaubada nodi kaveyavo Yeisu Keliso

† 10:34 Lom 2:11 † 10:36 Gug 13:26, Efes 2:13-14

wagain e ada nuwaniwalova giveleveleda. Yeisu Banae kaliva moyaida adaToveimeya.

³⁷⁻³⁸ Kaduwe gaitoma lakaina Yudiya anafafali matatabuna wagaine giyegemona ani bademowa waalamanena, tainei Yeisu kwana Nasaledi faine. Yaubada Banae givenuwadadanena ada Aluwaluwa Tabuna gibiwana Bana wagaine ke gitoyogivelena.[†] Iyoni gimadulumamala kaliva wagaidiya babitaiso faina, aku muliya Yeisu yana gugai Galili anafafali wagaine givevuvuna. Fafali moyaina wagaidiya ginau ke gugai iwakana gigugugaiyedi, ada badi gavega Seitani yana veimeya wagaine imiyamiya ani gikiveiwakanedi, faina Yaubada Banae nodi.

³⁹ “Aku imeyavo ani toitavedama, faina aitanana yana gugai moyaina Yelusalema wagaine, kaduwe meIsileli yama fafali matatabuna wagaidiya. Kelose wagaine itutuvefosena ke iluvealikana

⁴⁰ aku yadayada anaveto wagaine Yaubada alikeya gisiveyawana ke gikiveyegemonina.[†]

⁴¹ Keke kaliva moyaidi wagaidiya gida kiveyegemoni ke idaita, aku ime Yaubada bademowa givenuwadadanema ke yana yawa-vagila faina ana awamogatalena. Ada alikeya giyawa-vagila muline, Bana nodi akani ke ayuga.[†]

⁴² Ada giveimeyema ke kaliva moyaidi wagaidiya ana lumamala ada ana awamogatala vaita Banae-nai ani Yaubada givenuwadadanena, ke kaliva moyaidi gina vevonayavugidi, badi

[†] **10:37-38** Mad 3:16 [†] **10:40** 1Kol 15:4-7 [†] **10:41** Luk 24:42-43

wayawaidiyavo kadu badi alialikadiyavo.†

⁴³ Ada Banae-nai faine falofita matatabudi iawamogatala† vaita gavega ina vetumagana Banae wagaine, badi yadi koyona anavenuwaega Yeisu anayegana wagaine ina nuwagana.”

Aluwaluwa Tabuna badi keke meIsileli inuwagana.

⁴⁴ Ada Pita aimo taidei anafaiweya giifuifufu aku Aluwaluwa Tabuna giobuelai tovanenega moyaidi wagaidiya.

⁴⁵ Ada badi meIsileli tovetumagana Pita nodi Yofa-deya ielai ani meyadi gisidobodobona. Faina Yaubada yana nuwakabubu ani Aluwaluwa Tabuna, badi keke meIsileli wagaidiya kaduwe giveledi.**

⁴⁶ Faina meIsileli tovetumagana bonadi inogalina, meya tulina tulina wagaidiya iifuifufu ke Yaubada iawadavadavana.† Aku tovana meyadina keke ida alamanedi.

Aku Pita givona,

⁴⁷ “Taidei kaliva-dina ani ide Aluwaluwa Tabuna kanuwagana anafaiweya, kadu badi inuwagana. E ada gavaiyamu, kai tamo gaito anafaiweya gina awatadi ke gufa wagaine ina babitaiso? Keke.”

⁴⁸ E ada Pita giveimeyedi ke Yeisu Keliso anayeganeya ina babitaiso.† Babitaiso giavaina, iveolena ke yadayada tufona nodi inamiya.

† **10:42** Mad 16:27, Iyo 5:22,27, Gug 17:31, 2Kol 5:10 † **10:43** Ais 53:5-6, Iyel 31:34 ** **10:45** Tayuwe tova-nai ani tova nagona Aluwaluwa Tabuna badi keke meIsileli givemagadi. Nagona meIsileli gaga givemagadi. † **10:46** Gug 2:4 † **10:48** Mad 28:19, Gug 2:38

11

Pita yana awatalatalaina Yelusalema wagaine.

¹ Aku afositolo ke tovetumagana yadi yoo Yudiya anafafali wagaine imiyamiya, ani inogalina badi keke meIsileli kaduwe Yaubada yana vona ivetumaganena.

² E aku tova-nai Pita gilaka Yelusalema, badi meIsileli tovetumagana-dina, badi tomotomogoloidiyavo ani iawavekoyoyena,

³ ivona, “O unau badi keke meIsileli wagaidiya, taudiyavo keke tomotomogoloidiyavo. Unau ke yadi manuweya uluku, ada taumada nodi wakani!” Taidei anafaiweya ivonena.

⁴ E ada Pita gikivemalidi gaitoma matatabuna iyegemona faidiya.

⁵ Anaebavevuvu wagaine-deya ifufu givebutuna, givona, “Yofa wagaine gamiyamiya ada gaveoveola aku vewala seyana giyegemona wagaikuya. Ada akuvewala-nai wagaine gaitana gaitoma seyana vaita nuya lalafana, ada bwatana laufuli wagaidiya iabi aku gabameyadeya iseobuyena lilivakuya.[†]

⁶ Ada galukemula ani gaitadi kevakeva tulina tulina, madumadugidiyavo, yagayaganidiyavo ke yaveyavegadiyavo.

⁷ Gaitaita aku bonabona seyana ganogalina givona, ‘Pita, una mididi. Tamo kevakeva unamunu una kanina.’

⁸ “Aku Iya gavona, ‘Kauveya, keke-bamowa! Keke tamo tova tamo gavana awaawatana o kai keke yegayegana Yaubada matane gadakani.’

[†] 11:5 Gug 10:9-11

⁹ “Aku bonabona ganogali-vagilena gabameya-deya, givona, ‘Gavana moyaina Yaubada bade-mowa gikiveyegayegenedi ani o keke una vewaga vaita bwanebwanenena Banae matane.’

¹⁰ Ada taidei anafaiweya giyegemona tova toiye, au nuya-nai wa kevakevana isilakaina gabameya.

¹¹ “Aku maduga-mowa kaliva aditoto ielai manuwa-nai wagaine gamiyamiya. Kwana Sisalia giimilidi Iya wagaikuya.

¹² Aku Aluwaluwa Tabuna givoneku, givona, ‘Keke una nuwanuwa faina badi keke meIsileli aku auwe nodi wananau.’ Kaduwe taidei tubuiyadeyavo adisikisi ani Iya nodi anau Sisalia wagaine, ada moyaima Koneliyasi yana manuweya aluku.

¹³ Ada giifufuyema vaita Yaubada yana anelose seyana giyegemona yana manuweya gimididi aku givonena, ‘Kaliva tufodi una imilidi inanau Yofa wagaine ke kaliva seyana ina vagaulena, banae anayegana Saimoni-Pita.

¹⁴ Ada banae matawa gina ifufuyena wagaimiya e ada oyeni ke ya manuwa anatomiyayavo nodiku Yaubada yana kibababala wana nuwagana.’

¹⁵ “Ada tova-nai wagaine Iya gavebutu gaifui-fufu, maduga-mowa Aluwaluwa Tabuna giobuelai badi wagaidiya anafaiweya nagona giobuelai ide wagaideya.[†]

¹⁶ Ada ganuwaududuna Kauveya yana vona-nai givona, ‘Iyoni gufa wagaine gikikivebabitaiso,

[†] 11:15 Gug 2:4

aku imiyavo ani Aluwaluwa Tabuna wagaine wana babitaiso.' †

17 Ada bademowa ide kaalamanena vaita Yaubada Aluwaluwa Tabuna giveledi badi keke meIsileli anafaiweya ide giveleda tova-nai kave-tumagana Kauveya Yeisu Keliso wagaine. E ada Iya vaita gaito ayo akufaiweya Yaubada yana nuwanuwa gana siveyevewewana?"

18 Tova-nai meIsileli tovetumagana Pita yana vona inogalina, au yadi awavekoyo iilovena aku amumu gikuluna. Ada Yaubada iawadavadavana, ivona, "Velemoena badi keke meIsileli kaduwe ani Yaubada giawaegedi ke ina nuwawilana ada yawai-vagata ina nuwagana."

†

Tovetumagana Anitiyoki wagaine ifuifufudi.

19 Aku meIsileli Sitiveni itutuvealikana anatoveya, kaduwe ivebutu ke tovetumagana moy-aidi ikiveuloulolonidi, e ada iawala inau fafali tulina tulina wagaidiya. Tufodi inau atuwadeya fafali anayegana Fonisiya wagaine, tufodi imula anayegana Saifilasi wagaine, kaduwe tufodi Anitiyoki melala wagaine. Ada tayuwe fafali-dina wagaidiya Yeisu yana vona ilulumamalena,† aku meIsileli gaga wagaidiya ilulumamala.

20 Aku tovetumagana tufodi, badi meSaifilasi ada meSailini, ani inau Anitiyoki wagaine ada kaduwe badi keke meIsileli wagaidiya valeya iwakana iifufuyena Kauveya Yeisu faine.

† 11:16 Mad 3:11, Mak 1:7-8, Luk 3:16, Gug 1:5 † 11:18 Mad 8:11, Gug 14:27 † 11:19 Gug 8:1-4

21 Ada Kauveya yana toyogina giveledi e ada yoo lakaina Kauveya wagaine imiyaviladi ke ive-tumaganena.

22 Aku tovetumagana adiyoo Yelusalema wagaine ani taidei valeya-nai inogalina, e ada Banabasi iimilina tovetumagana Anitiyoki wagaine gina itadi.

23 Tova-nai Banabasi giyegemona ke giitana Yaubada yana nuwadogeya gilemelemedi, givemwamwala. Ada givona asevatudi ke wa yadi aseawaega Yaubada wagaine ina tunuvala-vagata, keke inasege.†

24 Faina Banabasi banae kaliva iwakana, gimaga Aluwaluwa Tabuna wagaine ada kaduwe yana vetumagana toyogina. Ada kaliva moyaidi Kauveya wagaine ivetumagana.

25 E ayo Banabasi ginau Tasasi melala lakaina wagaine ke Saulo gina leleni,

26 ada ginuwagana wagaine, givagaule galiyena Anitiyoki. Ada malamala seyana wagaine, badi adiselu ani tovetumagana adiyoo nodi ivagavagauta ke kaliva moyaidi iveve-waledi. Ada Anitiyoki wagaine tovetumagana imaduvewagadi 'Kelisitiani', badi Keliso yana tonogalayavo.

27 Aku tova tayuwe wagaine falofita tufodi Yelusalema-deya ielai Anitiyoki wagaine.

28 Ada kaliva seyana wagaidiya, anayegana Agabasi,† gimididi ke Aluwaluwa Tabuna yana awamogatala wagaine ani loka lakaina faina gimatawedi, givona, "Aimo loka lakaina

† 11:23 Gug 14:22 † 11:28 Gug 21:10

gina yegemona fafali moyaina wagaidiya.” Ada loka-nai giyegemona Loma kini lakaina anayegana Kolodiyasi yana toveya.

²⁹ E ada tonogalayavo moyaidi Anitiyoki wagaine iveimeya ke yadi velekaovo ina imilina tubuiyadiyavo Yudiya wagaine imiyamiya ke ina lemedi. Kaliva seyana seyana gavana adifaiweya, mamauwe tainei inasena.

³⁰ Ada moyaidi yadi velekaovo isena,† ada Babasi ke Saulo mani-nai Yelusalema wagaine inauwena ada tovetumagana aditonagona iveledi.

12

Iyemesa iluvealikana aku Pita deli wagaine isena.

¹ Tova tayuwe wagaine Kini Elodi givebutu tovetumagana adiyoo tufodi gikikiveuloulolonidi lakaina.

² Ada giveimeya ke Iyemesa banae Iyoni anatubuluga† ani benisi wagaine iluvealikana.

³ Iyemesa giluvealikana faina, badi meIsileli gikivemwamwalidi. Ada yadi vemwamwala gitana wagaine, ginuwanuwa Pita anafaiweya gina dewena, e ada giveimeya kaduwe Pita ikiveyabina. Taidei giyegemona Beledi Keke Wa Anayisti Anakanibutu† anatoveya.

⁴ Ada Pita ikiveyabina ke deli wagaine isena, ada Elodi giveimeya ke tolugaviya boudi lafuli anafaiweya ina itaitaveyabina, kaduwe kaliva-moedi lafuli lafuli anafaiweya. Ada ginuwanuwa vaita Nugulina abutuna

† 11:30 Lom 15:26 † 12:2 Mad 4:21 † 12:3 Iyeg 23:14

gina avaina muline, kaliva moyaidi matadiya gina vevonayavugina.

⁵ E ada Pita deli wagaine tolugaviya iitaitaveyabina aku badi tovetumagana adiyoo Yaubada wagaine iveoveola toyogina bana faine.

Anelose Pita gietoyavuna deli wagaine.

⁶ E ada yadayada-nai wagaine Elodi kaliva matadiya Pita gina vevonayavugina, aku bogi wagaine Pita tolugaviya adiselu nefanidiya gidaudau. Bana nimana iyogodi seini iluwei wagaidiya, ada kaduwe tolugaviya tufodi deli anaedawana iitaitaveyabina.

⁷ Pita gidaudau aku KAUYEYA yana anelose giluveyakova ada lilivane gimididi,[†] ada malina tutulagolota-nai gimalivuyona. Ada anelose Pita avalana gitafina ke gilivaguna, givona, “Una madumididi.” Ada maduga-mowa seini nimanе giayavudi aku gimididi.

⁸ Ada anelose givonena, “Abeleta una yogodonena, ageyafayafa una yogona.” Ada giyogodi. Kaduwe anelose givonena, “Anuya badobadona unaose una muliyeku.”

⁹ Ada Pita anelose gimuliye iyegemona deli wagaine-deya, aku keke gida alamane velemona anelose gilivagu giyegemonena. Ginuwanuwa vaita vewala gida yegemona wagaine.

¹⁰ Ada inau tolugaviya boudi nagona isegedi, kaduwe anavelu isegedi aku inau wana kainumu wagaine, wana-nai giyegemona melala wagaine. Ada au wana tauna giayavuna ke melala nefanine igolota. Wai seyana wagaine inaunau,

[†] 12:7 Gug 5:19, 16:26

inau maita adiatuwada gisena ada wadedekudeya anelose maduga-mowa gimadusegena.

¹¹ Ada tova-nai Pita nuwana gimalina gavana giyegemona wagaine faina, givona, “Malinai-mowa bademowa gaalamanena velemonoena, Kauveya yana anelose giimilina ke Elodi nimanedeya gikibababaleku. Ada kaduwe gikibababaleku meIsileli yadi nuwawetumagana wagaine, vaita koyona gida yegemona wagaikuya.”

¹² Tova-nai nuwana gimalina ada ginau Meli yadi manuweya, badi Iyoni inana. Banae kaduwe anayegana Malika. Wadedekudeya kaliva moyaidi bademowa ivagauta ada iveoveola.

¹³ Aku Pita gielai kali anawana wagaine gilufifita, ada togugai akeduna anayegana Loda giela wana gina yavuna.

¹⁴ Pita giifufu ani Loda bona-ituna gialamanena, aku wa yana vemwamwala lakaina faina, wana keke gidayavu aku gimadu giluku ke yoo gimatawedi, givona, “Ee! Pita wamelaleya kali anawana fafaline gimidimididi!”

¹⁵ Ada badi ivonenaga, “O uvekabakabaleya!”

Aku vavine-nai giselakalakavena, givona, “Au velemonoena bona-ituna ganogalina.”

Yana vona gisevelalaina faina, yoo-nai ivona, “Wada yana anelose.”

¹⁶ Aku Pita aimo gilulufifita faina inau wana iyavuna ani iitana, ada meyadi gisidobodobona.

¹⁷ Aku nimane giluwatadi ke gina kuludi aku gavana anafaiweya Kauveya deli wagaine giveyegemonina ani giifufuyedi. Kaduwe

givonedi, “Iyemesa** ada kadu tubuiyadeyavo tovetumagana wana matawedi.” Giifufu giavaina ada ginau kadu fafali seyana wagaine.

¹⁸ Aku mala gilavuna tolugaviya ienovilavila ani Pita iitalelena ada ivetalageyogeyo lakaina gavana giyegemona bana wagaine, ada gadedeku gina.

¹⁹ Ada Elodi tolugaviya giveimeyedi ke ina lenea, aku ilele-wayogena. E ada badi tolugaviya-dina bana Pita kadu deli anaedawana iitaitaveyabidi ani Elodi gitoli-vavagiledi, ada au giveimeya ke ina luvealikadi. Aku muliya Elodi Yudiya gisegena aku ginau Sisalia wagaine gimiyavewa.

Kini Elodi Akalipa gialika.

²⁰ Ada bana Elodi meTaiya ke meSaidoni tova manamanawena nodi ivevonavona toyo-gina, e ada Elodi ginuwakoyo-mowa badi wagaidiya. Taidei faina kaliva iimilidi inau Elodi wagaine. Aku nagona imadunau kini yana togugai lakaina anayegana Balasitasi ivetubuiyana, ada nuwana ikanina ke ginana Elodi nuwana gina kiveiwakanena ada kukuya faine ive-ola. Faina badi yadi fafali anayoo iluveyabina Kini yana fafali wagaine adiga inuwanuwagana.

²¹ Ada Balasitasi Elodi wagaine givona ke tova gisena. E ada yadayada-nai ginuwagana ada kini ananuya kaikaiwabuna giosena ke yana

** **12:17** Yemesa-nai ani Yeisu taina. Aku Iyemesa velugana bademowa odona ilugoloina ani Iyoni tubuiyana. (Gug 15:13, 21:18, Gal 1:19, 2:9,12)

veimeya anaebavetoga wagaine givetoga aku gifufu kaliva wagaidiya.

²² E ada kaliva moyaidi ikovakova, “Wada keke kaliva-mowa bonana, aku wada yaubada seyana bonana!”

²³ Ada kaliva idavadavana anafaiweya aku Elodi giawaegau. Keke Yaubada anayegana gida kilakai. Taidei faina maduga-mowa KAU-VEYA yana anelose Elodi gigai giveoga ada motamota ikudavealikana.

²⁴ Ada fafali tulina tulina wagaidiya Yaubada yana vona Yeisu faine giveiveinala ke gimutumutula.

²⁵ Aku Banabasi ke Saulo bademowa loka anamani iveledi tovetumaganayavo Yelusalema wagaine, ada Iyoni Malika ivagaulena ke nodi iyewadi Anitiyoki.

13

Aluwaluwa Tabuna Banabasi ke Saulo givenuwadadanedi.

¹ Aku Anitiyoki wagaine tovetumagana adiyoo wagaidiya Yaubada bonana anafalofita kaduwe tovewalayavo imiyamiya, badiyavo Banabasi, ke Simiyoni kaduwe ivewagana Kadibowa, ada Luisiyasi banae kwana Sailini, ada kaduwe Maneyeni banae Elodi Galili anatoveimeya nodi ivetubutubulakata, ada kadu Saulo.

² Tova seyana Kauveya wagaine ioduodu kaduwe kani iloilovau aku Aluwaluwa Tabuna givonedi, “Gugai seyana faina Banabasi ke Saulo

gavenuwadadanedi, e ada Iya faikuya adiselu wana seliyedi.” †

³ Ada kani anailova ke veoveola giavaina, ni-madi isedi wagaidiya ke iimilidi.†

Banabasi ada Saulo imula anayegana Saifilasi wagaine ilumamala.

⁴ Ada Aluwaluwa Tabuna Banabasi ke Saulo giimilidi ada itauya, melala anayegana Selusiya wagaine iobu, ada waka wagaine iyage inau imula seyana anayegana Saifilasi wagaine.

⁵ Ada iyegemona melala anayegana Salamisi wagaine, wadedeku meIsileli yadi manuwa ebavewala wagaidiya Yaubada yana vona ilumamale. Iyoni Malika† banae nodi ielai aditoleme faina.

⁶ Ada imula anaebavevuvu wagaine itauya, ada inau imula anamelala lakaidi moyaidi wagaidiya ke iyegemona melala lakaina Pafosi wagaine. Wadedeku-deya tokwelikweli seyana gimiyamiya ani inuwagana, banae anayegana Ba-Yeisu,** kwana Isileli. Ani givona vaita banae Yaubada yana falofita aku givefwayafwaya.

⁷ Ada banae ani imula-nai anatoveimeya tubuiyana seyana, bana anayegana Sediya Paulosi, banae alaalamanina. Ani toveimeya-nai Banabasi ke Saulo gidouwedi, faina nuwanuwana Yaubada yana vona gina nogalina.

† 13:2 Gug 9:15 † 13:3 Gug 6:6 † 13:5 Gug 12:12 ** 13:6 Ba-Yeisu anakivila ani ‘Yeisu Natuna’. Ba-Yeisu-nai tamana anayegana Yeisu, aku banae keke yada Kauveya Yeisu Keliso aku kadu kaliva seyana. Tayuwe tova-nai wagaine tamo ina ke tama ani natudi kaliva ina vewagana Yeisu.

⁸ Aku Ba-Yeisu, anayegana anavelu Elimasi, anakivila vona Giliki wagaine ‘tokwelikweli’, ani banae Banabasi ke Saulo givenibainedi, faina keke nuwanuwana toveimeya-nai Yeisu gina vetumagane.

⁹ Taidei anafaiweya gidewa e ada Saulo, kaduwe anayegana anavelu Paulo,** banae Aluwaluwa Tabuna wagaine gimaga† ayo tokwelikweli-nai giitaitadonena

¹⁰ ada givona, “Oye Seitani natuna. Dewa moyaina yegayegadi Yaubada matane ani o uvenibainedi! Oyen! ani tovefwayafwaya kaduwe kaliva koyo. Tova moyaina Kauveya yana wai tunutunugina ani ukikivebalana.

¹¹ E ada una nogalina. Kauveya bademowa nimana gisena wagainiya, ada o una vematakoyo ke kauwana yana malina keke unaita. Tova mafona wagaine taidei anafaiweya una miyamiya.”

Givona awana giabodana, au Elimasi matana giveowaowa ke giyuyuvana, ada gikibatabatama gaito tamo nimane gidaabi gida nauwe.

¹² Ada toveimeya giitana gavana giyegemona, ada Kauveya Yeisu givetumaganena. Faina yana vewala Paulo ke Banabasi ivewavewalena ani bademowa ginoganogalina wagaine, meyana gisidobodobona.

** **13:9** Yegana-nai Saulo ani vona Ibeliu ada Paulo ani vona Giliki, aku adikivila seyana. Tova-nai Paulo ginau Giliki anafafali wagaidiya, anayegana vona Giliki wagaine giinanana. Aku Isileli anafafali wagaidiya, anayegana vona Ibeliu wagaine giinanana.

† **13:9** Gug 4:8

Banabasi ke Paulo ilumamala Anitiyoki, Pisidiya yana ebaveimeya wagaine.

¹³ Aku Paulo tubuiyanavo nodi Pafosi-deya waka wagaine iyage ada inau melala Pega, tainei Pamifiliya anafafali wagaine. Ada wad-edeku Iyoni Malika gimadusegedi ke giyewana Yelusalema.

¹⁴ Ada Pega isegena aku inau Anitiyoki wagaine, melala-nai Pisidiya anafafali wagaine. Ada Sabate wagaine iluku manawa ebavewala wagaine ivetoga.

¹⁵ Ada manawa ebavewala anatonagonayavo Mosese yana veimeya ke kaduwe falofita yadi vetokiluma wagaidiya iveyawadi. Ada muline matawa iimilina Paulo ke Banabasi wagaidiya, ivona, “Tubuiyameyavo, kai tamo vona asevatu wagaimiya kaliva faidiya aga wana ifufuyena.”

¹⁶ Ada Paulo gimididi nimane giluwatadi ada givona, “Tubuiyakuweyavo imi meIsileli kaduwe imi keke meIsileli aku wa yami matauta Yaubada wavemoimoinena, ani yaku ifufu wana nogalina.

¹⁷ Ide meIsileli yada Yaubada ani tamadeyavo nagona givenuwadadanedi ada adiyoo gikiveinalina tova-nai iveawawala Itipita wagaine. Muliya Yaubada yana toyogina lakaina wagaine givagauledi ada fafali-nai wagaine giyegemonedi.[†]

¹⁸ Ada fafali kavovona wagaine giwaliwaliyedi ada yadi vologilogi malamala foti (40) wagaidiya giatuvefailedi.[†]

[†] **13:17** Iyeg 6:6, 12:51 [†] **13:18** Iyeg 16:35

19 Muliya ielai Kenani wagaine ada Yaubada fafali lakaidi adiyoo seveni giluveyawaliyedi† aku babi-dina giveledi yana kalivayavo yadi babi.

20 Ada taidei gaitoma-dina matatabuna iyege-mona malamala fowa analedi fifti (450) wa-gaidiya. Muliya Yaubada aditoveimeya gisedi analaba Samuwela falofita yana toveya.

21 “Tayuwe tova-nai wagaine iveola kini faine,† e ada Yaubada Saulo giveledi yadi kini.† Banae Kisa natuna, Beniyamina unumina anakaliva. Ada malamala foti wagaine giveimeyedi.

22 Aku muliya Yaubada Saulo yana ebaveimeya givaiyavulena† aku Deivida gisena yadi kini. Ada taidei anafaiweya Yaubada givona banae faine, givona, ‘Gaitanuwigana Deivida Iyese natuna ani banae yana dewa yaku nuwanuwa anafaiweya, e ada nuwaku giabina. Gavana Iya nuwanuwaku gina gugai ani mamauwe gina gugaiyena.’† Taidei anafaiweya Yaubada givona.

23 “Ada tuwai-moena Yaubada givonadabad-aba† vaita Deivida yana tubudelideli wagaine-deya aimo Tokibababala gina aliyena Isileli wa-gaine. E ada giyegemona anafaiweya, Banae Yeisu.

24 Ada Yeisu aimo yana gugai keke gida vevuvu wagaine, Iyoni meIsileli moyaidi wagaidiya gi-madu lumamala vaita yadi gugai koyodi wa-gaidiya ina nuwawilana ke ina babitaiso.†

† 13:19 2Vei 7:1-6 † 13:21 1Sam 8:5,19 † 13:21 1Sam 9:14-27, 10:1 † 13:22 1Sam 13:14, 15:23-28 † 13:22 1Sam 13:14, 16:1 † 13:23 Ais 11:1 † 13:24 Mad 3:1-2, Mak 1:4, Luk 3:3

25 Ada Iyoni yana gugai gida luyabuna ani kaliva givonedi, givona, 'Imi wanuwanuwa Iya vaita gaito? Iya keke kaliva-nai wabodabodana, keke.† Aku kaliva seyana mulikuya gielaelai ani Banae lakai-moena aku Iyayeku kwamana kabisoku. E ada keke akulauboda Bana wagaine gana vetogugai ke anaageyafayafa anabulava gana kiyavu.' †

26 "Tubuiyakuweyavo, imi Ebelaamo yana tubudelideli, kaduwe imi keke meIsileli aku wa yami matauta Yaubada wavemoimoinena, ani wana nogalina. Ide wagaideya valeya taidei Yaubada yana kibababala faina bademowa giimilina.

27 Aku meYelusalema aditoveimeyayavo nodi Yeisu ibavuyena.† Keke ida alamane vaita Banae adiTokibababala, kaduwe falofita yadi vona ani keke ananuwanuwa ida alamane, vona-nai Sabate seyana seyana iveyaveyawana kaliva wagaideya. Taidei faina Yeisu iawavekoyoyena. E ada falofita-dina yadi vona badi ibavuyena ani velemoena badi yadi dewa faina iluveyegemonina.

28 Ada keke tamo yana koyona ida nuwaga ke ida luvealika faina,† aku Pailato iveolena ke banae gina veimeye ina luvealikana.†

29 Ada Yaubada yana vona tuwaina-moena Yeisu faine Buki Tabu wagaine ivetokilumina anafaiweya, badi meIsileli bademowa igugaiyeyabuna, ada muliya anatomuliyavovona kelose

† 13:25 Iyo 1:20 † 13:25 Mad 3:11, Mak 1:7, Luk 3:16, Iyo 1:27 † 13:27 2Kol 3:14-15 † 13:28 Mad 27:22-23, Luk 23:13-15
† 13:28 Mak 14:55, 15:13-14, Luk 23:16-23, Iyo 19:6-16

wagaine ikakilina ada didikula wagaine isena.†

³⁰ Aku Yaubada alikeya gisiveyawana,†

³¹ ada yadayada moyaina wagaidiya giyegeyegemona badi gavega ikwayabuna Galili wagaine inaunau Yelusalema.† Badiyavo tova taidei yana toawatalatalaina meIsileli wagaimeya.†

³² “Aku ime idedeku aelai ke imi wagaimiya valeya iwakana ana awatalatalainena. Tainei valeyanai ani tuwaina Yaubada gavaiyamu tamadeyavo nagona wagaidiya givonadabadaba anafaiweya,

³³ malinai giyegeyemona velemonoena ide meIsileli tubudelideli faideya. Faina Yaubada Yeisu alikeya gisiveyawana, ada taidei anafaiweya yana vonadabadaba giyegeyemona velemonoena. Anafaiweya Same daba tu wagaine ivetokilumina, givona,

‘Oyeni ani Iya Natuku.

Malinai Iya gavetama O wagainiya.’†

³⁴ Yaubada Yeisu alikeya gisiveyawana ada keke gina alika-vagila ayo vovona gina abudali, anafaiweya Yaubada givona,

‘Tuwai-moena Iya Deivida gavonadabadabayena vaita

gaitoma tulina tulina iwakavagaidi ke tabutabudi wagaidiya gana awanuwakabubuyena,

† 13:29 Mad 27:59-60, Mak 15:42-46, Luk 23:50-53, Iyo 19:38-42

† 13:30 Gug 2:24 † 13:31 Gug 1:3 † 13:31 Gug 1:8 † 13:33 Sam 2:7, Ibel 1:5, 5:5

ada taidei yaku vonadabadaba-dina ani
wa adivetumagana.

Ada gaitoma-dina wagaidiya bana gavon-
adabadabayena ani kadu imi wagaimiya
gavonadabadaba.[†]

35 Kaduwe Deivida givona Yaubada wagaine
Same anadaba tulina wagaine, givona,

‘Keke una awaege ya Kaliva Tabutabuna
vovona gina abudali.’[†]

36 Taidei vona-nai ani keke Deivida faine gi-
davona, faina bana wayawaina anatoveya ani
gavaiyamu Yaubada giveimeya anafaiweya, au
gigugaiyena. Ada muliya gialika ada tamanavo
lilivadiya itavuna ke vovona giabudalina.[†]

37 Aku Banae-nai Yaubada alikeya gisiveyawana,
ani keke gida alika-vagila-yo vovona gida abudali.

38 “E ada tubuiyakuweyavo, nuwanuwaku
wana alamane-dewedewena vaita Banae
Yeisu wagaine yami koyona adivenuwaega
wana vaina.[†] Taidei aawatalatalainena
wagaimiya.

39 Bana Yeisu wagaine, badi gavega
ina vetumaganena ani yadi koyona matatabuna
Yaubada gina venuwaegena ke ginasedi
yegayegadi Banae matane.[†] Aku Mosese yana
veimeya wagaine, keke amifaiweya yami
yegayegana Yaubada matane wana nuwaga.[†]

[†] **13:34** Sam 55:3 [†] **13:35** Sam 16:10 [†] **13:36** 1Kin 2:10, Gug
2:29 [†] **13:38** Gug 10:43 [†] **13:39** Lom 10:4 [†] **13:39** Lom 2:13,
3:20, 8:3, Gal 2:16, 3:11, Efes 2:9, 2Tim 1:9, Tai 3:5

⁴⁰ Taidei faina wana itaveyabimi aenanai gavana falofita tuwaina ivonayena ani imi wagaimiya gina yegemona.

⁴¹ Vona-nai givona,

‘Imi toawaveleiga wana nogalina!
Yaumi gina lovoga ada wanakwa,
faina wayawaimi anatoveya gugai seyana
gana gugaiyena.
Kai tamo gaito gugai-nai imi wagaimiya
gina awatalatalainena,
au keke-mowa wana vetumagane.’ ” †

⁴² Tova-nai Paulo gilumamala giavaina, Banabasi nodi iyegeyegemona manuwa ebavewala wagaine, ani kaliva iveoledi toyogina vaita Sabate gielaelai kaduwe inayewa-vagila ke vewala taidei kaduwe ina ifufuyena.

⁴³ Ada kaliva moyaidi manuwa ebavewala wagaine bademowa iyegemona-yabu, ada meIsileli tufona moyaidi ke kaduwe badi keke meIsileli aku meIsileli yadi tafalolo wagaine iawaegedi ke Yaubada wagaine ioduodu, ani badi nodi Paulo ke Banabasi imuliyedi. Ada Paulo ke Banabasi nodi iifufu ada ivona asevatudi ke Yaubada yana lemeya ke yana nuwadogeya ina tunutunuvala wagaine.

⁴⁴ Ada Sabate anavelu wagaine melala-nai anatomya moyai-moedi ivagauta ke Kauveya yana vona ina nogala.

⁴⁵ Aku meIsileli kaliva lakaidiyavo iitadi yoo lakaina ani keke badi wagaidiya ida nauna aku

† 13:41 Ais 29:14, Abak 1:5

aiyada inaunau Paulo ke Banabasi ivanevane-negedi, e ada iveumagigi lakai-moena.† Ada Paulo yana vona iawavefwayafwayayena ada ivona awadamanena.

⁴⁶ Aku Paulo ke Banabasi wa yadi asevatu ivonedi, “Gilubodana Yaubada yana vona anamadu awatalatalainena imi meIsileli wagaimiya. Aku vona-nai ani wadibusoyogena, ada taidei wagaine taumiyavo waseyegemonemi vaita keke amilauboda ke yawai-vagata wana nuwaga.† Taidei faina ani au imiyavo wana miyamiya aku ime ananau badi keke meIsileli wagaidiya ana lumamala.

⁴⁷ Ananau wagaidiya faina Kauveya veimeya givema, givona,

‘Oyeni gaimilini ke badi keke meIsileli wagaidiya malina una nauwena,
e ada o wagainiya tomiyababi matatabudi adifaiweya kibababala ina nuwagana.’ ” †

Taidei anafaiweya Kauveya giveimeyema.

⁴⁸ Aku badi keke meIsileli yadi vona inogalina ada ivemwamwala-mowa, ivonavona, “Kauveya yana vona iwaka-vagaina.” Ada badi gavega Yaubada givenuwadadanedi ke yawai-vagata ina nuwagana ani ivetumaganena.

⁴⁹ Ada tayuwe fafali-nai matatabuna wagaine Kauveya yana vona iifufuyedadanena ada kaliva moyaidi inogalina.

† 13:45 Gug 17:5 † 13:46 Mad 21:43, Gug 18:6 † 13:47 Ais 42:6, 49:6, Luk 2:32

⁵⁰ Aku meIsileli imididi ke badi melala-nai anatonagonayavo kadu vevine adiyegana lakaidi badi Yaubada anatooduoduyavo, ani isibaledi ke iivenuwanu wadi toyogina. E ada Paulo ke Banabasi ivenibainedi ada yadi fafali wagaine ivenegadi.

⁵¹ Aku Paulo ke Banabasi melala-nai anasivu agediya ivatuegegena, wada iyaiyaya seyana aimo Yaubada yana matavuloga wagaidiya faina. E au inau Ikoniya mu wagaine.[†]

⁵² Aku tonogalayavo Anitiyoki wagaine Aluwaluwa Tabuna wagaine imaga ada ivemwamwala lakaina.

14

Paulo ke Banabasi ilumamala Ikoniya mu wagaine.

¹ Aku Paulo ke Banabasi Ikoniya mu wagaine iyegemona ada yadi dewa anafaiweya, meIsileli yadi manuwa ebavewala wagaine iluku ke ilumamala. Yadi laumamala kaliva aseasedi gionana e ada meIsileli kaduwe badi keke meIsileli moyaidi ivetumagana Yeisu wagaine.

² Aku meIsileli tufodi yadi laumamala keke ida vetumagane, ani badi keke meIsileli nuwadi isibaledi e ada inuwakoyo Paulo ke Banabasi wagaidiya.

³ Aku auwe wadedeku-deya adiselu imiyamiya maita tova manamanawena, ada wa yadi asevatu nodiku iifuifufu Kauveya faine. Ada Kauveya

[†] **13:51** Mad 10:14-15, Mak 6:11, Luk 9:5, 10:8-12

yana toyogineya gugai lakaidi ke ebameyasido-bodobo igugaiyedi. Taidei anafaiweya gitoyogiveledi, e ada kaliva ina alamanena yadi laumamala yana nuwadoga faina ani velemonoena.[†]

⁴ Ada kaliva moyaidi melala-nai lakaina wagaine ani iluididi. Tufodi meIsileli imuliyedi aku tufodi afositolo adiselu imuliyedi.

⁵ Ada badi keke meIsileli ada badi meIsileli ke aditonagonayavo nodi iveimeya aigaigabu ada Paulo ke Banabasi ina kiveuloulolonidi ada kabaleya ina tutuvealikadi.

⁶ Aku yadi nuwanuwa valeyana adiselu ikaiyanogala, ada iota inau Likoniya anafafali wagaine, melala iluwei Lisita ke Debi wagaidiya iluku ada kaduwe melala tufodi lilivadiya.

⁷ Ada wadedeku kaduwe valeya iwakana Kauveya Yeisu faine ilumamalena.

Paulo ke Banabasi Lisita ada Debi wagaidiya ilumamala.

⁸ Aku kaliva seyana Lisita wagaine agena memeluyadi gitubuga, ada keke maita gida nunudadana yawaina matatabuna wagaine.

⁹ Ada kaliva-nai givetogana aku Paulo yana laumamala givanevanenegena. E au Paulo tovefela-nai giitaitadonena ke gialamanena banae givetumagana vaita Yaubada anafaiweya gina kiveiwakanena.

¹⁰ E ada Paulo givona bonana lakaina tovefela-nai wagaine, givona, "Una mididi!" Ada kaliva-nai gimadumididi-mowa ada ginudadana.

[†] 14:3 Mak 16:20

11 Tova-nai yoo iitana gavana Paulo gigu-gaiyena, ada ikovakova taudiyavo meyadiya vona Likoniya wagaine, ivona, “Yada yaubada iluwei ivekaliva ada iobuelai ide wagaideya!” **

12 Ada Banabasi ivewagana Seusi, banae meGiliki yadi yaubada aditonagona, aku Paulo ivewagana Emesi, banae yadi yaubada yana tomatawa. Faina banae tovana.

13 Yadi yaubada-nai Seusi ani yana manuwu ebaoduodu gimiyamiya melala-nai anamatalaviseya, ada wadedeku kaliva ioduodu bana wagaine. Ada Seusi yana tovebolavoi ani bulumakau ke veiya uyauyadi kevakeva-dina giveiveigavudi gialiyedi melala anaedawana wagaine. Banae kaduwe yoo nodi nuwanuwadi kevakeva ina munudi ada ina vebolavoi Paulo ke Banabasi wagaidiya.

14 Aku tova-nai afositolo adiselu ikaiyanogala gavana inagai ada adinuya ikelilidi** aku imadu iluku yoo adimwatuguya aku ikovakova ivona,

15 “Kaliva, gavana faina tainei wagugai anafaiweya? Ime kaduwe tomiyababi, kaliva-mowa anafaiweya imiyavo! Ime aelai valeya iwakana aaliyena wagaimiya, e ada yami awadavadava gaitoma-kavokavovo wagaidiya wana segedi aku wana miyavilami Yaubada miyamiyani-vagaina wagaine. Au Banae Yaubada-nai gabama, babi ke

**

14:11 Badi meGiliki ani yaubada fwayafwaya moyaina wagaidiya ioduodu. Yaubada-dina aditonagona ivewagana Seusi ada yadi tovana ivewagana Emesi. E ada badi meLisita inuwanuwa vaita Banabasi ani Seusi aku Paulo ani Emesi, faina Paulo banae tovana.

** **14:14** Dewa-nai ‘adinuya ikelilidi’ ani meIsileli yadi ebaita nuwavita lakaina faina.

leyaga ada kaduwe gaitoma moyaidi wagaidiya imiyamiya ani gibubudi.

¹⁶ Tova tuwaina-deya babi anayooyavo moyaidi ani Yaubada giawaegedi ke taudiyavo gaga yadi nuwanuwa ina gugaiyedi.

¹⁷ Aku yana iyaiyaya wagaideya imiyamiya. Yana nuwakabubu tova moyaina giavetavetala e ada kana alamanena Yaubada velemono gimiyamiya. Banae wei giveimeyena ke giobuobu gabameya-deya, kaduwe aa giveimeyedi ke itubutubuga. Adaga giveleveleda adafaiweya, ada nuwada gikiveiwakanena ke kavemwamwala lakaina.”

¹⁸ Taidei anafaiweya Paulo ke Banabasi ivona, aku vaita yoo-dina ida atuvefaila ida vebolavoi wagaidiya.

¹⁹ Aku meIsileli tufodi Anitiyoki ke Ikoniyamu wagaidiya-deya ielai ada yoo nuwadi ikanina vaita Paulo yana ifufu ani keke vona velemono.[†] E ada badi inuwakoyo Paulo wagaine ada kabaleya ifiyafiyana vaita ida tutuvealikana. Moyaidi inuwanuwa vaita gialika, e ada melala negenine itai iyegemone isena.

²⁰ Aku muliya tonogalayavo iela imidififina ani Paulo gimididi ada giyewa-vagilena melala wagaine. Mala gilavuna banae ke Banabasi itauya inau Debi melala wagaine.

Paulo ke Banabasi iyewadi Siliya anamelala Anitiyoki wagaine.

²¹ Debi-deya valeya iwakana ilumamalena, ada kaliva moyaidi valeya-nai ivetumaganena ke

[†] 14:19 Gug 17:13

ivetonogala. Ada Paulo ke Banabasi imiyamiya aku kadu iyewa-vagiledi Lisita. Wadedeku-deya inau Ikoniyaumu, ada inau Anitiyoki, tainei Pisidiya wagaine.

²² Ada yadi balawalilivuga-nai wagaine tonogalayavo ikivetoyogidi melala seyana seyana wagaidiya ke yadi vetumagana keke gina kabekabebe, ada ivona asevatudi ke tova moyaina Yeisu ina vetumaganena. Ada kaduwe ivonedi, ivona, “Kai nuwanuwada tova mulina kanaluku Yaubada yana ebaveimeya wagaine, nagona vita moyaina kana nuwagana.” †

²³ Ada badi tovetumagana adiyoo melala seyana seyana wagaidiya Paulo ke Banabasi inau, ani aditonagonayavo ivenuwadadanedi. Ada kani illovau aku iveoveola, ivona, “Kauveya, taidei kaliva ke vevine Oye wagainiya bademowa ivetumagana, e ada aatuegedi Oye nimaniya ke una itaitaveyabidi.”

²⁴ Taidei anafaiweya Paulo ke Banabasi iveola aku itauya. Ada igolota inaunau Pisidiya anafafali wagaine aku iyegemona Pamifiliya anafafali wagaine.

²⁵ Ada melala Pega wagaine valeya iwakana ilumamalena ke muliya iobu melala Ataliya.

²⁶ Ada wadedeku-deya waka wagaine iyage ada kaduwe iyewadi Anitiyoki, melala-nai wagaine yadi gugai ivevuvuna. Wadedeku tovetumagana nagona Yaubada iveolena ke wa yana nuwadoga gina itaveyabidi Bana yana gugai ina faifaisewa wagaine.† Ada au Paulo ke Banabasi bademowa

† 14:22 2Tim 3:12 † 14:26 Gug 13:1-3

gugai-nai iluyabuna.

²⁷ Tova-nai Anitiyoki wagaine bademowa iyegemona ada tovetumagana adiyoo idouwevagauwidi ke gaitoma moyaina Yaubada gigugaiyena badi nodi yadi balawalilivuga-nai wagaine ani iifufuyena. Kaduwe vetumagana anawai Yaubada giyavuna badi keke meIsileli faidiya ani iawatalatalainena.[†]

²⁸ Ada wadedeku-deya Anitiyoki wagaine tonogalayavo nodi imiyamiya tova manamanawena.

15

Vekwageya giyegemona melala Anitiyoki wagaine.

¹ Imiyamiya aku tova seyana kaliva tufodi Yudiya wagaine-deya iobuelai Anitiyoki, ada ivebutu tovetumagana badi keke meIsileli ani ivewavewaledi, ivonavona, “Kai keke Yaubada yana iyaiyaya vovomi bubuna wana tomogoloi Mosese tuwaina giveimeya anafaiweya, keke amifaiweya kibababala wana nuwaga.”[†]

² Ada Paulo ke Banabasi kaliva-dina nodi ivevonavona toyogina yadi vewala faina. Taidei faina tovetumagana Anitiyoki wagaine Paulo ke Banabasi ada kaduwe kaliva tufodi ivenuwadadanedi ke inanau Yelusalema, e ada wadedeku-deya nuwanuwa taidei faine ina veimeya, afositolo ke tovetumagana aditonagonayavo nodi.

³ E ada tovetumagana adiyoo ivagatunedi, ada Fonisiya ke Sameliya adifafali wagaidiya igolota

[†] 14:27 Gug 15:12 [†] 15:1 Gal 5:2

inaunau aku tovetumagana fafali-dina wagaine imatamatawedi vaita badi keke meIsileli ani bademowa Kauveya wagaine inuwavilana ke ivetumagana. Ada meFonisiya ke meSameliya tovetumagana taidei valeya-nai inogalina ada ivemwamwala lakaina.

⁴ Tova-nai iyegemona Yelusalema wagaine, tovetumagana adiyoo ada afositoloyavo ke aditonagonayavo nodi isivaivaidi, ada gavana Yaubada yadi gugai wagaine gigugaiyena ani matatabuna iawatalatalainena wagaidiya.

⁵ Aku tovetumagana tufodi, badiyavo Falisi adiyoo, ani imididi ivona, “Gilubodana badi keke meIsileli ani wana vonedi ke iyaiyaya vovodi bubuna ina tomogoloina, kaduwe wana veimeyedi ke Mosese yana veimeya matatabuna ina itaveyabina.”

⁶ E ada afositoloyavo ke tovetumagana adi-tonagonayavo imiyavagauta ke nuwanuwa taidei faine ina veifuifufuyena.

⁷ Ada nodi iveifuifufu tova manamanawena ani Pita gimididi givonedi, givona, “Tubuiyakuweyavo, imi waalamanena tuwaina Yaubada ide wagaideya-deya Iya givenuwadadaneku ke valeya iwakana gana lumamalena badi keke meIsileli wagaidiya, e ada ina nogalina ke Kauveya ina vetumaganena.

⁸ Ada Yaubada Banae gavana kaliva yada nuwanuwa aseasedeya gialamanena, ani Aluwaluwa Tabuna giveledi badi keke meIsileli anafaiweya ide giveleda,[†] ada ida yana awaega

[†] 15:8 Gug 2:4, 10:44

wagaina Banae yana nuwanuwa iwakana badi keke meIsileli wagaidiya gikiveyegemonina.

⁹ Ideyavo ke badiyavo Yaubada matane ani keke tamu ludaka gida miyami faina, badi Yeisu ivetumaganena ke aseasedi gikiveyegayeganena.[†]

¹⁰ E ada gavaiyamu-yo Yaubada wagaluvaluva ke meyameyaganina gina nuwakoyo? Ani taidei anafaiweya, nuwanuwami Mosese yana veimeya matatabuna wana veledi tonogala badi keke meIsileli ina itaveyabina, aku veimeya-dina ani tamadeyavo nagona ke ide malinai keke adafata kada mulimuliyedi. Ina vaita ewa vitamoenasena badi avaladiya.

¹¹ Keke anafaiweya! Faina taidei anafaiweya kavetumagana: Ida Kauveya Yeisu yana nuwadoga wagaine adakibababala kanuwagana. Ada badi mamauwe kaduwe, Kauveya Yeisu yana nuwadoga wagaine adikibababala inuwagana.”[†]

¹² Aku Pita yana vona wagaidiya yoo matatabudi amumu gikuluna, e ada Banabasi ke Paulo iifuifufu ani badi ivanenegedi. Iawatalatalainedi gavaiyamu Yaubada toyogina giveledi ke gugai lakaidi kadu ebameyasidobodobo igugaiyedi badi keke meIsileli adimwatuguya.

¹³ Badi iifufu giavaina, bana Iyemesa gimididi givona, “Tubuiyakuweyavo, yaku vona wana nogalina.

¹⁴ Banae Saimoni bademowa giifufu wagaideya gavaiyamu nagona Yaubada badi keke

[†] 15:9 Gug 10:1-43, 11:4-17 [†] 15:11 Gal 2:16, Efes 2:5,8, 2Tim 1:9, Tai 2:11, 3:7

meIsileli giitanuwakalikaliyedi ada tufodi givenuwadadanedi Tauna faine.

¹⁵ Ada tainei anafaiweya tuwai-moena Buki Tabu wagaine falofita imaduawatalatalainena, ivona,

¹⁶ 'Taidei gaitoma-dina muline Iya Yaubada gana yewaku, ada Devida anamanuwa sinininila** bade gibeu ani ganayogo-vagilena. Manuwa-nai anagaitoma-dina iyawelidi ani ganayogo-vagiledi.

¹⁷ E ada yoo anatufo, tainei badi keke meIsileli wagaidiya gavega gavenuwadadanedi Tauku faikuya, ani kaduwe ina leleku. Taidei anafaiweya Iya KAUYEYA gavona, Iyaye-kuna taidei gaitoma-dina gana gugaiyedi.

¹⁸ Bademowa tova tuwai-moena gaitoma-dina gamaduvonayedi.' "†

¹⁹ Kaduwe Iyemesa givona, "Taidei faina yaku nuwanuwa taidei anafaiweya. Badi keke meIsileli Yaubada wagaine imiyaviladi ani keke veimeya moyaidi vitadi kada veledi.

²⁰ Aku au yadi leta kada vetokilumina, ada kada vonedi vaita kevakeva mali kaliva inauwedi ivebolavoiyedi yaubada fwayafwaya adikilumina wagaidiya ani keke inakani, tayuwe kevakeva-dina keke yegayegadi Yaubada matane. Kaduwe kaliva keke mali vavine nodi ina dauda, anafaiweya vevine keke mali kaliva nodi

** ^{15:16} Devida yana manuwa sinininila ani vonaluvefosa Devida yana ebaveimeya faine. † ^{15:18} Emos 9:11-12

ina dauda. Au moganena ke vavinena nodi gaga inadau.[†] Kaduwe kevakeva agodi sisifuwadi, dayagidi keke gidamadu ani keke inakani, ada kaduwe dayaga keke inayui.[†]

21 Taidei anafaiweya kana vonedi, faina Mosese yana veimeya kaliva moyaidi bademowa ialamanena. Faina tuwai-moena gielai malinai, melala moyaina wagaidiya kaliva moyaidi gavana Mosese yana veimeya anafaiweya iveyaveyawa Sabate seyana seyana manawa ebavewala wagaidiya.” Taidei anafaiweya Iyemesa yana vona.

Afositolo ke kaliva lakaidiyavo leta iimilina tovetumagana badi keke meIsileli wagaidiya.

22 E au afositolo ada tovetumagana aditonagonayavo, kaduwe tovetumagana adiyoo matatabudi yadi veifuifufu giavaina, muline iveimeya aigaigabu ke kaliva tufodi yadi yoo wagaine-deya ina venuwadadanedi ke ina imilidi melala Anitiyoki Paulo ada Banabasi nodi. Ada kaliva adiselu ivenuwadadanedi, badiyavo Yudasa kadu anayegana Basabasi, ada Sailasi. Badi adiselu ani wa adivemoimoina tovetumagana adimwatuguya.

23 Ada leta iveledi ina nauwena. Leta-nai taidei anafaiweya ivetokilumina, ivona,

“Siule tubuiyameyavo. Ime tubuiyamiyavo afositolo ke tonagonayavo nodi yama vesiule wagaimiya, imi keke meIsileli wamiyamiya Anitiyoki, Siliya, ada Silisiya wagaidiya.

[†] 15:20 1Kol 6:18, 10:7-8, Ive 2:20 [†] 15:20 Vei 17:10-14

24 Ime akaiyanogala vaita kaliva tufodi yama yoo wagaimeya-deya iela wagaimiya ke yadi vona wagaidiya ikiveaseuloulolomi ada nuwami ikivevitana. Aku keke yama veimeya wagaine idaela.

25 Taidei faina moyaima yama nuwanuwa seyana wagaine aveimeya ke yama kaliva tufodi avenuwadadanedi ada wagaimiya aimilidi. Badi tubuiya aseasemeyavo Banabasi ke Paulo ani nodi inaelai.

26 Badi adiselu bademowa ialamanena vaita yada Kauveya Yeisu Keliso anayegana faina meyameyaganina gilagi ina nuwagana, aku au taudiyavo iawaegedi yana gugai wagaine.

27 Tainei faina yama kalivayavo adiselu Yudasa ke Sailasi aimilidi e ada awadiya ina talakakila anafaiweya gavana leta taidei wagaine avetokilumina.

28 Au Aluwaluwa Tabuna matane ada kaduwe ime matameya gilubodana ani keke veimeya moyaina wagaimiya anasei, aku taidei veimeya lakainaga anasena.

29 Veimeya-dina ani taidei anafaiweya. Kevakeva kaliva inauwedi ivebolavoiyedi yaubada fwayafwaya adikilumina wagaidiya ani keke wana kanikani. Kaduwe keke dayaga wana yuyui, ada kevakeva agodi sisifuwadi dayagidi keke gidamadu ani keke wana kanikani. Kaduwe keke vovomi wana awaawaegge-kavokavovodi. Kai taidei awata-dina wana itaveyabi-dewedewedi, aga wanamiya iwakana.

Taidei yama nuwanuwa-nai anatubuga.
Kafoi.”

³⁰ Ada kaliva iimilidi Yelusalema-deya ke inau Anitiyoki, wadedeku tovetumagana adiyoo moy-aidi idouwevagauwidi ada leta-nai iveledi.

³¹ Tova-nai leta iveyawana ada ivemwamwala lakaina, faina adimatawa iwakana gikiveasevatudi.

³² Ada Yudasa ke Sailasi badiyavo falofita ani vona moyaina wagaidiya tovetumagana ikiveasevatudi ke ikivetoyogidi.

³³ Ada wadedeku-deya imiyamiya maita tova manamanawena, ada ikidewadewa inayewavagiledi. Ada badi tovetumaganayavo ivonedi, “Nuwaniwalova wagaine wanana,” ke iimilidi iyewadi badi aditoimila wagaidiya. [

³⁴ Aku bana Sailasi nuwanuwana ginamiya wadedeku faina keke gidana.]**

³⁵ Aku Paulo ke Banabasi nodi imiya tova manamanawena Anitiyoki wagaine, ada badiyavo ke kaduwe kaliva tufodi nodi ivewavewala ada Kauveya yana vona ilulumamalena.

Paulo ke Banabasi ivetutudaka.

³⁶ Imiyamiya aku yadayada tufona giavaidi, Paulo Banabasi givonena, givona, “Kanayewavagileda melala moyaina wagaidiya taine gadedeku Kauveya yana vona kalulumamalena. Kanana tubuiyadeyavo tovetumagana kana madubodadi, ke kana itadi gavaiyamu imiyamiya yadi vetumagana evaguna wagaine.”

³⁷ Banae Banabasi ani nuwanuwana Iyoni Malika gina vagaule nodi kaduwe inana.

** **15:34** Kaliva tufodi Buki Tabu tuwai-moena ivetokilumi-vedamana ani maita teti fowa (34) ivetutamwaina.

38 Aku Banabasi yana nuwanuwa Paulo matane ani keke iwakana, faina nagona Pamifiliya wagaine Iyoni Malika ginuyabuyabudi ke giyewana. Keke gida atuvefaila nodi yadi faisewa wagaine.†

39 Ada Paulo ke Banabasi nodi igavekwavekwageya, e ada ivetutudaka. Banabasi Iyoni Malika givagaule ginauwe waka wagaine iyage ke inau Saifilasi imula wagaine.

40 Aku bana Paulo ani Sailasi givenuwadadana ke givagaulena nodi inanau. Ada badi tovetumagana iveoveola adiselu faidiya, ada Kauveya nimane isedi ke yana nuwadogeya gina lemedi. E ada Paulo ke Sailasi nodi itauya,

41 ada ibalawalilivuga Siliya ke Silisiya adifafaliya ke tovetumagana adiyoo ikikivetoyogidi.

16

Timoti ani Paulo ke Sailasi gikwayabudi.

1 Ada yadi balawalilivuga-nai wagaine inau Debi ke muliya Lisita, wadedeku tonogala seyana gimiyamiya anayegana Timoti.† Inana ani kaduwe tovetumagana,† ada badi vine Isileli aku tamana ani kwana Giliki.

2 Ada tovetumagana moyaidi Lisita ke Ikoniyaumu wagaidiya Timoti iawaveiwakanena,

3 e ada Paulo nuwanuwana Timoti gina kwayabu nodi inanau. Aku tayuwe melaladina wagaidiya ani meIsileli imiyamiya, ada moyaidi ialamanena banae ani tamana kwana

† 15:38 Gug 12:25, 13:13, Kol 4:10 † 16:1 Fip 2:19-22 † 16:1 2Tim 1:5

Giliki. Tainei faina Paulo Timoti vovona bubuna gitomogoloina e ada meIsileli keke ina awaididiye.

⁴ Ada Paulo ke tubuiyanavo nodi ibalabala walilivuga melala seyana seyana wagaidiya, aku afositolo ke tonagonayavo Yelusalema wagaine gavaiyamu iveimeya[†] ani badi tovetumagana imatamatawedi, e ada yadi veimeya-dina ina matamatawalewaleyna.

⁵ E ada tovetumagana adiyoo tulina tulina yadi vetumagana gitubuga, ke yadayada seyana seyana wagaidiya yoo giveiveinala.

Paulo kwana Masedonia gienoitana.

⁶ Ada Paulo anatokwayabu nodi inunudadana ani Aluwaluwa Tabuna keke gida awaegedi fafali Eisiya wagaine valeya iwakana ina lumamale. Taidei faina, fafali Filidiya ke Galetiya nefanidiya inaunau.

⁷ Ada tova-nai ielai fafali anayegana Maisiya tu-fone ke igaluvaluva vaita idaluku Bitaniya yana ebaveimeya wagaine, aku Yeisu Aluwaluwana kaduwe keke gida awaegedi.

⁸ Taidei faina Maisiya igolota inaunau aku melala Tolowasi wagaine iyegemona.

⁹ Ada bogi-nai wagaine Paulo gienoitana, ada yana enoitana-nai wagaine ani giitana kwana Masedonia gimidimididi aku giveoveolena toyogina, givona, “Udaelai Masedonia ke uda lemema.”

¹⁰ Ada Paulo taidei anafaiweya gienoitana faina, maduga-mowa akidewadewa ana madunau

[†] 16:4 Gug 15:23-29

Masedonia.** Au anuwanuwa vaita Yaubada givenuwadadanema ke valeya iwakana meMasedonia wagaidiya ana lumamalena.

Lidia givetumagana Yeisu wagaine.

¹¹ E ada Tolowasi-deya waka wagaine ayage ke tunutunugina anau imula anayegana Samotelesi wagaine adau. Mala gilavuna adamana melala anayegana Niyafolisi.

¹² Ada wadedeku aobu, e ada Niyafolisi-deya anau Filipai. Filipai ani Masedonia anafafaliya gimiyamiya, tayuwe fafali-nai wagaine Filipai melala lakaina. Ada melala-moena badi meLoma ivemelala. Wadedeku-deya yadayada tufona amiyamiya.

¹³ Ada Sabate wagaine melala lakaina anaedawaneya ayegemo anau gufa afaine. Anuwanuwa vaita meIsileli yeoveola faina tova moyaina ida vagavagauta fafali-nai wagaine. Tova-nai ayegemona ada avetoga aku vevine bademowa-deya ivagauta ani avebutu aifuifufu wagaidiya.

¹⁴ Ada tovanenega-dina wagaidiya vavine seyadi imiyamiya adiyegana Lidia, yadi melala Taiyatila. Badi yadi gugai ani nuya yabeyabelidi fatadi lakaina ivekivekimoneyedi. Badi vavine-dina keke vine Isileli aku Yaubada wagaine ioduodu. Ada KAUVEYA nuwadi gikiyavuna ke Paulo yana vona ivetumaganena.

¹⁵ Ada badiye ke yadi manuwa anatomiyayavo moyaidi nodi ibabitaiso. Ada ibabitaiso giavaina,

** **16:10** Tamo tova Luke ginau Paulo nodi ada givona anafaiweya, 'anau'. Aku tamo tova Luke keke gida kwayabu e ada givona anafaiweya, 'inau'.

iveolema toyogina ivona, “Kai imi wanuwanuwa vaita ime Kauveya anatovetumagana velemono, wanaelai ada yama manuweya wanamiya.” Ada iveolema anafaiweya ada anau.

Paulo ke Sailasi Filifai-deya isedi deli wagaine.

¹⁶ Ada tova seyana anaunau ehaveoveola anafafaliya aku togugai yogoyogona** vavine waiya ginuwagama. Banae vavine-nai aluwaluwa bwanebwanenena givemagana, ada aluwaluwa-nai alamana givelevelena ke gavana aimo gina yegemona ani giawaawamogatalena. Ada moyaidi vavine-nai anatoveimeya mani iveleveledi, faina gina awamogataledi aimo gavana gina yegemona badi wagaidiya. Banae yana awamogatala wagaine anatoveimeya mani lakaina inuwanuwagana.

¹⁷ Ani vavine-nai Paulo kaduwe ime nodi givevemulitagoyema aku givedovedou, givonavona, “Taidei kaliva-dina Yaubada Togetanemwane yana togugaiyavo. Kibababala anawai faina imi wagaimiya iawatalatalainena.”

¹⁸ Taidei anafaiweya givedovedou yadayada moyaina wagaidiya e ada Paulo dibuna gisoyoga. Ada gimiyavilana aluwaluwa bwanebwanenena givonena, givona, “Yeisu Keliso anayeganeya gaveimeyeni vavine tainei wagaine una yegemona!” Ada maduga-mowa giyegemona.

** **16:16** Togugai yogoyogodi ani keke tamo mani idavai yadi faisewa faina ada kaduwe keke adifata yadi faisewa ina segena. Ada kai aditoveimeya ina dibusoyogedi, meyameyaganina ina vekimoneyedi vaita bawe.

¹⁹ Aku vavine-nai anatoveimeyayavo iitanuwagana vaita yadi mani anaebanuwaga banae wagaine bademowa giavaina ke yadi nuwavetumagana yadi kaikaiwabu faina kadu giavaina, e ada Paulo ke Sailasi ikiveyabidi ada isitaitaidi inauwedi ebavevonayavuga ke melala anatoveimeyayavo matadiya inasedi.

²⁰ Ada Paulo ke Sailasi ialiyedi tovevonayavuga wagaidiya aku ivona, "Taidei kaliva-dina badiyavo meIsileli, ada badi faidiya vekwageya giyegemona yada melaleya.

²¹ Faina giduwa tulina tulina ivevewaleyledi, ada dewa-dina ide Loma kaliva adaveimeya iawatadi. Ide Loma kaliva faina, keke adafaiweya yadi vewala kana matawalewaleye o kai kana gugaiye."

²² Badi togugai yogoyogona anatoveimeya taidei anafaiweya ivona, ani yoo ivebutu Paulo ke Sailasi imunumunudi. Ada melala anatoveimeyayavo iveimeyedi tolugaviya ada Paulo ke Sailasi adinuya ina veyalilidi aku feto wagaine ina lavulavudi.[†]

²³ Ada ilumalimaliwavudi giavaina, deli wagaine isedi, ada deli anatoitaveyabina iveimeyena ke gina itaveyabi-dewedewedi.

²⁴ Ada toitaveyabina taidei veimeya-nai ginogalina ke tutulagolota totomuya-mwaeya gisedi aku agedi ai folefoledi wagaidiya givelukudi ada gikivetoyogina.

²⁵ Aku boginafa Paulo ke Sailasi iveoveola ke ikwelikweli Yaubada wagaine[†] aku badiyavo kaliva yogoyogodiyavo moyaidi ivanevanenegedi.

[†] **16:22** Mad 10:17-18 [†] **16:25** Sam 42:8, Kol 3:16

²⁶ Ada maduga-mowa mabibi lakaina gimadu ke deli anaavutuwa giliuna. Ada manuwa-nai anawana matatabuna imaduayavuga ke kaduwe yogoyogodiyavo matatabudi adiseini iayavuga.

²⁷ Ada deli anatoitaveyabina gienotafetafe-wana ada tova-nai giitadi wana yavuyavudi, ginuwanuwa vaita kaliva moyaidi bademowa ida otayabu faina, yana benisi gisiwakawakana ke tauna gina luvealikana.**

²⁸ Ani Paulo givedou bonana lakaina wagaine, givona, "Keke tauni una luvealikani! Ime moyaima idauwe amiyamiya!"

²⁹ Ada toitaveyabina givedou malina faina. Tova-nai mayale givaina ada wa yana matauta ke wa vetatavina gimadu giluku Paulo ke Sailasi agediya tugana givetodonena.

³⁰ E ayo toitaveyabina givagauledi giyege-monedi ke gitolidadanedi, givona, "Kaliva, gavana ganagai ayo Yaubada yana kibababala gana nuwaga?"

³¹ Ada ivonena, "Kauveya Yeisu una vetumaganena ada kibababala una nuwagana, oyeni ke kaduwe ya manuwa anatomiyayavo nodi."

³² E ada Kauveya yana vona iifufuyena banae ke yana manuwa anatomiyayavo moyaidi wagaidiya.

³³ Ada boginafa-nai wagaine toitaveyabina givagauledi ginauwedi ke adikima gikoladi, ada

** ^{16:27} Loma yadi veimeya ani kai kaliva yogoyogona ginaota aga anatoitaveyabina ina luvealikana, keke gida itaveyabi-dewedewe faina.

maduga-mowa bogi-nai wagaine banae ke yana manuwa anatomiyayavo moyaidi ibabitaizo.

³⁴ Babitaizo muline, deli anatoitaveyabina gilukuwedi yana manuweya ada adiga gikide-wadewena ke ikani. Banae ke yana manuwa anatomiyayavo moyaidi ivemwamwala lakaina, faina Yaubada wagaine ivetumagana.

³⁵ Aku mala gilavuna meLoma toveimeyayavo yadi filisimani iimilidi ke toitaveyabina ina vonena, “Badi kaliva-dina adiselu ani una etoyavudi ke inana.”

³⁶ Ada toitaveyabina-nai yadi veimeya ginogalina ada ginau Paulo givonena, “Toveimeyayavo matawa iimilina ada oyeri ke Sailasi gana etoyavumi wananau. E ada wana yegemona ada niwaloveya wananau.”

³⁷ Aku Paulo filisimani wagaidiya givona, “Badi Loma toveimeya nonogana meLoma yada veimeya keke ida muliye. Vaita nagona kaliva idamadu vevonayavugidi muliya-yo ida vemataavulogidi. Aku ime Loma kaliva** nonogana keke idamadu vevonayavugima, aku iveimeya ke tolugaviya kaliva matadiya ilavulavuma ke deli wagaine isema. E aku gavaiyamu, tova taidei nuwanuwadi ina luimilima

** **16:37** Paulo kwana Isileli faina bana Isileli yana yoo aku kaduwe banae Loma kaliva, faina gitubuga Tasisi, taine melala seyana Loma yana ebaveimeya wagaine. Ada kaduwe tamana Loma kaliva. Aku kaduwe Sailasi Loma anakaliva seyana. Taidei faina badi Loma toveimeya keke wa adiveimeya ke ina yogodi ke ina vemataavulogidi aku nagona ina vevonayavugidi. (Gug 22:25-29)

ana nukavu? Keke-mowa! Gilubodana Loma toveimeyayavo taudiyavo inaela ina yavuma.” **

³⁸ Ada filisimani iyewadi Loma toveimeyadina wagaidiya iawatalatalaina gavana Paulo ke Sailasi ivona. Ada tova-nai inogalina vaita badi Loma kaliva, imatauta lakaina.

³⁹ Taidei faina toveimeyayavo ina ivonavesoli wagaidiya ke adiselu ivagaulei iyegemona deli wagaine, ada iveolei ke yadi melala ina segena.

⁴⁰ Ada adiselu deli wagaine-deya iyegemo inau Lidia yadi manuweya. Wadedeku-deya tovetumagana nodi ivagauta ada ikiveasevatudi. Muliya isegedi aku inau.

17

Paulo yana yoo nodi meTesalonaika ikiveuloulonidi.

¹ Ada Paulo ke Sailasi melala adiyegana Amifipolisi ke Apolonia wagaidiya igolota inau ada iyegemona melala Tesalonaika, wadedeku meIsileli yadi manuwa ebavewala gimiyamiya.

² Ada Paulo yana dewa anafaiweya, ginau yadi manuwa ebavewala-nai wagaine giluku ada badi meIsileli nodi Buki Tabu ananuwanuwa iveifuifufuyena. Sabate toiye wagaidiya gidewa anafaiweya.

** **16:37** Paulo yana melala-nai Tasisi gimiyamiya fafali-nai anayegana Silisiya. Silisiya anakalivayavo ani Loma anakabemali iawaegedi ke iinananadi vaita badi Loma anakalivayavo. Aku badi Isileli anafafali anakalivayavo ani Loma kabemali keke ida awaegedi ke ida inananadi vaita badi Loma anakalivayavo.

³ Ada Yaubada yana vona gikikivemalina wagaidiya, ada Banae Venuvenuwadadanina faine gikikivetuvetunugidi. Givonedi, “Yaubada yana vona vetovetokilumina givona vaita Venuvenuwadadanina ani uloulolo kaliva nimadiya anafaiweya gida nuwagana, kaduwe gida alika ke gidayawa-vagila. Ada taidei kaliva-nai anayegana Yeisu ani tova malinai wagaimiya gaifuifufuyena, Banae velemoena Mesaiya, Venuvenuwadadanina.” †

⁴ Ada meIsileli tufodi Paulo yana vona nuwadi gikanidi ke ivetumaganena, ada Paulo ke Sailasi adiyoo wagaine iluku. Kaduwe anafaiweya meGiliki tufona moyaidi Yaubada anatooduoduyavo, ke kaduwe vevine adiyegana lakaidi moyaidi ivetumagana.

⁵ Aku meIsileli-dina keke ida vetumagana ani iveumagigi, e ada melala anakaliva koyodiyavo inu-kavokavovo maketi wagaine ani ivagauwidi ke yoo isilakaina. Ada moyaidi ivebutu iagofaifaina ke imadu inau kaliva anayegana Yesoni yana manuweya ke yana manawa anawana idobona. Yadi nuwanuwa vaita Paulo ke Sailasi ida miyami ada ida kiveyabidi ida aliyedi yoo lakaina wagaidiya.

⁶ Aku ilele-wayogedi faina, banae Yesoni kaduwe tovetumagana tufodi nodi ikiveyabidi ada isitaidi ialiyedi melala anatonagonayavo wagaidiya aku iagofaifaina ivona, “Taidei kaliva-dina fafali moyaina wagaidiya vekwageya isisilakaina, ani malinai yada melala wagaine kaduwe ielai

† 17:3 Luk 24:26-27, Gug 9:22

7 ada Yesoni gisivaivaidi yana manuweya. Aku badi moyaidi yada kini lakaina Sisa yana veimeya iyawelina, faina ivonavona evo kadu kini seyana gimiyamiya, anayegana Yeisu.” †

8 Ada yadi vona yoo ada melala anatonago-nayavo inogalina ayo au gialakalakaidi.

9 Ada tonagona-dina iveimeya ke Yesoni tubuiyanavo tovetumagana nodi mani wagaine ina lufata ke vaita keke kaduwe vekwageya ina seyegemone. Ada ilufata muline, ietoyavudi inau.

Melala Beliya wagaine kaliva moyaidi ivetumagana.

10 Ada mala bademowa gibogi Tesalonaikadeya tovetumagana Paulo ke Sailasi iimilidi inatau melala anayegana Beliya wagaine.** Tova-nai bademowa iyegemona, inau meIsileli yadi manuwa ebavewala wagaine.

11 Ada meIsileli Beliya wagaine ani nuwanuwadi alamana ina vaivaina, aku meTesalonaika keke anafaiweya. MeBeliya nuwanuwadi lakaina Paulo yana laumamala ina nogalivutuvutuna, ada yadayada seyana seyana Buki Tabu iitaitavenanau ke ina alamanena kai Paulo yana laumamala velemonoena o kai keke.

12 E ada tufona moyaidi ivetumagana, kaduwe Giliki vevine adiyegana lakaidi moyaidi ada Giliki kaliva moyaidi ivetumagana.

† 17:7 Luk 23:2-3

** 17:10 Tesalonaika aku ginau Beliya wagaine ani anaatuwada naeniti-seveni kilomita anafaiweya.

13 Aku meIsileli Tesalonaika wagaine Paulo valeyana inogalina vaita Yaubada yana vona kaduwe gilulumamalena Beliya wagaine, ani ielai ada kaliva ivagauwidi ke ikivetoyogidi ada nuwakoyo isilakaina.†

14 Yoo inuwanuwakoyo faina, tovetumaganayavo maduga-mowa Paulo ivagaule inauwena taliyeya ke ginayage, aku badi Sailasi ke Timoti Beliya wagaine imiya.

15 Ada badi kaliva Paulo ikwayabu nodi inau melala anayegana Atenisi wagaine ivagalovena, aku muliya-yo ina yewadi Beliya, nagona Paulo veimeya giveledi Sailasi ke Timoti faidiya, givona vaita ina vonedi ina maduelai bana wagaine. Givonedi giavaina ada tokwayabu-dina iyewadi Beliya.

Paulo gilumamala meAtenisi wagaidiya.

16 Tova-nai Paulo Atenisi-deya Sailasi ke Timoti gibodabodadi aku aseasena giulolo lakaina, faina giitana yaubada fwayafwaya adikilumina moyaina imiyamiya melala-nai wagaine.

17 Taidei faina ginau manuwa ebavewala wagaine ke badiyavo meIsileli kaduwe badi keke meIsileli aku Yaubada anatooduoduyavo ani banae nodi iveifuifufu. Ada kaduwe yadayada seyana seyana ginau maketi anafafali wagaine ke badi gavega nodi ina venuwaga ani wagaidiya giifuifufu.

18 Kaduwe tonuwauya tufodi yoo iluwei badi Paulo nodi iveifuifufu, yoo seyana adiyegana

† 17:13 Gug 14:19

Efikuliyani, ada anavelu adiyegana Sitoiki.** Tu-fodi ivona, “Tokwavakwava gavana givonevone?” Kaduwe tufodi ivona, “Kai mali yaubada faidiya gilulumamala.” Taidei anafaiweya ivona faina Paulo valeya iwakana giifuifufuyedi Yeisu faine ada yawa-vagila faina.

¹⁹ E ada Paulo ivagaule inauwena yadi ebav-agauta anafafali wagaine anayegana Aliyofago, ada ivonena, ivona, “Meyameyaganina vewala evaguna-nai o uifuifufuyena ani uda kivemalina wagaimeya.

²⁰ Faina gaitoma tuli-moena ualiyena ke anogalina, ada nuwanuwama ana alamanena gavaiyamu ananuwanuwa.”

²¹ MeAtenisi kaduwe awawala anakalivayavo melala-nai wagaine imiyamiya ani tova moy-aina nuwanuwa evagudi iifuifufuyedi o kai ivanevanenegedi.

²² E ada Paulo gimididi yadi ebavagauta anayegana Aliyofago wagaine ke givona, “MeAt-enisi, gaitanu wagana vaita gaitoma lakaina imi wagaimiya ani yami yaubadayavo adioduodu.

²³ Faina yami melala nefanine ganunudadana ada yami ebaoduodu gaitaitadi aku ebavebolavoi seyana ganuwagana ani wagaine vetokiluma gimiyamiya, givona, YAUBADA SEYANA KEKE KADA ALAMANE ANAEB AODUODU. E ada Banae

** **17:18** Efikuliyani yadi vewala taidei anafaiweya. Gavana kaliva gina kivemwamwalena, taidei iwakana velemona. Aku Sitoiki yadi vewala anafaiweya taidei. Gavana kaliva nuwanuwana ani banae gina seobuyena ada yana nuwanuwa vovona faina ani tauna gina veimeyedi.

keke wada alamane aku waoduodu wagaine, ani malinai Iya gaelai ke Banae gana awamogatalena.

24 “Yaubada-nai babi gibubuna ke gaitoma moy-aidi babiya imiyamiya, ani Banae gabama ada babi anaKauveya. Ada keke gida miyami manawa tabu wagaidiya anafaiweya kaliva iyogodi.†

25 Kaduwe tomiyababi keke adafaiweya kada gugaiye Banae faine ayo tamo gaitoma kadavele vaita gavana tamo nuwanuwana. Faina Banae ani ide moyaida yawaida vuvuna ada gaitoma matatabuna gibubu giveleda.

26 Ada nago-moena kaliva seyana gibubuna† ke banae kaliva-nai wagaine yoo tulina tulina moy-aidi gibubudi. Ada Banae yoo seyana seyana yadi tova gisena, ada yadi fafali wadedeku inamiya ani kaduwe giveimeyedi.

27 Taidei anafaiweya kaliva gibubudi faina nuwanuwana ina lлена e ada Banae ina alamanena, vaita tomatakoyo-mowa gaitoma seyana faine gikikilelлена anafaiweya. Aku Yaubada ani keke atuwadeya gida miyami ide seyana seyana wagaideya.

28 Faina ‘Banae yawaida vuvuna, kaduwe yada nudadana ke yada miyami ani Banae wagaine-deya.’ Kaduwe anafaiweya yami tonuwauya tu-fodi bademowa ivona, ‘Velemoena, ide moyaida Banae natunavo.’

29 “E ada ideyavo Yaubada natunavo faina, keke kana nuwanuwa vaita Banae Yaubada vaita kilu-mina anafaiweya, kai gola o siliva o kai kabala

† 17:24 Gug 7:48-50 † 17:26 Eba 1:26-27

wagaine kaliva taudiyavo yadi nuwauya wagaine kilumina ibubudi.†

30 Tova nagona kaliva idewa koyona aku Yaubada keke gida vematavulogidi, faina keke ida alamane gavana Yaubada nuwanuwana. E aku tova malinai kaliva moyaidi fafali seyana seyana wagaidiya giveimeyedi ke yadi gugai koyona wagaidiya ina nuwawilana aku ina awaegedi Banae wagaine.

31 Faina bademowa yadayada seyana givenuwadadanena ke tomiyababi matatabuda gina vevonayavugida ada veimeya tunutunugina gina veleda. Ada Kaliva seyana wagaine gina gugaiyena, ke Kaliva-nai bademowa givenuwadadanena, Banae Yeisu.† Ada Yaubada moyaida wagaideya giawavelemoenayena, faina alikeya gisiveyawa-vagilena.” Taidei anafaiweya Paulo yana laumamala.

32 Aku MeAtenisi ani Paulo yana vona kaliva yana yawa-vagila faine inogalina wagaine, tufodi iawaveleigena aku tufodi ani ivonena, “Nuwanuwama taidei faina kaduwe una ifufuye-vagilena aku ana nogala.”

33 Ada Paulo yadi ebavagauta wagaine giyegemo ginau.

34 Aku kaliva tufodi Paulo ivetumaganena ke yana yoo wagaine iluku. Badi wagaidiya kaliva seyana anayegana Daiyonisiyo, bana yoo-nai Aliyofago wagaine, kaduwe vavine adiyegana Damalisi, ada kaliva tufodi kaduwe ivetumagana.

† 17:29 Ais 40:18-19,25, 46:5, Gug 19:26 † 17:31 Iyo 5:22, Gug 10:42

18

Paulo gilumamala melala Kolinita wagaine.

¹ Ada Paulo bademowa giifufuyabu Aliyofago anayoo wagaidiya, muliya gikidewadewa ke Atenisi gisegena aku ginau melala anayegana Kolinita wagaine.

² Ada wadedeku-deya kwana Isileli ginuwagana anayegana Akwila. Banae fafali anayegana Fonitasi wagaine gitubuga, ada vavinena adiyegana Pilisila. Adiselu fafali Itali-deya evagudiyavo ielai Kolinita wagaine. Itali imadusegena faina Kini Kolodiyasi giveimeya ke meIsileli moyaidi fafali Itali anamelala lakaina Loma wagaine-deya ina awala-yabu. Ada Paulo ginau Akwila vavinena Pilisila nodi gina madubodadi.

³ Ada badiyavo yadi gugai anafaiweya kaduwe banae yana gugai, kevakeva bubudi ionaonadi manawa sinininila faidiya. E ada nodi imiyamiya aku ionaonaga.

⁴ Ada Sabate seyana seyana wagaidiya gin-aunau meIsileli yadi manawa ebavewala wagaine, ada meIsileli kaduwe badi keke meIsileli kavewagadi meGiliki ani gicaluvaluva nuwadi gina kanina e ada Yeisu ina vetumaganena.

⁵ Aku tova-nai Sailasi ke Timoti Masedoniya-deya ielai Kolinita wagaine, Paulo faisewa seya-moena gigugaiyena, ani tova moyaina valeya iwakana gilulumamalena meIsileli wagaidiya. Giawatalatalaina vaita Yeisu Banae Mesaiya.

⁶ Aku badi ivenibainena ke iawavekoyoyena faina, Paulo ananuya gisibutuna matadiya ada

givonedi, “Kai keke yawai-vagata wana nuwaga, au ina taumiyavo amivita. Keke Iya akuvita. Tova malinai ke gina naunau ani gananau badi keke meIsileli wagaidiya gana lulumamala.” †

⁷ Ada au Paulo manuwa ebavewala wagaine-deya giyegemo aku ginau Taito Yusito yana manuweya. Banae keke meIsileli aku Yaubada wagaine gioduodu, ada yana manuwa ani manuwa ebavewala lilivane.

⁸ Ada kaliva seyana anayegana Kilisifasi, banae manuwa ebavewala anatonagona, ani banae ke kaduwe yana manuwa anatomiyayavo matatabudi nodi Kauveya ivetumaganena. Ada kaduwe meKolinita tufona moyaidi Paulo yana laumamala inogalina ke ivetumagana ada ibabitaio.

⁹ Ada bogi seyana wagaine Paulo gienoitai, ada anaenoita-nai wagaine Kauveya givonena, givona, “Keke una matauta aku una atuvefaila ke tova moyaina una lulumamala. Keke una ilova.

¹⁰ Faina oye Iya nodi kamiyamiya, ada keke tamo gaito gina mununi. Faina taidei melala-nai wagaine yaku kalivayavo moyaidi imiyamiya.”

¹¹ Ada Paulo vaikoi eitini (18) Kolinita gimiyamiya aku Yaubada yana vona givevewala kaliva wagaidiya.

MeIsileli igaluvaluva ke Paulo ina vevonayavugina.

¹² Aku tova-nai Galiyo givetoveimeya fafali Akaiya wagaine, meIsileli ivagauta ke Paulo ikiveyabina ada ebavevonayavuga wagaine in-auwena.

† 18:6 Gug 13:46

¹³ Ada Galiyo ivonena, ivona, “Kaliva taidei tova moyaina kaliva gisibalebalede e ada mali waiya ina oduodu Yaubada wagaine, tayuwe wai-nai yama veimeya giyaweyawelina.”

¹⁴ Ada Paulo gidavona aku Galiyo gimadu-vona meIsileli wagaidiya, givona, “Imi meIsileli, kai kaliva taidei tamo gaito wagaine gida kiyafu o kai gida luvealika, gida lubodaku yami vona gada nogalina.

¹⁵ Aku imi yami vona ke yegana tulina tulina faidiya wagavekwavekwageyayed, ada kaduwe taumiyavo yami veimeya gaga wagavekwavekwageyayena. E ada au imi taumiyavo wana kivetuvetunugina. Ida imi yami gaitoma faina, keke nuwanuwaku gana vevonayavuga.”

¹⁶ Ada giveimeya ke ivenegadi iyegemona ebavevonayavuga wagaine-deya.

¹⁷ Aku kaliva seyana anayegana Sosideni, banae manuwa ebavewala anatonagona, ani ikiveyabina ada ebavevonayavuga wadebaine ilumalimaliwavuna. Aku Galiyo keke faine gida nuwanuwa.

Paulo giyewana Anitiyoki wagaine.

¹⁸ Ada Paulo wadedeku Kolinita wagaine tove-tumagana nodi imiya maita yadayada moyaina, ada muliya gisegegi. Ada giobu Senikeliya ke waka wagaine ginayage aku nagona kuluwana gikolina, faina bademowa Yaubada wagaine givonadabadaba e ada taidei vonadabadaba-nai anaiyaiyaya giluyabuna. Muliya tubuiyana Ak-wila ke vavinena Pilisila nodi waka wagaine iyage ke itauya Siliya faina.

¹⁹ Ada aimo melala seyana anayegana Efeso wagaine iluku, ada wadedeku-deya iobu ada Pilisila ke moganedi Akwila imiya aku bana Paulo ginau melsileli yadi manuwa ebavewala wagaine giluku ada nodi iveifuifufu.

²⁰ Ada badiyavo Paulo iveolena ke nodi inamiya maita tova manamanawena, aku givekeke.

²¹ Aku yana tauya wagaine givonedi, givona, “Kai Yaubada nuwanuwana,[†] aga aimo gana yewaelai imi wagaimiya.” Ada gina waka wagaine giyage-vagila Efeso-deya ada inau.

²² Sisalia iluku ada wadedeku Paulo giobu ada gilaka Yelusalema ke tovetumagana adiyoo nodi ivetubuiyana, ada muliya ginau Anitiyoki.

²³ Ada Anitiyoki wagaine gimiyamiya maita tova manamanawena, muliya kaduwe gimididi ginudadana ginau Galetiya ke Filidiya adifafaliya. Ada melala seyana seyana wagaidiya Yeisu yana tonogalayavo gimadumadubodadi, kaduwe gikikivetoyogidi ke tova moyaina Yeisu ina vetuvetumaganena.

Apolosa gilumamala Efeso ke Akaiya anafafali wagaidiya.

²⁴ Aku kwana Isileli seyana, anayegana Apolosa,[†] melala Efeso wagaine gielai. Banae melala lakaina anayegana Alekisanidia wagaine gitubuga, ada bana tolaumamala iwakana kaduwe Yaubada yana Veyavo Anawai Tuwaina anaBuki gialamane-dewedewena.

²⁵ Ada Kauveya yana wai wagaine gisikulu, ada wa yana idibudibumwaiga gilulumamala

[†] **18:21** Iyem 4:15 [†] **18:24** 1Kol 3:5

ke Yeisu valeyana giifuifufuyena tunutunugina. Aku babitaiso Yeisu anayeganeya ani keke gida alamane, aku babitaiso-nai Iyoni gifaise-wana† gaga gialamanena.

²⁶ Ada Apolosa givebutu manuwa ebavewala wagaine wa yana asevatu gilumamala. Aku Pilisila ke Akwila inogalina wagaine, ivagaule inauwena yadi manuweya ada Yaubada yana wai aimo keke gida alamane-dewedewe faina ikivetu-vetununa.

²⁷ Ada tova seyana Apolosa nuwanuwana ginanau fafali Akaiya wagaine, e ada tovetumagana ikiveasevatuna ke fefe ivetokilumina gina nauwena tonogalayavo Akaiya wagaine ina sivaivaina faina. Tova-nai giyegemona wadedeku, badiyavo bademowa Yeisu ivetumaganena Yaubada yana nuwadogeya ani Apolosa gilemedi lakaina.

²⁸ Faina kaliva matadiya Apolosa meIsileli nodi ivevonavona aku yana vona wagaine gitoyogisegedi, ada Buki Tabu wagaine gikivemalidi ke givewaledi vaita Yeisu ani Banae velemoena Mesaiya, Venuvenuwadadanina.†

19

Paulo yana gugai Efeso wagaine.

¹ Apolosa aimo Kolinita wagaine gimiyamiya aku Paulo ani wai seyana wagaine gigolota ginau ada giyegemona Efeso. Ada wadedeku-deya tonogalayavo tufodi ginuwagadi,

† 18:25 Gug 19:3-4 † 18:28 Gug 9:22

² ada gitolidadanedi, givona, “Gavaiyamu, imi nagona wamaduvetumagana anatoveya, Aluwaluwa Tabuna givemagami† o kai keke?”

Badi ivona, “Keke. Ada kaduwe keke tamo ada nogali Aluwaluwa Tabuna-nai faine.”

³ Ada Paulo givonedi, “Kai ina mamu aga gava babitaiso wagaine wababitaiso?”

Badi ilufata, ivona, “Yama babitaiso ani Iyoni givewalema anafaiweya.”

⁴ Paulo givonedi, “Babitaiso-nai Iyoni gifaise-wana ani kaliva yadi gugai koyodi wagaidiya inuwavilana ke gikivebabitaisodi. Ada Iyoni kaliva givonedi, ‘Banae mulikuya ginaelai ani wana vetumaganena, tainei Yeisu.’” †

⁵ Tova-nai meEfeso tonogalayavo taidei vona-nai inogalina, Kauveya Yeisu anayeganeya ibabitaiso.

⁶ Ada Paulo nimana gisena badi wagaidiya ada Aluwaluwa Tabuna givemagadi ke meya tulina tulina wagaidiya iifuifufu. Ada kaduwe Yaubada faine ifalofisai.

⁷ Ada adiyoo ani kaliva adituwelo anafaiweya.

⁸ Aku Paulo givebutu ginaunau manawa ebavewala wagaine, ada vaikoi toiye wagaidiya wa yana asevatu givonavona kaliva wagaidiya. Nodi iveifuifufu ada Paulo wa yana lumodova givonedi Yaubada yana ebaveimeya faina.

⁹ Aku tufodi idebaitoyoga, keke nuwanuwadi ina vetumagana, ada kaliva moyaidi matadiya Kauveya Yana Wai† iawavekoyoyena. E ada Paulo gisegedi aku tonogala gagana givagauledi

† 19:2 Gug 2:38, 8:15-17 † 19:4 Mad 3:11, Mak 1:4,7-8, Luk 3:4,16, Iyo 1:26-27 † 19:9 Gug 19:23

ina iluku Tilano yana manuwa ebalaumamala wagaine, ada wadedeku yadayada seyana seyana nodi iveifuifufu.

¹⁰ Ada yana gugai-nai anafaiweya ginauwena-deya malamala iluwei, ayo meIsileli kaduwe badi keke meIsileli moyaidi fafali Eisiya wagaine imiyamiya ani Kauveya yana vona inogalina.

Siva natunavo faidiya.

¹¹ Ada Yaubada Paulo toyogina givelena e ada gugai ebameyasidobodobo velemonoena gugaiyedi.

¹² Anafaiweya ebaita seyana lakaina ani Paulo nimana ginasena nuya kabisodi ke kaduwe nuya agoiline wagaidiya, ada kaliva tufodi giawaegedi ke ina vaivaidi ina naunauwedi ke toveoga vovodiya ina sesedi. Ada adiveoga-dina giavaidi ke kaduwe aluwaluwa koyodi imiyamiya kaliva nafodiya iyegemona.[†]

¹³ Aku meIsileli tufodi wadedeku imiyamiya ani ibalawalilivuga ada aluwaluwa koyodi kaliva wagaidiya iveveyegemonidi. Ada seyana tova igaluvaluva Yeisu anayeganeya ina gugaiyena e ada aluwaluwa ivonedi, “Yeisu anayeganeya banae Paulo gilulumamala, gaveimeyemi wana yegemona.” Taidei anafaiweya ivonavona.

¹⁴ Ada meIsileli yadi veyavo anatovegugai adi-tonagona seyana ani natunavo kaliva adiseveni igaluvaluva ke aluwaluwa iveimeyedi anafaiweya.

¹⁵ Badi adiseveni taidei anafaiweya Yeisu anayeganeya idewadewa aku seyana tova

[†] 19:12 Gug 5:15

aluwaluwa koyona givoned, givona, “Yeisu Banae gaalamanena,[†] ada kaduwe anafaiweya Paulo faine gakaiyanogala, aku imiyavo ani gavega kaliva?”

¹⁶ Kaliva aluwaluwa koyona nafone gimiya miya ani taidei anafaiweya givona, ayo kaliva tabodiya gitowavila gilaka ada gilumalimaliwavudi, adinuya gisikelikelilidi aku wa konekonediyavo ada wa dayadayagidiyavo imadu iyegemona manuwa-nai wagaine ada iota.

¹⁷ Ada meIsileli kaduwe badi keke meIsileli moyaidi Efeso wagaine imiyamiya ani valeya taidei inogalina wagaine imatauta-mowa, aku kaduwe Kauveya Yeisu anayegana ivemoimoinena lakaina.

¹⁸ Ada tovetumagana moyaidi evagudiyavo ielai ke iawamogatala yoo matadiya gaitoma koyodi igugaiyedi.

¹⁹ Ada tufona moyaidi tokwelikweli yadi gugai igugugaiyena,[†] ani yadi kwelikweli adibuki matatabuna ivagauwidi ke yoo matadiya ikabudi. Aku buki-dina fatadi iveyawana ke ive-tutamwaina siliva mani fifti tausani (50,000) anafaiweya.

²⁰ Taidei anafaiweya igugai faina, Kauveya yana vona giveinala ke gitoyogina e ada kaliva moyaidi ivetuvetumaganena.

²¹ Taidei gaitoma-dina muline, Paulo givenuwadadana vaita ginanau Yelusalema, ada yana nau-nai wagaine gina golota fafali Masedonia ke Akaiya wagaidiya. Ada

[†] 19:15 Mak 1:24 [†] 19:19 2Vei 18:10-14

givona, “Nagona gananau Yelusalema, kaduwe gilubodaku gananau Loma wagaine.”

²² Ada Paulo anatoleme kaliva adiselu Timoti ke Elasito gimaduimilidi inau Masedonia, aku banae tauna aimo tova maufona fafali Eisiya wagaine gimiya.

Gavekwavekwageya lakaina Efeso wagaine giyegemona.

²³ Aku tayuwe tova-nai wagaine, gavekwavekwageya lakaina giyegemona Efeso wagaine Kauveya Yana Wai faina.

²⁴ Efeso wagaine kaliva ioduodu seyana yaubada fwayafwaya vavine wagaidiya, adiyegana Atemisi, ada manuwa ebaoduodu ibubuna badi faidiya. Ada kaliva seyana anayegana Dimeteliesi, banae yana faisewa ani siliva wagaine lokoloko gibububudi, ada yana gugai kaduwe Atemisi yadi manuwa ebaoduodu anununa anaita anafaiweya aku kabikabisona siliva wagaine gibububudi kaliva yadi ebaoduodu faina. Ada Dimeteliesi yana tofaisewayavo nodi mani lakaina inuwanuwagana.

²⁵ Ada Dimeteliesi yana tofaisewayavo ke kaduwe kaliva velugadiyavo yadi gugai banae anafaiweya, ani nodi gidouwevagauwidi ada givonedi, givona, “Kaliva, wana nogalina! Imi waalamanena taidei yada gugai-nai wagaine mani lakaina kanuwanuwagana.

²⁶ Kaduwe kaliva-nai Paulo ani yana dewa tau-miyavo waitana ada valeyana wanogalina. Banae givonavona vaita yaubada kaliva nimadiya

ibububudi ani wada keke yaubada velemonoena,[†] ada bademowa kaliva moyaidi nuwadi gikanina ke gisibaledi. Ada taidei keke Efeso gagana aku kaduwe fafali Eisiya matatabuna wagaine.

²⁷ Wada keke gida luboda, faina kai kaliva taidei yada gugai ina awavekoyoyena, aga yoo matadiya ani gugai-nai keke wa anavemoimoina. Kaduwe kai yada yaubada vavine Atemisi yadi manawa ebaoduodu ina vegaitoma-kavokavovoyena, e ada badi taudi yadi kaikaiwabu gina avaina ke kaliva aimo keke ina vemoimoine. Aku badi yada yaubada-nai ani kaliva moyaidi Eisiya anafafali lakaina wagaine kaduwe kaliva babi matatabuna wagaine ioduodu wagaidiya.”

²⁸ Aku yoo lakaina Dimeteliesi yana vona inogalina ayo matadi gifata ke iagofaifaina, ivon-avonanaga, “Badi Atemisi adiyegana lakaina, ide meEfeso yada yaubada!”

²⁹ Ada iagofaifaina aku melala anakaliva-momo moyaidi ialakalakaidi. Paulo anatok-wayabu meMasedonia adiyegana Gaiyasi ke Alisitako,[†] ani yoo-dina ikiveyabidi ada imadugedi inauwedi ebavagauta lakai-moena wagaine.

³⁰ Aku Paulo nuwanuwana ginanau ada yoo lakaina matadiya gina mididi ke gina ifufu, aku tonogalayavo iawatana.

³¹ Kaduwe Eisiya anafafali anatonagona tufodi, badi Paulo tubuiyanavo, matawa iimilina ke iveolena toyogina, ivona, “Keke maita unaluku ebavagauta-nai wagaine.”

³² Aku vagauta-nai wagaine ivetalageyogeyo,

[†] 19:26 Gug 17:29 [†] 19:29 Gug 20:4, 27:2, Kol 4:10, Fim 24

kaliva tufodi gaitoma seyana faine ikovakova aku tufodi ikovakova gaitoma tulina faina. Aku moyaidi yadi vagauta-nai vuvuna ani keke ida alamane aku au ivagauta-kavovo.

³³ Aku kwana Isileli seyana bana anayegana Alekisanida, ani meIsileli tufodi ilutunena e ada bana gina ifufu yoo wagaidiya. Ada Alekisanida yoo giluwatadi nimana wagaine, nuwanuwana gina kuludi e ada anafata meIsileli gina awabababalidi.

³⁴ Aku tova-nai iitana Alekisanida banae kwana Isileli ke Atemisi keke gida oduodu wagaidiya, ayo moyaidi ivebutu ikovakova aigaigabu gaitoma-nai seyana faine, ivona, "Badi Atemisi adiyegana lakaina, ide meEfeso yada yaubada!" Ada yadi agofaifaina inauwena maita tova manamanawena kauwana anabai iluwei anafaiweya.

³⁵ Ada melala anatonagona seyana gielai ada kaliva giawatadi, au amumu gikuluna aku givonedi, "Imi meEfeso, wana nogalina! Kaliva moyaidi ialamanena ide Atemisi yadi manuwa ebaoduodu kaitaitaveyabina, badiyavo yada yaubada lakaidi. Ada kaduwe ide yadi kabala tabutabuna gabameya-deya gibeu ani kaitaitaveyabina.

³⁶ Ada keke tamo gaito ida gaitoma-dina anafaiweya gina veweye faina, auwe gina kulumi. Aku wana nuwanuwa gavana wanagai ayo keke wana sidamane-kavovo.

³⁷ Kaliva taidei ani badiyavo keke manuwa ebaoduodu analokoloko tabutabudi ida kiyafudi, kaduwe keke yada yaubada wagaidiya

idavona awadamana, nonogana wakiveyabidi waaliyedi manawa ebavagauta taidei wagaine.

³⁸ Kai Dimeteliesi yana tofaisewayavo nodi nuwanuwadi tamo gaito ina awavekoyoyena, aga ebavevonayavuga ke tovevonayavuga imiyamiya. Wadedeku yadi awavekoyo ida nauwena.

³⁹ Aku kai tamo gavana faina kaduwe nuwanuwami wana ifufuyena, aga kanisela wada matawedi ke yadi vagauta wagaine ida nuwanuwayena ada veimeya idasena.

⁴⁰ Malinai kagavekwavekwageya e ada meyameyagani-moena Loma kabemali inaela ina awavekoyoyeda faine, inavona, 'Badiyavo igavekwavekwageya.' E ada kai anafaiweya aga gavaiyamu kana lufata? Keke-mowa adafaiweya, faina gavekwavekwageya-nai keke tamo wa vuvuna."

⁴¹ Ada taidei anafaiweya giifufu giavaina, muliya kaliva givonedi ivebiawawala inau yadi manuweya.

20

Paulo kaduwe ginu-vagila Masedonia ke Giliki adifafaliya.

¹ Tova-nai bademowa gavekwavekwageya-nai giavaina, muline Paulo tonogala gidouweva-gauwidi ada gikiveasevatudi. Muliya giveta-lakafoiyedi ke gitauya ginau Masedonia wagaine.

² Ada Masedonia anafafali moyaina wagaidiya tovetumaganayavo vona moyaina wagaidiya gi-awaveasevatudi, e ayo ginau fafali Giliki** wagaine,

³ wadedeku gimiyamiya vaikoi toiye. Ada gikidewadewa waka wagaine ginayage ginanau Siliya aku gikaiyanogala vaita melsileli iveimeya ke ina luvealikana, e ada givenuwadadana vaita Masedonia gina golota gina yewana agene.

⁴ Ada kaliva tufodi ikwayabu nodi inau, badiyavo Sofeta banae Failasa natuna kwana Beliya, kaduwe Alisitako ke Sekanido, badi adiselu meTesalonaika, ke Gaiyasi† banae kwana Debi, ada Timoti, e ada kaduwe kaliva adiselu Eisiya anafafali wagaine adiyegana Taikikasi† ke Tolofimasi.†

⁵ Ani kaliva-dina wai inagona ke melala anayegana Tolowasi wagaine ibodama

⁶ aku imeyavo Filipai wagaine amiyamiya. Ada Beledi Keke Wa Anayisti Anakanibutu giavaina, ime kaduwe ayage ada yadayada faifi wagaidiya awageya amadumadu, muliya aluku Tolowasi. Ada tubuiyameyavo-dina nodi avenuwaga ke wadedeku-deya amiyamiya wiki seyana.

Paulo Yutiko alikeya gisiveyawa-vagilena.

⁷ Wiki anayadayada nagona wagaine moyaima avagauta ke Kauveya Yana Kani Tabu anaebanuwaududu ana gugaiyena. Ada Paulo

** 20:2 Fafali Giliki anayegana velemonoani ani 'Gilisi', aku adiyoo ke bonadi anayegana 'Giliki'. Tove tuwaina anayegana anavelu ani 'Akaiya'. † 20:4 Gug 19:29 † 20:4 Efes 6:21 † 20:4 Gug 21:29

kaliva nodi iveifuifufu aku ginuwanuwa mala gina lavuna-yo gina segedi faina, giifufu-deya boginafa.

⁸ Ada moyaima avagauta manawa getane anatutulagolota wagaine, ada tutulagolota-nai wagaine mayale moyaina ikabudi.

⁹ Aku tubulakata seyana anayegana Yutiko, ani manawa anatalafolega seyana wagaine givetoga. Ada Paulo aimo giifuifufu aku Yutiko gidune-dune, gidune-deya au gienowavulu ada gibeu. Manawa getane talaliya anaveto wagaine-deya aku giobu babiya. Ada imadu iobu ifewana ani alialikana.

¹⁰ Aku Paulo giobu Yutiko wagaine ke gienotagona ada giatulauwina. Aku tovetumagana givonedi, “Keke aseasemi gina uloulo. Banae wayawaina!”

¹¹ Ada Paulo giyewa gilaka-vagila manawa getane ebavagauta-nai wagaine, beledi gikiinena ada tovetumagana nodi ikani. Ada badi nodi iifufu malalavu ada aimo matabogibogina, Paulo gitauya.

¹² Aku badi tovetumagana tubulakata-nai wayawaina ivagaule inauwena yana manuweya, ada moyaidi ivemwamwala lakaina.

Paulo Tolowasi gisegena aku Mailito wagaine ginaunau.

¹³ Ada ime Paulo anatokwayabu waka wagaine wai anagona Asosi, ada tayuwe melalanai wagaine Paulo ginayage. Taidei anafaiweya giveimeya faina banae agene ginanau.

¹⁴ Tova-nai Asosi wagaine nodi avenuwaga ada waka wagaine adodona, kaduwe anau melala anayegana Mitilini wagaine aluku.

¹⁵ Mala gilavuna Mitilini asegena ada amaduga Kiyosi wagaine, ada yadayada anavelu adamanaelai Samosa wagaine, ada kaduwe asilakata-vagila ke yadayada anaveto ayegemona Mailito aku Efeso keke adaluku.

¹⁶ Paulo nuwanuwana ginamadu yegemona Yelusalema e ada meIsileli yadi abutu Penitikosi anatova wagaine gina miyamiya. Taidei faina keke nuwanuwana tova gina venuwaegege Eisiya anafafali wagaine, e ada keke adaluku Efeso.

Paulo givonavetalakafoi meEfeso tovetumagana aditonagona wagaidiya.

¹⁷ Paulo Mailito wagaine-deya aku matawa gimilina Efeso ke tovetumagana aditonagonayavo inaelai bana wagaine.

¹⁸ Tova-nai ielai wagaine, ada givonedi, “Tubuiyakuweyavo, imi yaku dewa waalamanena. Yaku dewa ke yaku gugai tova-nai gaela-vaguvagu Eisiya anafafali wagaine, ke yaku miya imi nefanimiya anaebalauyabu wagaine gaaliyena, ani waalamanena.

¹⁹ Tova moyaina meIsileli nuwanuwadi ina luvealikaku faina, tova vitana ganuwagana. Aku auwe tauku gakiobuyeku ada tova ke tova wa matailuku aku Kauveya faine gafaifaisewa.

²⁰ Kaduwe imi waalamanena tova moyaina nuwanuwa iwakana matatabuna amilema faina

gaifufuyena wagaimiya, keke gada ilova. Au v-gauta lakaidi wagaidiya kaduwe yami manawa seyana seyana wagaidiya gavewalemi.

21 MeIsileli kaduwe badi keke meIsileli gaawatalatalaina wagaidiya vaita yadi gugai koyodi wagaidiya ida miyaviladi Yaubada wagaine, ada yada Kauveya Yeisu ida vetumaganena.

22 “Ee, aku malinai Aluwaluwa Tabuna givoneku faina, gana naunau Yelusalema† wagaine. Gananau aku wadedeku keke gada alamane gavana gina yegemona wagaikuya.

23 Aku gaitoma seyana gaalamanena, tainei melala moyaina wagaidiya galukunau ani Aluwaluwa Tabuna givonevoneku vita lakaina kaliva nimadiya gana nuwagana ada kaduwe inaseku deli wagaine.†

24 Aku Iyayeku ani keke yawaiku faine gada nuwanuwa, wada keke gaitoma lakaina. Aku yaku nuwanuwa seya-moena ani nuwanuwaku yaku gugai Kauveya Yeisu giveleku gana luyabuna.† Gugai-nai ani kaliva moyaidi wagaidiya gana awatalatalaina valeya iwakana Yaubada yana nuwadoga faina.

25 “E aku imi amimwatuguya gabalawalilivuga ke Yaubada yana ebaveimeya faina galulumamala, ani malinai gaalamanena keke tamo gaito wagaimiya aimo magigiku unaita-vagile.

26-27 Taidei faina tova malinai Yaubada matane gamatawemi taidei anafaiweya. Gavana Yaubada nuwanuwana kaliva ina alamanena ani

† 20:22 Gug 19:21 † 20:23 Gug 21:11 † 20:24 2Tim 4:7-8

matatabuna bademowa gaawatalatalainena imi wagaimiya, keke tamo gada sewavuye. Taidei faina, kai keke yawai-vagata wana nuwaga, aga keke akuvita aku au taumiyavo amivita.

28 Taumiyavo wana itaveyabimi, kaduwe Yaubada yana yoo moyaidi wana itaveyabidi, faina Aluwaluwa Tabuna taidei yami gugai-nai givilemi. Sifi aditoitaveyabina yadi sifiyavo iitaitaveyabi-dewedewedi anafaiweya, imiyavo Yaubada yana yoo wana itaveyabidi,[†] badiyavo Natu-moena Yeisu dayagine gikimoned.

29 Gaalamanena aimo ganau, aku mulikuya kaliva tufodi inaelai nefanimiya vaita galuweta manimaninidiyavo anafaiweya,[†] ada sifi ina kivekoyodi.

30 Kaduwe kaliva tufodi taumiyavo yami yoo wagaine-deya ina mididi ada vewala fwayafwaya wagaine tonogala ina sibaledi, e ada ina muliyedi.

31 Taidei faina taumiyavo wana itaveyabimi badi faidiya. Ada wana nuwaududuna malamala-dina toiye wagaidiya Iya nodi kamiyamiya, ani keke gada veyawai aku yadayada ke bogi wa yaku tagiya nodi imi seyana seyana galuluwageyemi.

32 “Ada tova taidei Yaubada nimane gasemi ke gina itaveyabimi. Banae yana vona-nai giifufu yana nuwadoga faina ani wana nuwaududuna. Taidei yana vona-nai wagaine Banae anafaiweya gina kivetoyogimi ke yami vetumagana gina tubuga-mowa, ada gaitoma iwakadi Yaubada gisena yana kalivayavo vetavetabuidiyavo faideya ani imi kaduwe nodi wana vaidi.[†]

[†] 20:28 1Pi 5:2-3 [†] 20:29 Mad 7:15-20 [†] 20:32 Kol 1:12

³³ Aku iyayeku ani keke tamo gaito yana mani o yana lokoloko o kai ananuya iwakana gada luvadigedi.

³⁴ Au imi taumiyavo waalamanena Iya tauku nimakuya gafaisewa,[†] e ada tauku yaku mani wagaine gavana Iya akutokwayabu nodi amalema faina ani gakimoned.

³⁵ Taidei yaku dewa-nai wagaine tova moyaina gavewalemi vaita gilubodada taudeyavo yada faisewa toyogina wagaine tokabekabebena kana lemedi. Taidei anafaiweya kada faifaisewa aku Kauveya Yeisu yana vona kada nuwaveyalaina, givona, 'Gaito leme gina nuwagana, banae gina vemwamwala, aku gaito leme gina velen, gina vemwamwalamowa.' "

³⁶ Ada Paulo yana vona giluyabuna, kaliva moyaidi bana nodi tugadi ivetodonena aku iveoveola Yaubada wagaine.

³⁷ Ada moyaidi itagitagiya aku iatulauwi iveyaugina.

³⁸ Nuwadi givita lakaina faina givonedi vaita keke kaduwe magigina inaita-vagile. Ada ikwayabu inau taliyeya ke waka wagaine iveyagena.

21

Paulo ginau Yelusalema wagaine.

¹ Ada moyaima avetalakafoiyedi muline, waka wagaine ayage ada asilakata atauya anau tunutunugina imula Kosi wagaine. Yadayada

[†] **20:34** Gug 18:3

anavelu anau Lodesi wagaine, ada Lodesi-deya anau Fatala wagaine.

² Wadedeku waka seyana anuwagana ginanau fafali anayegana Fonisiya, e ada waka-nai wagaine ayage ada atauya.

³ Amadumaduga imula anayegana Saifilasi anuitaitana, ada waimaulimeya gimiyaku ime Siliya anafafali wagaine anaunau. Ada analuku melala anayegana Taiya, faina wadedeku lokoloko ina seobuyedi.

⁴ Ada ime anau ke tonogala anuwagadi ada badi nodi amiyamiya yadayada seveni. Ada gavana gina yegemona Paulo wagaine ani Aluwaluwa Tabuna gikivemalina wagaidiya, e ada Paulo ivonena, ivona, "Keke unalaka Yelusalema wagaine."

⁵ Aku aimo badi nodi yama tova bademowa giavaina ada atauya ke yama nau-nai kaduwe avebutuna. Ada tovetumagana moyaidi wa vavinediyavo ke wa natudiyavo nodi ikwayabuma melala wagaine ayegemona aobu taliyeya. Ada moyaima makameya tugama avetodonedike aveoveola Yaubada wagaine.

⁶ Veoveola giavaina, avetalakafoi ada ime ayage waka wagaine aku badi iyewadi yadi mela-leya.

⁷ Aku ime yama nau-nai waka wagaine aimo ginaunau, ada Taiya wagaine atauya anau melala seyana anayegana Tolimaishi wagaine aluku ke aobu. Ada tovetumagana wagaidiya anau ke ana itadi, ada badi nodi amiyamiya yadayada seyana anafaiweya.

⁸ Yadayada anavelu wagaine kaduwe atauya-vagila ke anau Sisalia. Tova-nai ayegemona ada anau valeya iwakana anatolaumamala anayegana Filipi yana manuweya, banae seyana adiseveni wagaidiya Yelusalema-deya tuwaina ivenuwadadanedi.†

⁹ Ada banae Filipi-nai natunavo vevine adilaulu mataboladi, badi falofita.

¹⁰ Wadedeku amiyamiya yadayada gavaiyei aku falofita seyana anayegana Agabasi giyege-mona.† Banae Yudiya anafafaliya gitauya gielai.

¹¹ Au gielai wagaimeya ke Paulo anabeleta givaina ada tauna nimana ke agena giyogodi aku givona, “Aluwaluwa Tabuna givona taidei anafaiweya, ‘Toni beleta taidei ani meIsileli Yelusalema wagaine taidei anafaiweya ina yogona,† ada ina atuegena badi keke meIsileli wagaidiya.’ ”

¹² Tova-nai yana vona anogalina, ada imeyavo ke kaliva wadedeku imiyamiya ani nodi Paulo aveolena toyogina vaita keke-mowa ginalaka Yelusalema wagaine.

¹³ Aku Paulo givona, “Gavana faina watag-itagiya ada aseaseku wakiveulouloloni? Iya gaawaageku Yelusalema wagaine ina yogoku, kaduwe gaawaageku kai ina luvealikaku Kauveya Yeisu anayegana faine.” Taidei anafaiweya givona.†

¹⁴ Ada aveola-wayogena faina gikuluma, aku avona, “Iwakana. Gavana Kauveya yana nuwanuwa, anafaiweya gina gugaiyena.”

† 21:8 Gug 6:1-6, 8:5,26 † 21:10 Gug 11:28 † 21:11 Gug 21:33

† 21:13 Gug 20:24

15 Yadayada-dina giavaidi, yama lokoloko akidewadewa ada atauya ananau Yelusalema wagaine.

16 Kaduwe Sisalia wagaine-deya tonogala tu-fodi ikwayabuma nodi anau, ada inauwema kaliva seyana yana manuwa wagaine anamiya. Banae anayegana Nasoni, kwana Saifilasi banae tuwaina Yeisu gimadu vetumaganena.

Paulo giyegemona Yelusalema.

17 Tova-nai Yelusalema wagaine ayegemona, tubuiyameyavo tovetumagana wa yadi vemwamwala ivesiuleyema.

18 Yadayada anavelu wagaine Paulo ime nodi anau Iyemesa wagaine, banae tafalolo anaton-agona, ke nodi ana ifufu. Ada wadedeku-deya tovetumagana aditonagonayavo moyaidi bana nodi anuwagadi.

19 Ada Paulo givesiuleyedi ke giawatalatalainedi gaitoma matatabuna gavana Yaubada gigugaiyena badi keke meIsileli wagaidiya banae yana laumamala ke yana gugai wagaidiya.

20 Ada moyaidi ifufu taidei inogalina wagaine, Yaubada iawadavadavana. Aku yadi tovana seyana gimididi Paulo givonena, "Tubuiyama, uitana meIsileli wagaidiya ani gavaiyei tausani bademowa Yeisu wagaine ivetumagana, ada matatabudi taudiyavo iawaawaenge-moedi adav-eimeya Mosese giveleda wagaine.

21 E aku o fainiya, ani kaliva ikaiyanogala vaita meIsileli moyaidi imiyamiya badi keke meIsileli adimwatuguya fafali seyana seyana wagaidiya, ani uda vewaledi ke Mosese yana

veimeya ida dibusoyoge. Ada ivona vaita uda vonedi, 'Keke natumiyavo kaliva vovodi bubuna wana tomogoloidi, ada kaduwe ide meIsileli adagiduwa wana segedi.'

²² E ada gavana kadagai? Badi meIsileli tovetumagana idedeku ani ina nogalina vaita o bade-mowa uelai.

²³ E ada taidei faina gavana ana voneni, mamauwe una gugai. Kaliva adilaufuli yama yoo wagaine bademowa Yaubada wagaine yadi von-adabadaba seyana isena.

²⁴ Taidei kaliva-dina nodi wananau manawa tabu wagaine, ada gavaiyamu yadi yegayegana Yaubada matane faina inadewa anafaiweya adagiduwa yada yegayegana faina, tainei o nodi wana gugaiyena. Ada yadi kevakeva ina vebolavoyedi faidiya, ani fatadi unasena ke adifaiweya kuluwadi ina kolidi. Tainei ya gugai-nai wagaine moyaidi ina alamanena vaita o tauni kaduwe Mosese yana veimeya umulimuliyena. Kaduwe gavana o fainiya inogalina vaita uda vewala meIsileli tovetumagana Mosese yana veimeya ida segena, ani ina alamanena wada fwaya.

²⁵ Aku tovetumaganayavo badi keke meIsileli ani yadi leta bademowa aimilina ke yama nuwanuwa anafaiweya amatawedi. Avonedi vaita kevakeva-dina kaliva inauwedi ivebolavoyedi yaubada fwayafwaya adikilumina wagaidiya, ani keke inakani. Kaduwe keke dayaga inayui, ada kevakeva agodi sisifuwadi dayagidi keke gidamadu, ani keke ina kanikani. Ada kaduwe keke vovodi

ina awawege-kavokavovodi. Taidei anafaiweya avonedi.” †

²⁶ Ada tovetumagana aditonagonayavo taidei anafaiweya ivona faina, yadayada anavelu wagaine Paulo kaliva-dina adilaufuli ginauwedi ada Mosese yana veimeya anafaiweya, banae ke badiyavo nodi yadi yegayegana ivaina. Ada iyegayegana giavaina, Paulo manuwa tabu wagaine giluku ada Yaubada yana veyavo anatovegugai gimatawena yadi yegayegana anatova faina, tainei yadayada seveni gina avaina muline, yadi kevakeva ina aliyedi ke gina vebolavoi seyana seyana faidiya.†

Paulo ikiveyabina.

²⁷ Yadayada adiseveni imiyamiya aku tova kabisona ina luyabuna, au meIsileli tufodi Eisiya anafafali wagaine-deya nagona ielai, ani kaliva-dina iitana Paulo manuwa tabu wagaine e ada kaliva moyaidi ikivenuwakoyodi ke ina kiveyabina.

²⁸ Ada ikiveyabina aku ivedoudou, ivonavona, “Imi meIsileli, wanaela wana lemema! Taidei kaliva-nai fafali moyaina wagaidiya ginaunau ada kaliva moyaidi givewavewaledi vaita Mosese yana veimeya ida dibusoyogena, kaduwe yada yooyavo ke manuwa tabu giawavekoyoyena. Ada malinai yana koyona gikivetubugi-moena, faina badi keke meIsileli gilukuwedi manuwa tabu wagaine ke yada manuwa tabutabuna gikivebwanenena Yaubada matane!”

† 21:25 Gug 15:19-20,28-29 † 21:26 1Kol 9:20

²⁹ Taidei anafaiweya ivona faina bademowa iitana kaliva seyana kwana Efeso anayegana Tolofimasi, banae keke kwana Isileli aku Paulo nodi melala nefanine inunudadana, e ada inuwanuwa vaita manuwa tabu wagaine gida lukuwe.

³⁰ E ayo meYelusalema moyaidi ialakalakaidi ke fafali matatabuna wagaidiya-deya ivemadumadu ielai Paulo manuwa tabu negenine ikiveyabina ada isitaitai iyegemonena, aku maduga-mowa wana ifalidi.

³¹ Ada yoo tova kabisona Paulo ina luvealikana aku badi meYelusalema moyaidi igavekwavekwageya, ani valeyadi Loma tolugaviya aditonagona lakaina ginogalina.

³² Ada maduga-mowa tolugaviya kaduwe aditonagonayavo tufodi nodi givaidi ada imadu inau yoo wagaidiya. Ada tova-nai togavekwavekwageya iitadi tolugaviya aditonagona lakaina yana tolugaviyayavo nodi, ada Paulo anamunuga iilovena.

³³ Aku banae tolugaviya aditonagona lakaina ginau Paulo wagaine ada gikiveyabina aku yana tolugaviyayavo giveimeyedi seini iluwei wagaidiya ina yogona.[†] Aku gitolidadana yoo wagaidiya, givona, “Ida gavakaliva, ada gavana gigai?”

³⁴ Ada yoo gitolidadanedi, ee, kaliva tufodi gaitoma seyana faine ikovakova aku tufodi ikovakova gaitoma tulina faina. Ada geyo lakai-moena faina tolugaviya aditonagona lakaina keke anafaiweya gavekwavekwageya-

[†] **21:33** Gug 21:11

nai vuvuna velemonoena gida nuwaga. Tainei faina yana tolugaviyayavo giveimeyedi ke Paulo ina nauwena tolugaviya yadi manuwa wagaine.

³⁵ Ada Paulo inauwena ebalaka wagaine iyegemonena aku togavekwavekwageya moyaidi inuwakoyo-mowa faina, tolugaviya iwai-moe ina selakaina manuweya.

³⁶ Aku yoo lakaina imulimuliyedi ani iago-faifaina ivonavona, "Wana luvealika-moena!"

Paulo yana laufata yoo wagaidiya.

³⁷ Ada tolugaviyayavo Paulo manuweya ida lukuwena ani givona tolugaviya aditonagona lakaina wagaine, givona, "Meyameyaganina vona seyana gana vonayena wagainiya?"

Ada tolugaviya aditonagona-nai givona, "O! Taumada vona Giliki ualamanena.

³⁸ Iya ganuwanuwa vaita o kwana Itipita, banae-nai tuwaina gavekwavekwageya givevuvuna kabemali wagaidiya. Ada kaliva givagauwidi adiyoo fowa tausani (4,000) ke toluvealika-dina ginagoyedi fafali kavovona wagaine. Oyeni o kai keke?"

³⁹ Paulo gilufata, "Iya kwana Isileli, melala anayegana Tasasi wagaine gatubuga, tainei Silisiya anafafali wagaine. Melala-nai kaliva moyaidi ialamanena, ada Iya melala-nai anakaliva. Ada uda awaegeku yoo wagaidiya gadavona."

⁴⁰ Ada tolugaviya aditonagona giawaegena, e ada Paulo gimididi ebalaka wagaine aku yoo nimane giluwatadi. Tova-nai moyaidi amumu gikuluna, givebutu vona Ibeliu wagaine giifufu, badi meIsileli taudiyavo meyadiya.

22

¹ Givona, “Tubuiyakuweyavo ke kamakuweyavo, wana nogala aku gana kivetunutunugimi e ada wana alamanena veloi taidei faina.”

² Taidei anafaiweya givebutu aku yoo bonana inogalina vona Ibeliu wagaine giifuifufu, e ada moyaidi gikulu-moedi aku givonedu,

³ “Iya kwana Isileli. Melala anayegana Tasasi wagaine gatubuga, tainei Silisiya anafafali wagaine, aku idedeku Yelusalema wagaine gaveinala. Ada Gamaliyeli[†] wagaine gasikulu ada banae givewale-dewedeweku ke tamadeyavo nagona yadi veimeya gana idibumwaigena faina. Ada moyaimi tova malinai wavedivediwe ke Yaubada wana muliyena anafaiweya, kadu Iya tuwaina gavediwe gana muliyena faina.

⁴ Ada badi gavega Kauveya Yana Wai imuliyena, kaliva ke vevine, ani gativeyabidi ada deli wagaine gaselukuwedi ada uloulolo gaveledi ke gaveimeya tufodi iluvealikadi.[†]

⁵ Badi veyavo anatovegugai aditonagona kaduwe Kanisela moyaidi ani adifaiweya ina talakakila vaita taidei vona velemono. Faina badi tonagona-dina wagaidiya leta gavaidi gana nauwedi tubuiyadiyavo tonagona Damasiko wagaine imiyamiya faidiya. Ada badiyavo wagaidiya-deya awaega gana vaina nagona, muliya Yeisu yana Wai anatomuliya gana kiveyabidi ada gana yogodi ke gana aliyedi Yelusalema wagaine ina vemataavulogidi.

[†] **22:3** Gug 5:34-39 [†] **22:4** Gug 8:3, 22:19, 26:9-11

Paulo yana nuwavilana faina giifufuyena.

⁶ “Ada gatauya ganaunau aku kauwana givugivukuya ada ganunuyegemona Damasiko lilivane, ani maduga-mowa gabameya-deya malina lakaina gimalivuyoku.

⁷ Ada gabeu babiya aku bonabona seyana ganogalina, givonavona, ‘Saulo! Saulo! Gavana faina ukiveulouloloniku?’

⁸ “Ada gatolidadana, ‘Kauveya, O gaito?’

“Ani gilufata, ‘Iya Yeisu kwana Nasaledi ukiveulouloloniku.’ Taidei anafaiweya givona.

⁹ Aku badi kaliva ikwayabuku ani malina iitana, aku gaito giifufuyeku ani keke nuwadi gidamali yana vona adialamana faidiya.

¹⁰ “Ada gatolidadanena, gavona, ‘Kauveya, gavana ganagai?’

“Ada Kauveya givoneku, ‘Una mididi unana Damasiko wagaine unaluku, ada wadedeku kaliva seyana gina mataweni gugai-dina Yaubada nuwanuwana una gugaiyedi.’ Taidei anafaiweya Kauveya givona.

¹¹ Ada malina lakai-moena matakú givekoyona faina, akutokwayabu nimakuya iabi isivenavenauku aluku Damasiko.

¹² “Wadedeku kaliva seyana gimiyamiya anayegana Ananaiyasi,[†] banae Yaubada wagaine gioduodu ada kaduwe adaveimeya matatabuna giitaveyabi-dewedewena. Ada tubuiyadeyavo meIsileli moyaidi imiyamiya Damasiko wagaine ani ivemoimoinena lakaina.

¹³ E, bana kaliva-nai gielai lilivakuya gimididi aku givoneku, ‘Tubuiyaku Saulo, mata

[†] 22:12 Gug 9:10

gina aleleleyena.’ Ada maduga-mowa mataku gimalina ada bana gaitana.

¹⁴ Kaduwe givona, ‘Yaubada Banae tamadeyavo nagona ioduodu wagaine ani o givenuwadadaneni ke yana nuwanuwa una alamanena, ada yana Kaliva Yegayegana una itana ke Tauna bonana una nogalina.

¹⁵ Faina aimo oye yana toawatalatalaina kaliva moyaidi wagaidiya. Gavana bademowa uitana ke unogalina ani una awamogatalena.

¹⁶ E ada keke unaboda. Una mididi ke una babitaiso ada Yaubada una veolena ke ya koyona gina kolayavule-yabuna.’ Taidei anafaiweya Ananaiyasi givoneku.

Kauveya Paulo gidouwena ke gina lumamala badi keke meIsileli wagaidiya.

¹⁷ “Ada muliya gayewaku Yelusalema ada ganau manuwa tabu wagaine galuku gaveoveola aku Yaubada vewala seyana gikiveyegemonina wagaikuya.

¹⁸ Ada gaitana Kauveya givonavona wagaikuya, givona, ‘Una madumididi! Yelusalema una madusegena, faina ya awatalatalaina faikuya ani keke ina vetumagane.’

¹⁹ “Aku gavonena, ‘Kauveya, badi yaku gugai bademowa ialamanena, tainei tova moyaina manuwa ebavewala wagaidiya galukuluku ke atovetumagana gakiveyabidi ke galumalimali-wavudi ada deli wagaine gasedi.†

²⁰ Kaduwe nagona ya toawatalatalaina Sitiveni iluvealikana, tova-nai wagaine Iya

† 22:19 Gug 8:3

lilivadiya gamidimididi ada yadi luvealikana-
nai faina gaawaveiwakanena. Ada badi
gavega iluvealikana ani adinuya anakiwafi
gaitaveyabidi.’ † Taidei anafaiweya gavona
Kauveya wagaine

²¹ aku Banae givoneku, ‘Iya gana imilini ke
unanau fafali atuwadeya badi keke meIsileli wa-
gaidiya.† E ada unanau.’ Taidei anafaiweya
Kauveya givoneku.”

*Tonagona valeya ginogalina Paulo banae Loma
kaliva.*

²² Ada Paulo giifuifufu aku badi meIsileli
ivanevanenega e aku taidei vona-nai givon-
ayena wagaine, au ivebutu iagofaifaina, ivona,
“Kaliva taidei gilubodana babi taidei wagaine
kana vaiyavulena! Keke gina miyami!”

²³ Ada yadi nuwakoyo faina, adinuya
badobadona ibabatugedi mwatuguya, kaduwe
babi ikikitavala iyavuyavulau.

²⁴ Taidei anafaiweya idewa faina, tolugaviya
aditonagona lakaina yana kaliva giveimeyedi,
givona, “Kaliva taidei wana nauwena tolugaviya
yadi manuweya ke wana lubibiwalina, e ada
gina awamogatala gavana kaliva yadi agofaifaina
vuvuna.”

²⁵ Ada inauwe iyogona ke ida lubibiwalina, ani
Paulo tolugaviya aditonagona lilivane gimidimi-
didi ke givonena, “Ide meLoma adaveimeya ani
gavaiyamu, giawaegau ke kwana Loma keke
wada vevonayavugi aku au wana lubibiwalina?”

26 Aku tonagona-nai Paulo yana vona ginogalina wagaine, au ginau tolugaviya aditoveimeya lakaina gimatawena, givona, “Gavana unagai? Faina kaliva taidei ani Loma kaliva.”

27 Ada tolugaviya aditoveimeya-nai ginau Paulo wagaine ke gitolidadanena givona, “Una voneku, velemoena o Loma kaliva?”

Paulo gilufata, “Ika, Iyayeku.”

28 Ada toveimeya-nai givona, “Iya mani lakaina gasena ke ivewagaku Loma kaliva.”

Aku Paulo givonaga, “Aku Iyayeku Loma kaliva, faina kamaku banae tuwaina ivewagana Loma kaliva e ada Iya gatubuga Loma kaliva.”

29 Ada tolugaviya imidimididi vaita Paulo ina lubibiwali-ku ina toliluveluvena ani madugamowa ivagatugutugu. Kaduwe tolugaviya aditoveimeya tauna gimatauta, faina Paulo banae Loma kaliva nonogana iseinina.†

Paulo gimididi meIsileli yadi Kanisela matadiya.

30 Mala gilavuna tolugaviya aditoveimeya lakaina nuwanuwana vuvuna velemoena gina alamane-dewedewena gavana faina meIsileli Paulo iawavekoyoye. E ada yana tolugaviya giveimeyedi ke deli wagaine-deya iveyegemonina, kaduwe veyavo anatovegugai lakaidiyavo ada meIsileli yadi Kanisela moyaidi gidouwevagauwidi. Bademowa ivagauta ada toveimeya-nai gina Paulo givagaule gialiyena ke moyaidi matadiya givemididina.

† 22:29 Gug 16:35-39

23

¹ Ada Paulo Kaniselayavo giitaitadonedi ke givonedi, “Tubuiyakuweyavo, nuwafouku matatabuna ani yegayegana Yaubada matane ada gaalamanena yana veimeya gamuliye-dewedewena, tova tuwaina wagaine ada gielai malinai.”

² Paulo taidei anafaiweya givona faina, veyavo anatovegugai aditonagona anayegana Ananaiyasi ani kaliva Paulo lilivane imidimididi giveimeyedi ke awana ina tafina.

³ Aku Paulo Ananaiyasi givonena, “O meyalagalaga! ** Yaubada o kaduwe gina mununi! Oye ineneku uvetoga ke Mosese yana veimeya anafaiweya una vevonayavugiku nonogana o tauni veimeya-nai uyawelina, faina kaliva uvonedi ke ina tafiku.”

⁴ Ada kaliva Paulo lilivane imidimididi ani iduweyena, ivona, “Gavaiyamu, keke uda matauta Yaubada yana togugai unavona awadamanena, aiyo? Banae ani Yaubada yana veyavo anatovegugai aditonagona!”

⁵ Paulo gilufata, “Tubuiyakuweyavo, ina Iya keke gada alamanene vaita banae veyavo anatovegugai aditonagona. Kai gada alamanena aga keke anafaiweya gadavona, faina Buki Tabu wagaine givona, ‘Yami yoo aditoveimeya keke wana awavekoyoyedi.’ ”

** **23:3** Paulo givona vaita kaliva-nai meyana lagalagana ani vuvuna taidei anafaiweya. Banae Yaubada yana veyavo anatovegugai aditonagona, e ada Yaubada yana veimeya gida mulimuliyena, aku keke. Giveimeya ke Paulo ina safina, ada taidei wagaine Yaubada yana veimeya giyawelina. (Mad 23:27-28)

⁶ Aku Paulo bademowa gialamanena Kanise-layavo adiyoo iluwei, seyana Sadusiyavo ke anavelu Falisiyavo. E ada bonana lakaina wagaine givona, “Tubuiyakuweyavo, Iya Falisi, kaduwe kamaku Falisi anayoo.† Yaku von-ayavuga taidei vuvuna ani ganuwavetumagana vaita badi toalika aimo tova mulina inayawa-vagila.”

⁷ Ada tova-nai Paulo givona anafaiweya, badi Falisiyavo ke Sadusiyavo ivebutu ivevonavona toyogina, ada au yoo iidina.

⁸ Faina badi Sadusiyavo ivona toalika keke inayawa-vagila, kaduwe ivona aneloseyavo ke aluwaluwa keke ida miyami.† Aku badi Falisiyavo gaitoma toiye-dina ivetumaganedi.

⁹ Ada nodi iagofaifaina bonadi lakaina aku Mosese yana veimeya anatovewala tufodi, badi Falisi, imididi ivona toyogina, ivona, “Keke tamo gavana koyona banae wagaine ada nuwaga. Kai aluwaluwa o kai anelose seyana giifufuyena, wada keke koyona.”

¹⁰ Aku au yadi gavekwavekwageya gitubugamowa, ada tolugaviya aditoveimeya lakaina gimatauta aenanai Paulo ina sibwakeibwakeina. E ada tolugaviyayavo giveimeyedi iobu yoo iatuwaiwainau aku adimwatuguya iabi inauwena yadi manuwa wagaine.

¹¹ Ada bogi-nai wagaine Kauveya giela Paulo lilivane gimididi aku givonena, “Una asevatu! Bademowa faikuya uawatalatalaina idedeku

† 23:6 Gug 26:4-5, Fip 3:5 † 23:8 Mad 22:23, Mak 12:18, Luk 20:27

Yelusalema wagaine, ada kaduwe gilubodani Loma wagaine anafaiweya una awatalatalaina.”†

MeIsileli iveimeya ke Paulo ina luvealikana.

¹² Mala gilavuna meIsileli tufodi nodi ivagauta ke iveimeya-kavu vaita Paulo ina luvealikana, ada ivonadabadaba toyogina keke tamo gavana inakani o inayui aku nagona ina luvealikana.

¹³ Badiyavo nodi taide veimeya-nai ibubuna ani adiyoo foti (40) kaduwe adigavaiyei.

¹⁴ Ada badi yoo-dina inau veyavo anatovegugai lakaidiyavo ke meIsileli kaliva lakaidiyavo wagaidiya ada ivona, “Ime Yaubada matane avonadabadaba velemono, ani keke tamo gavana anakani o anayui aku nagona Paulo ana luvealikana.

¹⁵ E ada imiyavo ke Kaniselayavo nodi veola wana imilina tolugaviya aditoveimeya lakaina wagaine, ke Paulo gina obualiyena wagaimiya. Wana vonena vaita nuwanuwami wana toliluveluvena ke yana koyona wana alamane-dewedewena. Aku ime ana kidewadewa ada tova-nai ina alialiyena, ani ime nagona wai wagaine ana luvealikana.” †

¹⁶ E aku Paulo novuna natudi ani yadi veimeya-nai gikaiyanogala, ada ginau tolugaviya yadi manuweya giluku tamana giawatalatalainena.

¹⁷ Ada Paulo ginogalina wagaine, tolugaviya aditonagona seyana gidouwena ada givonena, “Taidei tubulakata-nai una nauwena tolugaviya aditoveimeya lakaina wagaine. Yana nuwanuwa gaitoma seyana faina gina awamogatalena.”

† 23:11 Gug 28:16,23 † 23:15 Gug 25:3

¹⁸ Ada tonagona-nai tubulakata ginauwena tolugaviya aditoveimeya lakaina wagaine ada givonena, “Banae yogoyogona anayegana Paulo ani gidouweku gana givoneku ada tubulakata taidei gaaliyena wagainiya ke gavana yana nuwanuwa gina awamogatalena wagainiya.”

¹⁹ Ada tolugaviya aditoveimeya nimane giabi ginauwena maita tabae ke gitolidadanena, “Gavana ya nuwanuwa una voneku.”

²⁰ Bana givona, “Melsileli yama tonagona nodi iveimeya, ada malabutu inaela ina veoleni evona vaita ya kaliva Paulo ina obuyena Kanise-layavo wagaidiya. Inavona vaita nuwanuwadi ina toliluveluvena ada yana sidamana vuvuna inalele-dewedewena.

²¹ Aku wada yadi vona ani keke vona velemona, ada keke una venogaledi e ada nuwa inakani. Faina yadi kalivayavo adiyoo foti (40) kaduwe gavaiyei, ani bademowa wai lilivane ivelusewasewavuyau ke ibodabodana. Badiyavo ivonadabadaba Yaubada matane vaita keke inakani o kai inayuga aku nagona Paulo ina luvealikana. Badi bademowa ikidewadewamowa aku ya awaega ibodabodana.”

²² Ada tolugaviya aditoveimeya lakaina tubulakata-nai givonena, “Taidei ya awamogatala-nai wagaikuya ani keke tamo gaito wagaine una ifufuye.” Ada giimili ginau.

Paulo inauwena Loma kabemali lakaina anayegana Filikesa wagaine.

²³ Ada tolugaviya aditoveimeya-nai lakaina ani tolugaviya wani analedi (100) aditonagona adiselu gidouwedi ielai wagaine ke givonedi,

“Wana kidewadewa, malinai bogi kauwana naeni kiloki anafaiweya wana tauya wanana melala lakaina Sisalia. Yami tolugaviyayavo wana vaidi tu analedi (200) agediya inanau, toyage osi adiyoo seveniti (70) ada kaduwe giyo anatolugaviya adiyoo tu analedi (200).

²⁴ Kaduwe, osi tufodi Paulo faine wana kidewedewedi, ada kabemali lakaina anayegana Filikesa wagaine wana nauwena. Ada wana itaveyabi-dewedewena e ada keke tamo vita gina nuwaga wai wagaine.”

²⁵ Kaduwe leta givetokilumina ani taidei anafaiweya givona.

²⁶ Siule, kabemali tokaiwabu Filikesa. Iya Kolodiyasi Laisiyasi gavetokiluma wagainiya.

²⁷ Kaliva taidei ani meIsileli ikiveyabina ada tova kabiso-moena ida luvealikana, aku valeyana ganogalina banae Loma kaliva faina, yaku tolugaviyayavo nodi aobu wagaidiya ke nimadiya akibababalena.[†]

²⁸ Iya nuwanuwaku gana alamanena gavana yana koyona vuvuna, e ada gaaliyena yadi Kaniselayavo matadiya.[†]

²⁹ Ada vuvuna bademowa ganuwagana ani keke tamo koyona gida faisewa ayo kana luvealika o kai deli wagaine kanasei, aku meIsileli yadi veimeya gagana faina iawavekoyoyena.

³⁰ Tova-nai gakaiyanogala yadi veimeya kavu Paulo analuvealika faina, ada gamadu imilina wagainiya. Aku kaduwe badiyavo iawavekoyoyena,

[†] **23:27** Gug 21:30-36 [†] **23:28** Gug 22:30

ani gaveimeyedi ke inaelai ineneku-deya ada kaliva-nai yana koyona ina vonayedi o mataniya. Taidei-mowa anatubuga. Kafoi.

Taidei anafaiweya tolugaviya aditoveimeya lakaina Filikesa yana leta givetokilumina.

³¹ Ada tolugaviya adiveimeya imuliyena anafaiweya, ke bogi-nai Paulo iabi inauwena melala anayegana Anitipatiliisi wagaine.

³² Mala gilavuna tolugaviya agediya inaunau ani iyewadi yadi manuweya Yelusalema wagaine, aku osi anatoyage gagana Paulo inauwena Sisalia.

³³ Tova-nai bademowa iyegemona Sisalia ada leta-nai kabemali lakaina ivelena, kaduwe Paulo iatuegena banae wagaine.

³⁴ Ada kabemali lakaina leta giveyawana muline, Paulo gitolidadanena, givona, “O gavafafali anakaliva?”

Ada gilufata, “Silisiya anafafali wagaine.”

³⁵ Ada kabemali lakaina ginogalina ke givonena, “Aimo badi iawavekoyoyeni ani inaelai ayo una vonayavuga.” Ada tolugaviya giveimeyedi ke Paulo ina nauwena Elodi yana manawa lakaina wagaine, ada wadedeku yogoyogona ina lukuwena ke ina itaveyabidewedewena.

24

Filikesa matane meIsileli aditonagona Paulo iawavekoyoyena.

¹ Yadayada faifi giavaidi, veyavo anatovegugai aditonagona Ananaiyasi ke meIsileli kaliva

lakaidi tufodi, kaduwe Loma anaveimeya anatonuwauya banae anayegana Tetulasi, nodi ielai Sisalia wagaine. Ada badiyavo ebavevonayavuga wagaine iluku, ada Paulo anaawavekoyo ialiyena kabemali lakaina Filikesa wagaine.

²⁻³ Ada Filikesa giveimeya ke Paulo ivagaulena, au Tetulasi givebutu Filikesa wagaine giifuifufu Paulo anaawavekoyo faine, givonaga, “Kauveya lakai, avemwamwala lakaina faina oyeni tonuwanuwa velemono, ada ya veimeya iwakana wagaine dewa koyodi bademowa ivetunuga ebaveimeya taidei wagaine e ada tova taidei kukuya wagaine amiyamiya. Taidei gaitoma-dina faidiya yama vesiule lakaina tova moyaina wagainiya, kaduwe ya leme melala seyana seyana wagaidiya faine avesivesiule.

⁴ Aku keke nuwanuwaku una kabekabebe faina, yama vona maufo-moena. E ada meyameyaganina uda nuwakalikaliyema ke uda nogalima.

⁵ “Kaliva taidei aitanuwagana banae kivekoyo anatosilakata, kaduwe yana laumamala wagaine meIsileli agodi giveveugana ke igavekwavekwageya fafali moyaina wagaidiya. Banae kwana Nasaledi anatomuliya ani aditonagona.

⁶ Kaduwe, gicaluvaluva yama manawa tabu gina kivebwanenena,[†] aku akiveyabina. [Nuwanuwama ada vevonayavugina taumeyavo yama veimeya wagaine,

⁷ aku tolugaviya aditoveimeya anayegana Laisiyasi, ani yana tolugaviyayavo nodi iobuelai ada itoyogi-moena ke nimameya isilemama.

[†] 24:6 Gug 21:28-30

⁸ Ada giveimeyema ke anaelai wagainiya anaawavekoyo ana awamogatalena.] Kai o tauni una toliluveluvena, aga una alamane-dewedewena yana koyona vuvuna aaliyena wagainiya.”

⁹ Taidei anafaiweya Tetulasi givona, ada meIsileli bana nodi ielai ani italakakila ivona, “Gavana givonayena, wada velemonoena.”

¹⁰ Aku kabemali lakaina nimane Paulo giluaawaegena ke gina ifufu, ada Paulo givona, “Kauveya, gaalamanena malamala moyaina wagaidiya oyeni ehaveimeya taidei wagaine uveiveimeya ke amagiduwa ualamanena, e ada taidei faina gavemwamwala o mataniya gana vonayavuga ada tauku gana awababaliku.

¹¹ Kai una tolidadanedi, aga afaiweya tauni unamadu alamanena ani yadayada tuwelo gaga givaidi wagaine galaka Yelusalema ke Yaubada wagaine gana oduodu.

¹² Aku badi gavega iveloveloiku ani manuwa tabu wagaine iitaku wagaine, keke tamo kaliva nodi ada vekwageya, keke. Kaduwe manuwa ebavewala wagaidiya o kai melala lakaina matatabuna wagaine, ani keke yoo gada vagauwidi gavekwavekwageya faina, au keke.

¹³ Ada kaduwe taidei kaliva-dina iveloveloiku ani keke adifaiweya gaitoma seyana ina vewaleni ke yadi vona ina kivetoyogi.

¹⁴ Aku taidei gana awamogatala wagainiya. Yama Kauveya Yana Wai Iya gamulimuliyena aku Wai-nai badi iawavefwayafwayayena. Iya gaoduodu tamameyavo nagona yadi Yaubada wagaine, ada gavetumaganena veimeya gielai

Mosese wagaine, kaduwe falofita yadi vetok-iluma† matatabuna gavetumaganedi.

15 Iya yaku nuwavetumagana anafaiweya badi yadi nuwavetumagana, tainei ani toalika matatabudi, toyegayegana ke tokoyona, Yaubada gina siveyawa-vagiledi.†

16 Taidei faina tova moyaina gagaluvaluva ke ganadewa iwakana, e ada wa nuwafouku yegayegana gana miyamiya Yaubada matane ke kadu kaliva matadiya.

17 “Ada malamala moyaina mali fafali wagaidiya gamiyamiya, aku gayewaku Yelusalema wagaine† ke velekaovo anamani gana aliyena yaku yoo tofanifani faidiya, kaduwe gana vebolavoi Yaubada wagaine.

18 Ada bademowa gayegayegana amaveimeya anafaiweya ke ebavebolavoi gasesena aku manawa tabu wagaine iitanuwagaku.† Keke yoo nodi ada miyami, kaduwe keke tamo gaito nodi ada gavekwavekwageya.

19 Aku meIsileli tufodi, badiyavo Eisiya anafafali anakaliva, ani wadedeku-deya imiyamiya ke iitaku. E ada kai badi tamo gavana faina ida awavekoyoyeku, badi taudiyavo idaelai idedeku ida midimididi mataniya, ada biyavo-dina ida vevonayavugiku.

20 O kai taidei kaliva-dina bademowa ielai ida awamogatala gavana yaku koyona inuwagana, faina tova-nai gamidimididi Kanisela matadiya ani badi kaduwe wadedeku.

† 24:14 Gug 26:22 † 24:15 Iyo 5:28-29 † 24:17 Gug 21:17-28

† 24:18 Gug 21:26-27

21 Aku kai gaitoma seya-moena faina ina awavekoyoyeku, ani Kanisela matadiya gamidimididi aku bonaku lakaina wagaine gavona, 'Malinai Iya matamiya gamidimididi ebavevonayavuga taidei wagaine, faina gavetumagana ani toalika Yaubada gina siveyawa-vagiledi.' " †

22 Ada taidei anafaiweya Paulo givona aku Filikesa bademowa Kauveya Yana Wai giala-manena velemoena, ada vonayavuga gifalina ke givona, "Tova-nai tolugaviya aditoveimeya lakaina Laisiyasi ginaelai idedeku ayo ya vonayavuga gana venuwadadanena."

23 Ada Filikesa tolugaviya aditonagona giveimeyena ke Paulo deli wagaine ina yewena. Ina itaitaveyabina aku keke ina veiveimeye toyogina, ada kai tubuiyanavo analeme ina alialiyena aga keke ina awaawatadi.†

Paulo giifufu Filikesa ada vavinena Dalusila wagaidiya.

24 Yadayada tufona giavaidi, Filikesa vavinena Dalusila nodi ielai, badi vine Isileli. Ada Filikesa kaliva giimilidi inau Paulo ivagaulena. Ada Paulo giifuifufu Yeisu Keliso anavetumagana faina aku badi ivanevanenega.

25 Ada Paulo giifufuyena taidei anafaiweya. Kaliva yadi yegayegana Yaubada matane, kaliva taudiyavo ina awatadi ada keke yadi nuwanuwa koyona ina gugaiye, ada kaduwe Yaubada yana vevonayavuga gielaelai. Ani Filikesa gimatauta

† 24:21 Gug 23:6 † 24:23 Gug 27:3, 28:16

ada givonena, “Auwe! Unanau aku gavatoveya akufaiweya, e, kaduwe gana vagauleni.”

²⁶ Taidei anafaiweya givona, aku kaduwe ginuwanuwa vaita Paulo mani tamo gida velekvuyena ke deli wagaine-deya gida etoyavuna. Taidei faina tova ke tova Paulo givagaule-yeweyewena ke nodi iifuifufu.

²⁷ Ada malamala iluwei giavaidi, kadu Loma kabemali lakaina seyana, anayegana Posiyo Fesito, ani Filikesa anaivi givaina. Aku Filikesa nuwanuwana meIsileli gina kivemwamwalidi faina, Paulo keke gida etoyavu. Auwe yogoyogona gimiyamiya.

25

Paulo giveola ina imilina Loma anatoveimeya lakaina wagaine.

¹ Ada Fesito gielai Yudiya anafafali wagaine ke yana vetoveimeya givevuvuna. Ada yadayada toiye giavaidi, Sisalia-deya gilaka Yelusalema.

² Wadedeku-deya veyavo anatovegugai lakaidiyavo ke meIsileli aditonagona lakaidiyavo ielai, ada yadi awavekoyo Paulo faine iawamogatalena Fesito wagaine.

³ Ada iveolena toyogina ke yadi nuwanuwa anafaiweya gina gugai, vaita Paulo gina imiliyewena Yelusalema wagaine. Faina badi bademowa iveimeya vaita Paulo wai wagaine ina luvealikana.†

† 25:3 Gug 23:15

⁴ Aku Fesito gilufata, givona, “Paulo aimo yogoyogona gimiyamiya Sisalia wagaine, aku Iya tauku tova kabisona gana yewaku wadedeku.

⁵ E ada amitonagona tufodi nodi ananau e ada kai tamo koyona gigana, aga wadedeku-deya yadi awavekoyo bana faine ina awamogatalena.” Taidei anafaiweya Fesito givonedi.

⁶ Ada yadayada eita o kai teni Fesito gimiyamiya Yelusalema, muliya giyewana Sisalia. Ada mala gilavuna ginau ehavevon-ayavuga wagaine ke veimeya anaebavetoga wagaine givetoga aku giveimeya ke Paulo ina aliyena.

⁷ Tova-nai Paulo giyegemona, meIsileli aditonagona-dina ielai Yelusalema-deya, ani imidififina aku ivebutu iveloveloina vaita koyona lakai-moena moyaidi gida faisewadi. Aku yadi vona keke adifaiweya ina awavelemoenaye.

⁸ Aku Paulo tauna faine giawabababalina, givona, “Iya keke tamo gavana koyona gada faisewa. Keke meIsileli yama veimeya gada yaweli o kai manuwa tabu gada kivebwanene, kadu keke Sisa** gada awavekoyoye.”

⁹ Aku Fesito nuwanuwana meIsileli gina kivemwamwalidi faina, Paulo gitolidadanena givona, “Taidei ya dewa koyona badi iawatalatalainena faina ani gavaiyamu, nuwanuwa unalaka Yelusalema wagaine ke wadedeku una vonayavuga wagaikuya?”

** 25:8 Sisa banae toveimeya lakaina meLoma wagaidiya, ada kiniyavo Loma yana ehaveimeya matatabuna wagaine ani banae giveiveimeyedi.

¹⁰ Ani Paulo givona, “Idedeku-deya ani Sisa yana ebaveimeya ana ebavevonayavuga, e ada idedeku uda vevonayavugiku. Tauni ualamane-dewedewena keke tamo gavana koyona meIsileli wagaidiya gadagai.

¹¹ Kai tamo koyona gadagana ada yaku koyona analaufata alika anafaiweya, aga keke gada veoveola vaita keke ina luvealikaku. Aku kai kaliva-dina yadi awavekoyo faikuya ani keke velemono, aga keke tamo gaito wa yana veimeya ayo badi nimadiya gina atuegeku. Au Iya gaveoveola ke Loma anatoveimeya lakaina Sisa tauna gina vevonayavugiku.”

¹² Taidei anafaiweya Paulo givona ada Fesito yana tokivetuvetunuga nodi iifufu e ayo givona Paulo wagaine, givona, “O uveola Sisa wagaine una vonayavuga. Au Sisa wagaine unanau!”

Fesito giifufu Kini Akalipa wagaine Paulo faine.

¹³ Yadayada tufona giavaidi, Kini Akalipa wa novuna Belinisi nodi ielai Sisalia wagaine ke Fesito ina vonavesiuleyena ke ina madubodana.

¹⁴ Ada yadayada gavaiyei nodi imiyamiya aku Fesito ani Kini Akalipa giawamogatalena Paulo faine. Givona, “Seyana kaliva idedeku yogoyogona gimiyamiya, bana Filikesa gimadusegena.

¹⁵ Ada tova-nai galaka Yelusalema ada meIsileli yadi veyavo anatovegugai lakaidiyavo ke yadi kaliva lakaidiyavo ani ielai wagaikuya, ada yadi awavekoyo taidei kaliva-nai faine iawatalatalaineku. Ada iveoleku ke gana veimeya vaita banae wa yana koyona e ada analauboda matavuloga gina nuwagana.

¹⁶ Aku gavonedi, 'Ime meLoma amagiduwa ani keke taidei anafaiweya. Keke kaliva ana madusei matavuloga wagaine, aku nagona badi iawavekoyoyena ani bana nodi ina vemagigiitaita, e ada tauna anafaiweya gina awababalina yana dewa-nai iawatalatalainena faina.'

¹⁷ E ada tova-nai badi nodi aelai, keke gadaboda aku mala gilavuna ganau ehavevonayavuga wagaine, ke veimeya anaebavetoga wagaine gave-toga aku tolugaviya gaveimeyedi ke kaliva-nai ina lukualiyena.

¹⁸ Tova-nai ialiyena ke badi iawavekoyoyena imididi iifuifufu, ada Iya ganuwanuwa vaita koyona lakai-moena faina ida awavekoyoye aku yadi awavekoyo keke anafaiweya.

¹⁹ Aku taudiyavo yadi vetumagana ananuwanuwa gagana faine ivekwageya,[†] kaduwe kaliva seyana anayegana Yeisu faine. Banae bademowa gialika, aku Paulo givonavona wayawaina gimiyamiya.

²⁰ Ada keke gada alamane gavaiyamu gaitomadina faidiya gada toliluvayedi. E ada Paulo gatolidadanena kai nuwanuwana ginalaka Yelusalema wagaine, ada wadedeku-deya gana vevonayavugina.

²¹ Aku Paulo giveola ke deli wagaine gina miyamiya ada aimo Sisa wagaine gina vonayavuga. E ada gaveimeya ina itaitaveyabina deli wagaine, aku gavatova iwakana wagaikuya ayo gana imilina Sisa wagaine." Taidei anafaiweya Fesito givona Akalipa wagaine.

[†] 25:19 Gug 23:29

22 Ada Kini Akalipa givonena, “Iya nuwanuwaku kaliva-nai yana vona tauku gana nogalina.”

Ada Fesito gilufata, “Malabutu-yo una nogalina.”

Paulo gimididi Akalipa matane.

23 E ada mala gilavuna Akalipa ke Belinisi adinuya iwaka-vagaidi iveigavuyedi, ada wa yadi kaikaiwabu iluku manuwa ebavagauta lakaina wagaine. Ada kaduwe tolugaviya aditoveimeya lakaidiyavo ke melala-nai lakaina anatonago-nayavo adiyegana lakaidi nodi iluku. Ada Fesito tolugaviya giveimeyedi ke Paulo ilukualiyena.†

24 Ada Fesito givona, “Kini Akalipa ke kaduwe imi moyaimi wavagauta idedeku ime nodi, kaliva taidei waitana. MeIsileli moyaidi Yelusalema wagaine ada kaduwe idedeku Sisalia wagaine, ani bonadi lakaina wagaine iveoleku toyogina, ivon-aga, ‘Kaliva taidei keke gida luboda wayawaina gina miyami!’ †

25 Aku Iya gavevonayavugina wagaine, keke tamō yana koyona gada nuwaga ayo faine gida alika. Ada bana tauna giveola ke Sisa wagaine gina vonayavuga faina, Iya gaveimeya ke gana imilina Loma wagaine.

26 Aku keke seyana yana koyona gada nuwaga ke yada kauveya Sisa wagaine gana vetokiluma. Taidei faina gaaliyena o mataniya, Kini Akalipa, ada kaduwe imi matatabumi, ke vonayavuga taidei wagaine kai yana koyona tamō kana nuwagana, aga akufaiweya gana vetokiluma Sisa wagaine.

† 25:23 Mad 10:18 † 25:24 Gug 22:22

²⁷ Faina ganuwanuwa vaita keke gida luboda kai kaliva yogoyogona kana imilina Sisa wagaine, aku keke tamo yana koyona kana awamogatale.” Taidei anafaiweya Fesito givona.

26

¹ Aku Akalipa givona Paulo wagaine, “Iwakana, gaawaegeni ke tauni fainiya una ifufu.”

E ada Paulo nimana gikilakaina ke givebutu tauna faine ginau,

² givonaga, “Kini Akalipa, afamomoku malinai mataniya gamidimididi ke tauku gana awababaliku gaitoma moyaina faidiya meIsileli iawavekoyoyeku.

³ Gavemwamwala wagainiya gana ifufu, faina ualamane-dewedewena meIsileli amagiduwa matatabudi, ada gaitoma moyaidi faidiya avevonavona. Tainei faina gaveoleni, wa ya atuvefaila yaku ifufu uda vanenegena.

⁴ “MeIsileli moyaidi ialamanena yaku dewa yaku tova kwamana wagaine gavevuvuna tauku yaku fafali wagaine, ada kaduwe ganauwena Yelusalema wagaine.

⁵ Tova manamanawena bademowa ialamaneku, ada kai nuwanuwadi mamauwe aga adifaiweya ina awamogatala vaita Iya Falisi ke yadi vewala gamulikabekabeyedi.[†] Badi Falisiyavo Mosese yana veimeya anaidibumwaiga wagaine meIsileli velugadiyavo itubusegedi.

[†] **26:5** Gug 22:3, 23:6, Fip 3:5-6

⁶ Ada tova malinai idedeku ivevevonayavugiku faina Yaubada yana vonadabadaba ganuwavetu-maganena,[†] ina yana vonadabadaba-nai tuwaina gisena tamameyavo nagona wagaidiya.

⁷ Taidei vonadabadaba-nai faine ime meIsileli amaunuma tuwelo inuwavetumagana vaita gina yegemona velemona aku bogi ke yadayada wa yadi aseawaega nodi ioduodu Yaubada wagaine. O Kini, meIsileli ivona taidei gaitoma-nai inuwaveyalaina faina, aku Iya kaduwe anafaiweya ganuwaveyalaina nonogana ivevevonayavugiku.

⁸ Aku gavaiyamu-yo vitana imi wagaimiya ada keke amifaiweya wana vetumagana vaita Yaubada toalika gina siveyawadi?

⁹ “Aku tuwaina Iya tauku ganuwanuwa vaita gilubodaku ke gada vedivediwe ke kaliva Yeisu kwana Nasaledi anayegana ivetumaganena ani gada kiveuloulolonidi.[†]

¹⁰ E ada Yelusalema wagaine taidei anafaiweya gadewa. Veyavo anatovegugai lakaidiyavo yadi veimeya wagaine, Yaubada yana kaliva tabutabudiyavo moyaidi gakiveyabidi ke deli wagaine gasedi. Ada muliya ivevonayavugidi wagaine, kai tovevonayavuga iveimeya ke vaita alika wagaine inasedi, ani Iya gaawaveiwakana.

¹¹ Tova ke tova ganaunau manuwa ebavewala wagaidiya ke gavevematavulogidi, kaduwe gagalualuva gavaiyamu gana gadi-yo Yeisu inavona awadamanaye. Ada yaku nuwakoyo lakaina nuwaku givaina faina, keke Yelusalema

[†] 26:6 Gug 28:20 [†] 26:9 Gug 8:3, 22:4-5

gagana wagaine aku kaduwe ganau atuwada mali melala wagaidiya[†] ke gakikiveuloulolonidi.

Paulo yana nuwavilana giifufuyena.

¹² “Aku seyana tova nau-dina wagaine, veyavo anatovegugai lakaidiyavo iawaegeku ke veimeya iveleku gananau Damasiko wagaine ada tovetu-magana gana kiveyabidi.

¹³ O Kini, kauwana givugivumeya waiya ganau-nau aku malina lakaina gabameya-deya gaitana, ani kauwana yana malina gimalisegena. Ada Iyayeku kaduwe kaliva ikwayabuku ani nodi gimalivuyoma.

¹⁴ Ada moyaima abeu babiya aku bonabona seyana ganogalina meIsileli bonameya givoneku, givona, ‘Saulo, Saulo, gavana faina ukikiveulouloloniku? Aku taidei wagaine tauni kaduwe ukikiveuloulolonini.’

¹⁵ “Ada gatolidadanena, gavona, ‘O gaito, Kauveya?’

“Ani gilufata, ‘Iya Yeisu, Iya ukiveulouloloniku.

¹⁶ Aku una mididi, faina o wagainiya gayege-mona ke gana voneni, oyeni gavenuwadadaneni yaku togugai. Ada gaitoma-dina wagaidiya bade-mowa uitaku ke kaduwe gaitoma-dina wagaidiya aimo una itaku ani una awatalatalainena kaliva wagaidiya.

¹⁷ Tauni ya yooyavo meIsileli ke badi keke meIsileli nimadiya gana kibababaleni. Ada o gana imilini badi keke meIsileli wagaidiya

¹⁸ ke matadi una kivemalidi, e ada yuyuvaneya imiyamiya aku ina miyaviladi malina wagaine,

[†] 26:11 Gug 9:1-2

kaduwe Seitani yana veimeya dibune imiyamiya ani ina miyaviladi Yaubada wagaine. E ada yadi dewa koyona wagaidiya ina nuwavilana ke Iya wagaikuya ina vetumagana, ada Yaubada yadi koyona gina venuwaegena ke yana yoo vetavetabudiyavo wagaidiya gina lukuwedi.' †Taidei anafaiweya Kauveya givona.

Paulo yana gugai giifufuyena.

¹⁹ “E ada o Kini Akalipa, taidei akuvewala-nai gabameya-deya ani keke gada dibusoyoge, keke. Gamulikabekabeyena.

²⁰ Ada nagona gavevuvu Damasiko wagaine galumamala, muliya Yelusalema ke Yudiya anafafali matatabuna wagaidiya, ada kaduwe badi keke meIsileli wagaidiya. Gavonedi, ‘Yami dewa koyodi wana segedi aku wana miyavilami Yaubada wagaine, ada wanadewa tunutunugina ke wana gugai iwakana e ada yami nuwavilana anaita gina mogatala velemonoena.’ †

²¹ Taidei yaku laumamala-nai faina, meIsileli ikiveyabiku manuwa tabu wagaine ada igaluval-uva vaita ida luvealikaku.

²² Aku Yaubada gilemeku tova nagona wagaidiya, kaduwe aimo gilemelemeku malinai. E ada malinai gamidimididi matamiya ke moyaimi wagaimiya gaawaawatalatalaina, imi lakaimiyavo ada imi kabisomiyavo. Ada taidei gavonavona ani au gavana falofitayavo ada Mosese tova nagona ivonayena aimo gina yegemo faina.

† 26:18 Kol 1:13-14, 1Pi 2:9 † 26:20 Gug 9:20,22,28,29, 22:21

23 Badi ivona vaita Banae Mesaiya uloulolo gina nuwagana, kaduwe gina alika, ada alika wagaine ani Bana nago-moena gina maduyawa-vagila.† Ada yana yawa-vagila wagaine malina anawai gina awamogatalena badi meIsileli ke badi keke meIsileli wagaidiya.” †

24 Ada taidei anafaiweya Paulo tauna faine gi-awababalina, aku Fesito bonana lakaina wagaine givonena, givona, “Paulo, o kabakabaleya! Tova moyaina buki uveyaveyawa ke unuwanuwa-faila e ada uvekabakabaleya.”

25 Aku Paulo gilufata, givona, “O Kauveya Fesito, Iya keke gada vekabakabaleya aku gavana gavonavona ani velemoena ada wa vuvuna.

26 Ada Kini Akalipa gaitoma-dina bademowa gialamanena, e ada akufaiweya banae wagaine gana ifufu. Faina ganuwaveyalaina vaita gaitoma-dina bademowa ilakayegemona ani bademowa valeyadi ginogalina, faina yegeyegemonidi, keke sewasewavuyedi.” †

27 Ada Paulo Akalipa wagaine givona, “O Kini Akalipa, kai uvetumaganena gavana falofita ive-tokilumina? Gaalamanena uvetumaganena.”

28 Ada bana Akalipa Paulo givonena, “Gavaiyamu, unuwanuwa vaita tova maufona wagaine nuwaku uda kanina ke Yeisu gada vetumaganena?”

29 Ada Paulo gilufata, “Kai tova maufona o kai tova manamanawena, aku Yaubada wagaine

† 26:23 1Kol 15:20 † 26:23 Luk 24:46-47 † 26:26 Iyo 18:20

gaveola ke Iya Yeisu gavetumaganena anafaiweya ani oyeni ada kaduwe moyaimi malinai wavanenegeku ani wana nuwagana. Aku keke nuwanuwaku taidei seini wagaidiya ina yogomi.”

³⁰ Taidei anafaiweya givona ada Kini gimididi, kaduwe kabemali ke Belinisi ada moyaidi badi nodi ivetoga ani imididi.

³¹ Ada iyegemona inaunau aku taudiyavo iveifuifufu, ivonavona, “Ida kaliva-nai ani keke tamo koyona gidagai ke analauboda gina alika o kai deli wagaine kanasei.”

³² Ada Kini Akalipa Fesito givonena, “Kai kaliva taidei keke gida veola Sisa matane gida vonayavuga, aga adafaiweya kada etoyavu gidanau.” †

27

Paulo yanana Loma faina.

¹ E aku Fesito giveimeya ke ime ananau Itali anafafali. Itali anamelala lakaina Loma wagaine tolugaviya wagaidiya yoo seyana gimiyamiya ivewagana ‘Sisa Yana Yoo’, ada yoo-nai anatonagona anayegana Yuliyasi. Taidei kaliva-nai ani Paulo ke yogoyogodiyavo tufodi nimane isedi ke bana gina itaveyabidi.

² Ada melala Adalamitia anawaka lakaina seyana wagaine ayage, waka-nai tova kabisona gina tauya gina nulukulukunau melala tufodi Eisiya anataliya wagaine. Kaduwe kaliva seyana anayegana Alisitako ime nodi ayage anau, banae

† 26:32 Gug 25:25

kwana Tesalonaika, tainei Masedonia anafafali wagaine.

³ Yadayada anavelu wagaine Saidoni aluku, ada Yuliyasi ani Paulo ginuwakalikaliyena faina, giawaegena ke ginaobu ginanau tubuiyanavo gina madubodadi ada gavana wagaine givemaufu ani badi ina vena.

⁴ Kaduwe Saidoni-deya ayage-vagila ke naya itaina ada atauya aku mala aveonana faina, Saifilasi imula domone niwaniwalovine amaduga.

⁵ Tova-nai bademowa Silisiya ke Pamifiliya adi-awageya adamana aku aelai Maila aluku, tainei Laisiya anafafali wagaine.

⁶ Ada wadedeku-deya tolugaviya aditonagona-nai Yuliyasi ani melala Alekisanidia anawaka seyana ginuwagana ginaunau Itali wagaine, e ada waka-nai wagaine giveyagedamama.

⁷ Ada yadayada moyaina mainuwameyavo amadumadu. Yama nau-nai givita faina mala aveonana, ada bademowa aveluvedavedaubo Nidasi aku keke amafaiweya mala matane anana, faina mala lakaina wadebaimeya. Ada waka maita iviviyena ada imula anayegana Kiliti wadomone niwaniwalovine amaduga, aelai melala taliyeya anayegana Salamone aenowalilivuga.

⁸ Ada taliya lilivane amadumadubala wamalameyavo ada keke ada madumadu toyogina aku avetoeafaefa-mowa ke aelai seyana fafali anayegana Ebaiwaga Iwakana, tainei melala Lasea lilivane.

⁹ Ada bademowa yadayada gavaiyei avenuwaeggedi faina mala lakaina wagaine,

e ada keke gida luboda anana, faina tutuya taidei anatova-nai ani kabisona ada mala yavalata yana tova gina yegemona. Taidei faina Paulo giluwageyedi toyogina, givona,

¹⁰ “Imi moyaimi, Iya gaitana kai kana silakata aga vita kana nuwagana filoluya, ada waka ke lokoloko inakoyo ada kaduwe kai taudeyavo yawaida kana madusegedi.”

¹¹ Aku tolugaviya aditonagona Paulo yana vona keke gida venogale, aku bana waka anatoveimeya ke toniwaka yadi vagadona gimuliyena.

¹² Aku kaduwe, fafali-nai wagaine aluku ani keke iwakana velemoena mala anatoveya, e ada kaliva tufona moyaidi iveimeya ke maitamoena ananau. Ada kai amafaiweya aga analuku Finikisi wagaine, wada ebaiwaga Kiliti imula wagaine. Tainei ebaiwaga-nai iwakana velemoena, faina mala anatoveya buli keke anafaiweya gina lavuga negenine.

Mala koyona inuwagana.

¹³ Tova-nai bolimana gilusimisimila, ada waka anatofaisewayavo inuwanuwa vaita amafaiweya ananau Finikisi ana yegemona. E ada lomu itaina ke amaduyegemona ada Kiliti taliyeya amadubala.

¹⁴ Aimo keke adamadu tova manamanawena aku mala koyona ivewagana ‘yavalata toyogina’ imula-nai waina gielai.

¹⁵ E, mala giela waka gikiveyabina ada keke anafaiweya tufona ginamadu lakalaka faina mala

maita wadebaimeya, ada au waka iviviyena ke mala gilutunema.

¹⁶ Anau imula kabisona anayegana Koda domone amadumadubalawalilivuga aku dinike ibalabalalavi-ku au iselakaina.

¹⁷ Bademowa iselakaina ke isifona, ada kaduwe waka tauna bulava wagaidiya iutawatawanina e ada buli keke anafaiweya gina luyaweyaweli. E ayo badi waka anatofaisewa imatauta vaita waka ginatula avavalina makamakamina wagine, tainei fafali Libiya lilivane. Taidei faina naya ililina ada anafaiweya buli waka gilutunena.

¹⁸ Ada mala toyogina velemono ke waka gilubwatabwatavilana, e ada yadayada anavelu wagine lokoloko tufona isegetafutafuyau.

¹⁹ Yadayada anaveto wagine waka tauna analokoloko tofaisewa taudiyavo nimadiya ivaidei isegetafutafuyau.

²⁰ Ada yadayada gavaiyei keke maita kauwana o kai ailabama ada itadi ayo nuwama givemaufomowa vaita keke kibababala ana nuwaga.

²¹ Aku bademowa tova manamanawena kaliva keke maita aa ida kanikani, e ada Paulo matadiya gimididi givonedi, “Kalivayavo, bonaku wada nogalina.[†] Kai Kiliti keke kadasege aku kadamiya, aga keke taidei vita-nai kada nuwaga ada lokoloko moyaina keke kada segedi.

²² Aku malinai gana vonemi, wana asevalu! Faina keke seyana gaito wagaimiya gina alika aku waka gagana gina luyaweyawelina.

²³ Taidei gaalamanena, faina bogi wagine

[†] **27:21** Gug 27:9-10

Yaubada-nai Banae wagaine gaoduodu ada Iya yana kaliva seyana, ani yana anelose giimili gielai ada lilivakuya gimididi

²⁴ aku givona, 'Paulo, keke una matauta! Gilubodani aimo Sisa matane una mididi.† Kaduwe Yaubada tonuwadoga faina, badi gavega waka wagaine nodi wanaunau ani moyaimi gina kibababalemi. Keke tamo gaito gina alika.'

²⁵ Tubuiyakuweyavo, taidei faina wana asevatu. Faina Yaubada gavetumaganena ke yana anelose givoneku mamauwe, velemonoena gina yegemona.

²⁶ Aku aimo seyana imula wagaine mala gina lulakaida." Taidei anafaiweya Paulo givona.

²⁷ Ada wiki iluwei giavaidi aku aimo Ediliya Leyaga wagaine mala gilutunema, aku boginafa waka anatofaisewayavo ilutovonina vaita seyana taliya lilivane ayegeyegemona.

²⁸ E ada gawana anaobu itutuluvaluvana ada inuwagana foti (40) mita, ada maita-moena gi-alugedi inau kaduwe itutuluvaluva-vagilena ada inuwagana teti (30) mita.

²⁹ Ada imatauta aenanai yama waka ginat-ula kabala wagaidiya faina, lomu lafuli waka muline ibatugedi ada iveoveola yadi yaubada wagaidiya vaita mala gida madulavuna.

³⁰ Aku waka-nai anatofaisewa nuwanuwadi waka ina madusegena, e ada yadi seba isena evona waka mudune lomu ina batugedi, aku vele-moena dinike iseobuyena leyageya.

³¹ Aku bana Paulo givona tonagona wa yana tolugaviyayavo nodi wagaidiya, givonedi, "Kai

† 27:24 Gug 23:11

taidei kaliva-dina keke waka lakaina wagaine inamiya, aimo keke amifaiweya kibababala wana nuwaga.”

³² Taidei anafaiweya givona faina, tolugaviya waka lakaina anadinike anabulava italagoloidi ke dinike gibe gialugena.

³³ Ada malalavulavuga ani Paulo kaliva moyaidi gilumodovedi aa ina kanina, givonediga, “Yadayada fotini giavaina wagaidiya wayami matauta wanuwunuwa gavana gina yegemona ayo keke tamo aa wadakani.

³⁴ Taidei faina gavona vagadonemi ke maita wadakani ke wana kivetoyogimi, e ada wana kibababalemi. Faina keke tamo gaito seyana wagaimiya gina alika.”

³⁵ Ada givona muline, tauna beledi givaina ke moyaidi matadiya givona vesiule Yaubada wagaine, ada gikiinena ke givebutu gikani.

³⁶ E ayo moyaidi iasevatu ke kaduwe aa ikani.

³⁷ Ada waka-nai wagaine amayoo anatubuga tu analedi seveniti sikisi (276).

³⁸ Tova-nai moyaidi ikani bademowa adifaiweya, ivebutu witi waka wagaine ibabatugau leyageya ke waka gina meyanina faina.

Waka lakaina gitula.

³⁹ Mala gilavuna taliya iitana, aku waka anato-faisewa taliya-nai ibavuyena aku ukuna seyana iitana makamakamina, ada inuwunuwa vaita adifaiweya waka ina lakavena ukuna-nai anataliya wagaine.

⁴⁰ Ada au lomu adibulava italagoloidi imiya leyageya, aku kuliga adibulava iyavudi. Ada

waka mudune naya itaina ke waka ina maduge ina lukuwena taliya-nai wagaine.

⁴¹ Aku waka avavalina wagaine gitula ada muduna gifotana. Keke adifata inakaki aku ulena ani buli lakaidi iluyaweyawelina.

⁴² Aku tolugaviyayavo inuwanuwa yogoyo-godiyavo ina luvealikadi e ada keke tamo gaito taliyeya gina kayovilakata ke ginaota.

⁴³ Aku tolugaviya aditonagona nuwanuwana Paulo gina kibababalena faina, giawatadi evona keke ina luvealikadi. Aku giveimeya ke badi gavega adifaiweya inakayo ani inamadu velutafutafuyau ke ina kayoyalili taliyeya.

⁴⁴ Aku badi gavega kayo keke ida alamane, ani ai wagaine o kai waka faiwana ina kiveyabina ke ina kayoyaliliyedi taliyeya. Ada taidei anafaiweya moyaima akayovilakata. Keke tamo gaito vita gida nuwaga aku moyaima avelubwaibwaina.

28

Paulo yana miya Melita wagaine.

¹ Tova-nai bademowa akayovilakata imula wagaine, ada anakalivayavo ivonema taidei imulanai anayegana Melita.

² Ada anakalivayavo ivesiuleyema ke inuwakalikaliyema lakaina. Ai ikulina ke avevala, faina wei gilugalugaga ada tulutuluna.

³ Ada Paulo gina ai gikikwakwakwa giela gilevaledi ani ai yana luginagina faina, mota koyomoena giluluvealika giyegemona ada Paulo ni-mana giyova gikudaveyabina.

⁴ Ada badi meMelita iitana mota Paulo ni-mane gikwaikwaiyoyo ada taudiyavo iveifuifufu, ivonavona, “Kaliva taidei velemonoena toluvealika. Gilubodana leyageya gida alika aku au givelub-waibwaina. Ada tainei faina yada yaubada-nai kaliva koyodi givematavulogidi ani keke gida awaege banae wayawaina ginamiya.”

⁵ Aku Paulo mota-nai gilukakina ke ai alalata wagaine gibeu, ada keke tamo vita gida nuwaga.†

⁶ Aku kaliva-dina iveyamasena evona vaita vovona gida tubuga o kai gida madualika. Ada iboda tova manamanawena aku keke tamo ga-vana gida yegemona Paulo wagaine, e ada yadi nuwanuwa isevedavedamedi ke ivona, “Kaliva taidei banae yaubada seyana.” †

⁷ E aku kaliva seyana gimiyamiya, anayegana Pabiliyasi. Banae imula-nai anatoveimeya lakaina, ada bana yana babi taliya lilivane ime alaka. Ada kaliva-nai gisivaivaima yana manuweya ada yadayada toiye wagaidiya giitaveyabi-dewedewema.

⁸ Aku tamana giveoga anaiviya gimiyamiya. Vovona gilukalalava kaduwe gikamomadu. E ada Paulo giluku toveoga-nai wagaine ada giveoveola Yaubada wagaine, ada nimana gisena bana wa-gaine ke gikivebwainina.

⁹ Ada bana gibwaina wagaine, au toveoga moyaidi imula-nai wagaine imiyamiya ani ielai ada Paulo Yaubada giveoveolena badi faidiya ke ibwaina.

¹⁰ Ada nuwakabubu moyaina ivelema, ada aimo tova-nai akidewadewa anayage faina, e

† 28:5 Mak 16:18 † 28:6 Gug 14:11

aku amaga ke amagufa ivaidi ada idododi waka wagaine yamana faine.

Melita isegena aku inau Loma.

¹¹ Ada Melita wagaine vaikoi toiye amiyamiya aku waka seyana wagaine ayage anau. Waka-nai anayegana 'Natuyuweyuwe Yaubada', ** ada gielai melala anayegana Alekisanidia wagaine-deya ke imula-nai wagaine gimiyamiya, faina mala yana tova.

¹² Ada anau melala anayegana Sailakusu wagaine aluku ke wadedeku-deya yadayada toiye amiyamiya.

¹³ Kaduwe ayage-vagila ke anau melala anayegana Legiumi wagaine. Mala gilavuna mala iwakana gielai, ada atauya-vagila amadumadu ke yadayada anavelu wagaine aluku melala anayegana Futioli.

¹⁴ Ada wadedeku-deya tovetumagana tufodi anuwagadi ke ivagaulema anau yadi manuweya, ada wagaidiya amiyamiya yadayada seveni. Ada muliya asegedi aku agemeya anaunau Loma wagaine. **

¹⁵ Ada moyaima anaunau aku badi tovetumagana Loma wagaine valeyama inogalina, e ada itauya inamadu bodebodema. Tufodi nodi avenuwaga maketi anafafali Afiya wagaine, kaduwe tufodi melala anayegana Manuwa

** **28:11** Tayuwe waka anatofaisewa moyaidi taide yaubada fwayafwaya-dina wagaidiya ioduodu, adiyegana Kasita ke Folakisi, ada adikilumina ibubudi waka-nai muduna wagaine.

** **28:14** Futioli aku ginau Loma wagaine ani anaatuwada tu analedi foti (240) kilomita.

Wakawaka Toiye wagaine avenuwaga.** Ada Paulo giitadi ayo Yaubada wagaine givesiule ada giasevatu.

¹⁶ Tova-nai Loma wagaine ayegemona, ada kabemali Paulo iawaegena ke manuwa seyana wagaine anakaiibe gina miyamiya aku tolugaviya seyana gina itaitaveyabina, keke ginaota faina.

Loma wagaine Paulo gilumamala meIsileli wagaidiya.

¹⁷ Ada yadayada toiye giavai, Paulo meIsileli aditonagonayavo Loma wagaine gidouwevagauwidi. Ada bademowa ivagauta-yabu ada givonedi, givona, "Tubuiyakuweyavo, Iya keke tamo gavana koyona gadagai yada yooyavo wagaidiya, keke. Kaduwe adagiduwa tamadeyavo nagona wagaidiya ivewaleda ani keke gada awavekoyoye, keke. Nonogana meIsileli Yelusalema wagaine ikiveyabiku ke iatuegeku meLoma wagaidiya.

¹⁸ Ada Loma kabemali itoliluveluveku evona ina nuwagana tunutunugina gavakoyona gagai ayo ida luvealikaku, aku keke tamo vuvu ida nuwaga faina, nuwanuwadi ina etoyavuku ganana.

¹⁹ Aku badi meIsileli iawafatafata toyogina, ivonedi vaita keke ina etoyavuku. Tainei faina wai seya-moena wagaine akufaiweya ganana, ani gana veola ke Sisa wagaine gana vonayavuga.† E ada taidei anafaiweya gaveola, aku keke vaita

** **28:15** Loma aku ginau Afiya wagaine ani anaatuwada seveniti naeni (79) kilomita, ada Loma ke ginau Manuwa Wakawaka Toiye wagaine ani anaatuwada fifti teli (53) kilomita. † **28:19** Gugai 25:11, 26:32

tamo gavana faina yaku yoo gada awavekoyoyedi banae matane, keke.

²⁰ Taide vuvuna-nai faina imiyavo gadouwe-vagauwimi e ada nodi kana ifufu. Banae-nai ide meIsileli moyaida kanuwavetumaganena ginaela gina kibababaleda ani Iya gavetumaganena faina, seini taidei wagaine yogoyogoku gamiyamiya.”

****** Taidei anafaiweya Paulo meIsileli aditonagona givonedi.

²¹ Aku meIsileli ivonena, “Keke tamo leta ada nuwaga Yudiya anafafali wagaine o fainiya, kaduwe keke tamo gaito tubuiyada seyana gidaelai idedeku gida awamogatala fainiya o kai gida awavekoyoyeni.

²² Aku nuwanuwama ya nuwanuwa ana nogalina, faina aalamanena kaliva fafali moyaina wagaidiya taidei Yeisu kwana Nasaledi yana yoo iawavekoyoyedi.”

²³ Taidei anafaiweya ivona aku yadayada ivenuwadadanena ke kaduwe ina vagauta-vagila faina.

Ada yadayada-nai ginuwagana wagaine, meIsileli tufona moyaidi ivagauta ke ielai manuwa-nai wagaine Paulo gimiya. Ada yana kivemala malabutuya givevuvuna ani ginauwena-deya mala givebogina. Giifufuyedi Yaubada yana ehaveimeya faina, ada Mosese yana veimeya kadu falofita yadi vetokiluma Buki Tabu wagaine, gavana ivonavona Yeisu

****** **28:20** Tova nagona Yaubada givonadabadaba Banae Venuvenuwadadanina gina imilina meIsileli wagaidiya, Banae Yeisu. (Gug 26:6) Aku meIsileli maita moyaidi keke ida vetumagane vaita Yeisu Banae Venuvenuwadadanina.

faine ani giveyawana badi wagaidiya. Faina nuwanuwana nuwadi gina kanidi vaita Yeisu velemoena Mesaiya, Banae-nai ibodabodana.

²⁴ Ada tovanenega tufodi Paulo yana vona ivetumaganena, aku tufodi keke ida vetumagana.

²⁵ Ada nodi ivevonavona e ada ivebutu itau-tauya, aku nagona Paulo vona seya-moena giifu-fuyena wagaidiya, givona, “Aluwaluwa Tabuna yana vona tamamiyavo nagona wagaidiya ani givona velemoena, tainei falofita Aiseya awane givonayena,

²⁶ ‘Unanau yoo taidei wagaidiya ada una vonedi,

“Tova moyaina bonaku wana noganogalina aku keke nuwami gina mamali.

Kaduwe yaku gugai wana itaitana aku keke adinuwanuwa wana itainana.”

²⁷ Faina ida yoo-nai ani aseasedi ikuga ada tagadi ikulu ke matadi ikibodadi.

Aku kai ida awaegedi aga matadiya idaita ke tagadiya ida nogala,

ada aseasedi wagaine nuwadi gida mamalina ke wagaikuya ida miyaviladi ada gada kiveiwakanedi.’ †

Taidei anafaiweya Aiseya givona.”

²⁸ Ada kaduwe Paulo givonedi, givonaga, “Tayuwe faine nuwanuwaku wana alamanena, Yaubada kibababala anamatawa ani bademowa giimilina badi keke meIsileli wagaidiya. Ada badiyavo ina venogalena.” [

† 28:27 Ais 6:9-10, Mad 13:13-15

²⁹ Ada taidei anafaiweya givona muline, meIsileli itauya inaunau aku nodi ivevonavona toyogina yana vona-nai faine.]

³⁰ Aku Paulo manuwa-nai wagaine gimiyamiya malamala iluwei, ada manuwa fatana ani tauna gilulufata. Ada gavega moyaidi iela ina madubodana ani givagaulei iluku yana manuweya.

³¹ Ada Yaubada yana ehaveimeya faina gilulumaledi ke kaduwe wa yana asevatu giveve-waledi Kauveya Yeisu Keliso faine. Ada keke tamo gaito gida galuvaluva ke gida awata. Taidei anafaiweya.

Yaubada Yana Veyavo Anawai Evaguna
The New Testament in the Bwaidoka language of
Papua New Guinea
Nupela Testamen long tok ples Bwaidoka long Niugini
copyright © 2024 Wycliffe Bible Translators, Inc.

Language: Bwaidoka

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-11-22

PDF generated using Haiola and XeLaTeX on 22 Nov 2025 from source files dated 22 Nov 2025

b5406fa0-0156-5dfd-bdb9-797516d75cf2